

Siunnersuummut nassuiaatit

## **Nalinginnaasumik nassuiaatit**

### **1. Aallarniut**

Inuiaqatigiinnitsinni ilaqutariit tunngaviulluinnarput, aamma meerartatsinnut inuusuttortatsinnullu atugassaritavut pitsanngorsarniarlugit suliaqarnitsinni ilaqutariit ilorrisimaarnerat aalajangiisuunerpaavoq. Ilaqutariinnut meerartalinnut pitsaanerusumik atugassaqartitsinissaq qanoq ilillugu pilersinneqarsinnaanersoq Naalakkersuisut ingerlaavartumik isumaliutigisarpaat, matumani naartunermut, meerartaarnermut meeravissartaarnermullu atatillugu sulinngiffeqartarnermi pissutsit pitsanngorsaavigineqarnerat ilanngullugu.

Suliffeqarfeqarfinni namminersortuni meerartaarnermut atatillugu sulinngiffeqarnermut aningaasaateqarfimmik eqquassinissaq siunnersuutip siullertut siunertaraa.

Siunnersuutip massuma suliarineqarneranut atatillugu pitsanngorsaait suli allat suut pisariaqartinneqarnersut Naalakkersuisut isiginiarsimavaat, taamaalilluni meerartaalernermi meerartaariitsiarnermilu ilaqutariinni pissutsit pitsaanerulersinneqassammata. Taamaammat naartunermi, erninermi meeravissartaarnermilu sulinngiffeqartarneq pillugu malittarisassat atuuttut nutarterneqarnerannik ullutsinnullu naleqqussarneqarnerannik siunnersuut imaqarpoq.

Tamatuma saniatigut angajoqqaatut sulinngiffeqartarnerup sivitsorneqarnissaanik UPA2019/53-imi Inatsisartut aalajangernerata timitalerneqarnera atuuttussanngortinneqarpoq.

#### **1.1. Sulisitsisunut namminersortunut meerartaarnermut atatillugu sulinngiffeqarnermut aningaasaateqarfik**

Meerartaarnermut atatillugu sulinngiffeqarnermut aningaasaateqarfeqalernissaq Naalakkersuisunit, Sulisitsisunit SIK-millu qangali kissaatigineqarsimavoq.

2016-imi SIK-p Sulisitsisullu akornanni isumaqatigiissutit nutarterneqarnerannut atatillugu illuatungeriit meerartaarnermut atatillugu sulinngiffeqarnermut aningaasaateqarfimmik pilersitsinissaq pillugu ataatsimoorlutik kissaateqarnertik pillugu Naalakkersuisunut saaffiginnissuteqarnissaq isumaqatigiissummut tapiliussatut atsioqatigiissutigaa, taamaalilluni meerartaarnermut angajoqqaatullu sulinngiffeqarnermut atatillugu akissarsiaqartitsineq eqqunneqassalluni aamma suliffeqarfinni namminersortuni sulisartunut meerartaarnermut atatillugu sulinngiffeqarnermi ullormusianut taarsiullugu akissarsianut aningaasartuutitik sulisitsisunut utertitsisarneq eqqunneqassalluni.

Taamaattumik piffissami 2017-2019-imi Naalakkersuisut Sulisitsisut SIK-lu peqatigalugit meerartaarnermut atatillugu sulinngiffeqarnermut aningaasaateqarfimmut ilusissamik

suliaqarsimapput. Meerartaarnermut atatillugu sulinngiffeqarnermut aningaasaateqarfimmut ilusissamik suliaqarnermi, allaffissornikkut pisariitsuunissaa sapinngisamillu annikinnerpaamik sulisitsisunut allaffissornikkut artukkiinissaa aallaaviusimapput. Sulinngiffeqarnermi akissarsianut sulisitsisut aningaasartuutaannik naligiissaarisarnissaq meerartaarnermut atatillugu sulinngiffeqarnermut aningaasaateqarfiup siunertaraa. Taamaattumik aalajangersimasumik aningaasaateqarfik pineqannigilaq, kisiannili akiliutinik taarsisitsisarnermik aaqqissuussineq aamma agguasseqqinnermi aningaasat agguagassat pineqarlutik.

Meerartaarnermut atatillugu sulinngiffeqarnermut aningaasaateqarfiup qulakkiissavaa:

- suliffeqarfeqarfimmi naligiissitaaneq pitsaanerusoq, taamaalilluni arnat qitorniorsinnaalersimasut suliffeqarfeqarfimmi ilanngunneqartannginnerata pisariaarutitinneqarnissaa,
- ilaqutariit meerartallit sulinngiffeqarnermi naleqquttumik pilersorneqarnissaminnut tunngavissaqarnissaat, aamma
- Kalaallit Nunanni suliffeqarfiit atasinnaanerulernissaat, aningaasaqarniarnikkut patajaannerulernerat unammilleqatigiinnerulersinnaanerallu.

Nunani allani ukiuni arlaqalersuni meerartaarnermut atatillugu sulinngiffeqarnermut aningaasaateqarfeqarsimasuni, meerartaarnermut atatillugu sulinngiffeqarnermut aningaasaateqarfiit arnat qitorniorsinnaalersimasut akornanni suliffissaaleqinerunerup aaqqiivigineqarneranut peqataasimasut, angutit arnallu akornanni assigiimmik akissarsiaqarneq qulakkeersimagaa, aamma suliffeqarfeqarfiit arnanut angutinullu immikkoorteqqanerannik kipisitsisimasoq misilittakkat paasinarsisippaat.

Kiisalu meerartaarnermut atatillugu sulinngiffeqarnermut aningaasaateqarfeqalernikkut siunissami meerartaarnermut atatillugu sulinngiffeqarnermi tamakkiisumik akissarsiaqartitsinissamik neqerooruteqarsinnaalernissaq sulisitsisunut annertuumik akikinnerulersussaavoq, tamannalu siunissaq ungasinnerusoq isigalugu sulisartut tamarmik meerartaarnermut atatillugu sulinngiffeqarnermut atatillugu sulinngiffeqarnerminni tamakkiisumik akissarsiaqarsinnaalernissaannut aqutissiuiumaartoq naatsorsuutigineqarpoq.

Suliffeqarfinni sulisut sulinngiffeqarnerminnut atatillugu akissarsiaqaannarnissamik pisinnaatitaaffigisaanni, arnat qitorniorsinnaalersimasut tunulliunneqartartut manna tikillugu takuneqartarpoq, tassungalugu meerartaarnermut atatillugu sulinngiffeqarnermut aningaasaateqarfimmit aningaasartuutinik matussusiiffigineqarani suliffeqarfiup arnaq tamakkiisumik ilaannakoortumilluunniit akissarsititsisariaqarnera pissutaatinneqarpoq. Tamanna maanna assigiimmik pisussaaffeqarluni meerartaarnermut atatillugu sulinngiffeqarnermut aningaasaateqarfiliornikkut allanngortinneqarpoq, taassumalu suliffeqarfiit akissarsianut aningaasartuutaasa annerpaartaasa meerartaarnermut atatillugu aningaasaateqarfimmit utertinneqarnissaat qulakkiissavaa.

Danmarkimi Industriens Barselsfond-imit meerartaarnermut atatillugu sulinngiffeqarnermut aningaasaateqarfiup eqqunneqarnerata kingorna ataataasut meerartaarnermut atatillugu sulinngiffeqartarnerisa sivisunerulernerat kingunerisinnaagaa misilittakkat takutippaat. Taamaalilluni suliffeqarfeqarfimmi angajoqqaanut tamaginnut naligiissitaaneq annertunerusoq qulakkeerneqassaaq.

Assersuutigalugu sulisunit 4-nit 2 ataatsikkut meerartaarnermut atatillugu sulinngiffeqalerpata, tamanna suliffeqarfinnut mikinerusunut ikittunik sulisulinnut aningaasatigut ingerlatsinikkullu qaangeruminaassinnaavoq. Suliffeqarfiit sulisunik pingaarutilinnik annaasaqartarput, suliffeqarfiillu meerartaarnermut atatillugu sulinngiffeqarnermi akissarsiaqartitsisussaataasut aningaasatigut annertuumik artukkerneqartarput, ullumikkummi malittarisassat malillugit aningaasartuutit suliffeqarfinnut utertitsissutaasinnaangillat. Taartitit sulisussanik atorfinitsitsinissamut akissaqartoqannginneranik tamanna kinguneqarajuttarpoq.

**1.2. UPA2019/53-imi Inatsisartut aalajangernerata atuuttussanngortinneqarnera**  
2019-imi UPA 2019-53-imi naartunermi sulinngiffeqartarnerup sapaatit akunnerinik 2-nik sivitsorneqarnissaanik Inatsisartut aalajangiivigisassaattut siunnersuut Inatsisartut akuersissutigaat.

Inatsisartut aalajangiinerat uani siunnersuummi § 3, imm. 1-imi atuutilersinneqarpoq.

**1.3. Naartunermi, erninermi meeravissiaartaarnermilu sulinngiffeqartarneq pillugu malittarisassat atuuttut naleqqussarneqarnerat**

Suliffeqarfeqarfinnut namminersortunut meerartaarnermut atatillugu sulinngiffeqarnermut aningaasaateqarfimmik pilersitsinermut atatillugu Naartunermi, erninermi meeravissiaartaarnermilu sulinngiffeqartarneq pillugu Inatsisartut inatsisaanni malittarisassat ullumikkut atuuttut naleqqussarneqarnissaat pisariaqarsimavoq.

Tamatuma saniatigut malittarisassat ullumikkut atuuttut arlalitsigut naleqqukkunnaarsimasut paasinarsisimavoq, taamaattumillu malittarisassat nutarterneqarnissaat ullutsinnullu naleqqussarneqarnissaat pisariaqalersimalluni.

Ilaqutariit meerartallit meerartaarnermik kingorna pitsaanerpaamik aallartittarnissaat Naalackersuisunut pingaaruteqarpoq. Taamaattumik siunnersuutikkut piffissami sulinngiffeqarfiusumi ilaqutariinnut meerartalinnut atugassarititaasunik pitsanngorsaataasussanik suliniutinik assigiinngitsunik eqqussisoqarpoq, matumani makku ilanngullugit:

- naartunermi sulinngiffeqarsinnaatitaanerup sapaatit akunnerinik marlunnik sivitsorneqarnera,
- arnanut illoqarfigisamik avataanut erniartortinneqartunut sulinngissinnaatitaaneq,

- angajoqqaat sulinnigiffeqarnermi nalaani meeqqamik annaasaqartut, sapaatit akunnerini 4-ni sulinnigissinnaatitaaleri, kiisalu
- angajoqqaat suaassuseqatigiit inatsisitigut inissisimanerisa pitsaanerulersinneqarnera.

Tamatuma saniatigut sulinnigiffeqarnerup meeraq peqatigalugu ingerlanneqarnissaa siunnersuutikkut piimasaqaatigineqarneratigut, meeqqanut pitsaanerususaaq suli ukkatarineqarnerulissaaq.

Ataatsimut isigalugu Inatsisartut inatsisaannik maannamut atuuttumik allanngortitsinerit annertuut pineqarmata Inatsisartut inatsisissaannik nutaarluinnarmik siunnersuuteqartoqarpoq.

## **2. Siunnersuummi immikkoortut pingaarnerit**

### **2.1 Ullumikkut sulinnigiffeqartarnermut malittarisassat**

Meerartaarnermut atatillugu sulinnigiffeqarnermut atatillugu sulinnigiffeqarsinnaatitaaneq, angajoqqaatut sulinnigiffeqarsinnaatitaaneq kiisalu meerartaarnermut atatillugu ullormusiaqarsinnaatitaaneq ullumikkut Naartunermi, erninermi meeravissartaarnermilu sulinnigiffeqartarneq ullormusiaqartarnerlu pillugit Inatsisartut inatsisaat nr. 14, 7. december 2009-meersoq, Inatsisartullu Inatsisaani nr. 26, 28. november 2019-imeersumi allanngortinneqartumi aalajangersarneqarput.

1-mik erninermi piffissaa erniviusussatut naatsorsuutigineqartoq sioqqullugu sapaatit akunnerini 2-ni kiisalu erninerup kingorna sapaatit akunnerini 15-ini arnaq sulinnigiffeqarsinnaatitaavoq. 2-nnik erninermi imaluunniit amerlanerusunik ataatsikkut erninermi erninerup kingorna sapaatit akunnerini 19-ini anaanaasoq sulinnigiffeqarsinnaatitaavoq.

Ataataasut sapaatit akunnerini 3-ni sulinnigiffeqarsinnaatitaapput.

Meeqqamik nalusaminnik Kalaallit Nunaanneersumit meeravissartaartut, meeqqap tigusissaa sioqqullugu sapaatip akunnerani 1-imi sulinnigissinnaatitaapput. Meeqqamik Kalaallit Nunaata avataani najugalimmik meeravissartaartut, meeqqap tigusissaa sioqqullugu sapaatit akunnerini 3-ni sulinnigissinnaatitaapput.

Meeqqap 1-ip tiguneqarnerata kingorna angajoqqaajusup aappaa sapaatit akunnerini 15-ini sulinnigiffeqarsinnaatitaavoq. Angajoqqaat meeqqamik 2-nik amerlanerusunilluunniit tigusaqarunik angajoqqaajusup aappaa sapaatit akunnerini 19-ini sulinnigiffeqarsinnaatitaavoq.

Piffissami tassani angajoqqaajusup aappaa sapaatit akunnerini 3-ni sulinnigiffeqarsinnaatitaavoq, taamaasilluni angajoqqaat ataatsikkut sapaatit akunnerini 3-ni sulinnigiffeqassapput.

Tamatuma saniatigut angajoqqaat meeqqamik 1-imik meerartaarnermi tigusinermiluunniit sapaatit akunnerini 21-ini, taamatullu aamma meeqqamik 2-nik amerlanerusunilluunniit meerartaarnermi tigusinermiluunniit sapaatit akunnerini 21-ni, angajoqqaat sulinngiffeqarnermik sulinngiffeqarsinnaatitaapput. Angajoqqaat nammineerlutik aalajangissavaat arlartik sorleq angajoqqaat sulinngiffeqassanersoq, aamma tullinnguuttarlutik angajoqqaat sulinngiffeqarsinnaapput.

Sulinngiffeqarnerup nalaani meerartaarnermut atatillugu sulinngiffeqarnermi ullormusiaqartitaasinnaanermik malittarisassat atuuttut aamma tunngassuteqarput. Angajoqqaat piffissap sulinngiffiusup aallartinnissaa sioqqullugu sapaatit akunnerini 13-ini kingullerni suliffeqarnermut attuumassuteqarsimasut piffissami sulinngiffeqarfiusumi meerartaarnermut atatillugu sulinngiffeqarnermi ullormusiaqartitaasinnaapput. Tamatuma saniatigut namminersorlutik inuussutissarsiutillit aamma taakku apparisaat inooqatigisaalluunniit ikiortaasartut, kiisalu angajoqqaat ilinniagaqartut meerartaarnermut atatillugu sulinngiffeqarnermi ullormusiaqarsinnaatitaapput.

Meerartaarnermut atatillugu sulinngiffeqarnermi akissarsiaqartoqarpat, taakku meerartaarnermut atatillugu ullormusianit 1:1-inngorlugit ilanngaatigineqassapput. Imaappoq sulinngiffeqarnermi akissarsiaqartitsisoqartillugu tiguneqartut koruunimiit koruunimut sulinngiffeqartumit ilanngaatigineqartarput. Aamma sulisitsisut sulinngiffeqarnerup nalaani akissarsiaritinneqartunut taarsiivigineqarneq ajorput. Tamanna akissarsiaqarlutik sulisartunit sulisitsisuniillu isorinnittarnermik pissutissaqalersitsisarpoq, tassami sulinngiffeqartut sulinngiffeqarnermini aningaasatigut eqqorneqannginniassammata meerartaarnermut atatillugu sulinngiffeqarnermi ullormusiat tapiissuteqartinneqarnissaat sulisitsisorpassuit kissaatigisaraluarmassuk.

Oqaatigineqareersutut periarfissaq tamanna malittarisassat atuuttut malillugit periarfissaanngilaq, tassami meerartaarnermut atatillugu sulinngiffeqarnermi ullormusiat qaavatigut akissarsianut tapiissutaajunnartut ilanngaatigineqartarmata, taamaalillunilu sulinngiffeqartoq tamatigut taamaallaat aningaasanik meerartaarnermut atatillugu sulinngiffeqarnermi ullormusianut assinginik tigusaqarsinnaasarluni. Periarfissatut allatut sulisitsisoq meerartaarnermut atatillugu sulinngiffeqarnermi ullormusianut tapiissutitaqanngitsumik utertitsivigineqanngitsumillu meerartaarnermut atatillugu sulinngiffeqarnermi tamakkiisumik akissarsiaqartitsinissani toqqarsinnaavaa.

## **2.2 Sullinniakkat**

Kalaallit Nunaanni najugaqarlutik meerartaartut tamarmik siunnersuummi ilanngunneqarput, tamanna erninermi meeravissiartaarnermiluunniit atuuppoq. Inuit meeqqamik paarisassaminnik tiguisut pillugit aalajangersakkanik siunnersuut aamma imaqarpoq.

Angajoqqaat tamarmik piffissani sulinngissinnaatitaaffiusuni- aamma sulinngiffeqarfiusinnaatitaaffiusuni sulinnginnissamik pisinnaatitaapput. Tamanna

angajoqqaat sulippata sulinngikkaluarpataluunniit atuuppoq, aamma qanoq atorfinitsinneqarsimanerat apeqqutaanngilaq.

#### *Suliffeqarfinni namminersortuni sulisut*

Suliffeqarfinni namminersortuni sulisut sulinngiffeqarnerminni akissarsiaqartinneqarnissamik siunnersuutikkut pisinnaatitaaffealissapput. Piffissani sulinngiffinni meerartaarnermut atatillugu sulinngiffeqarnermi ullormusiaqarsinnaatitaapput. Sulisoq siunnersuummit pitsaanerusumik atorfinitsinneqarnerminut atatillugu pisinnaatitaaffeqarpat, taava taakku attatiinnarneqassapput.

Tamatuma peqatigisaanik meerartaarnermut atatillugu sulinngiffeqarnermut aningaasaateqarfimmik pilersitsisoqassaaq, namminersorlutillu sulisitsisut sulisoqarnermut akitsuut aqutugalugu tassunga akiliisassapput. Suliffeqarfinni namminersortuni sulisoq sulinngiffeqalerpat, taava namminersorluni sulisitsisoq meerartaarnermut atatillugu sulinngiffeqarnermut aningaasaateqarfimmit sulinngiffeqartumut akissarsianut aningaasartuutiminik utertitsivigineqarnissamik pisinnaatitaassaaq.

Suliffeqarfinni namminersortuni sulisut pisinnaatitaaffii immikkoortumi 2.2.1-imi erseqqinnerusumik allaaserineqarput.

#### *Pisortani sulisut*

Pisortani sulisut, matumani qallunaat naalagaaffianni sulisut ilanngullugit, meerartaarnermut atatillugu sulinngiffeqarnermi akissarsiaqartinneqarnissamik pisinnaatitaanngillat, kisianni isumaqatigiissutit malillugit atorfinitsitaanermiluunniit pissutsit allat malillugit akissarsiaqartinneqarnissamik pisinnaatitaaffeqanngikkunik, meerartaarnermut atatillugu sulinngiffeqarnermi ullormusiaqartinneqarnissamik pisinnaatitaaffik attatiinnassavaat.

Pisortani sulisut pisinnaatitaaffii immikkoortumi 2.2.2-mi erseqqinnerusumik allaaserineqarput.

#### *Namminersorlutik inuussutissarsiuteqartut*

Namminersorlutik inuussutissarsiuteqartunut malittarisassat ingerlateqqinneqassapput. Namminersorlutik inuussutissarsiutillit taakkulu aapparisaat inooqatigisaalluunniit ikiortaasartut, sulinnginnerminni sulinngiffeqarnerminniluunniit, aningaasarsiatik tunngavigalugit, minnerpaamik sapaatip akunneranut nalunaaquttap akunnerini 14-ini annerpaamillu sapaatip akunneranut nalunaaquttap akunnerini 40-ni meerartaarnermut atatillugu sulinngiffeqarnermi ullormusiaqartinneqarnissaminnut pisinnaatitaaffeqarput.

Namminersorlutik inuussutissarsiutillit taakkulu aapparisaat inooqatigisaalluunniit ikiortaasartut, saniatigut suliffeqartut, tamanna ilutigalugu suliffeqarfinni namminersortuni sulisut akissarsiaqartinneqarnissamut pisinnaatitaaffiit pillugit malittarisassanut ilaassapput. Taamaattoq namminersorlutik inuussutissarsiuteqartut meerartaarnermut atatillugu

sulinngiffeqarnermi ullormusianik aamma akissarsianik nalunaaquttap akunneri katillugit 40-t sinnerlugit pisinnaangilaat.

Namminersorlutik inuussutissarsiuteqartut pisinnaatitaaffii immikkoortumi 2.2.3-mi erseqqinnerusumik allaaserineqarput.

#### *Ilinniagaqartut*

Ilinniagaqartut pillugit malittarisassat ingerlateqqinneqarput. Ilinniartuunersiutit, ilinniarnermut atatillugu sungiusarnermi tapisiat imaluunniit ilinniarnermut atatillugu sungiusarnermi akissarsiat, taakkununga ilaallutik meeqqamut pilersuisussaataaffigisaminnut ataatsimut tapi, nalinginik meerartaarnermut atatillugu sulinnigiffeqarnermi ullormusianik sulinnigiffeqarnerminni sulinniginnermilu ilinniartut pisinnaatitaapput.

Ilinniartut saniatigut suliffillit, aammattaaq suliffeqarfinni namminersortuni imaluunniit pisortani sulisunut malittarisassat malillugit akissarsiaqartinneqarnissaminnut pisinnaatitaassapput. Taamaattoq ilinniartut meerartaarnermut atatillugu sulinnigiffeqarnermi ullormusianik aamma akissarsianik nalunaaquttap akunnerinik katillugit 40-nik sinnilinnik pisinnaangilaat.

#### *Inuit suliffeqarfeqarfiup avataaniittut*

Sulinngiffeqalernerup siuliani sapaatit akunnerini kingullerni 13-ini inuit sulisimangitsut, namminersorlutik inuussutissarsiuteqarsimangitsut imaluunniit ilinniartuusimangitsut, inatsit manna malillugu sulinnigiffeqarsinnaatitaassapput sulinnigissinnaatitaassallutillu, kisianni sulinnigiffeqarnerminni meerartaarnermut atatillugu sulinnigiffeqarnermi ullormusiaqarsinnaatitaanngillat akissarsiaqarsinnaanatillu. Taakkununga taarsiullugu isumaginnermi ikiorsiissutinik allanik pisinnaatitaapput, matumani assersuutigalugu siusinaartumik pensionisiat imaluunniit pisortanit ikiorsiissutit.

### **2.2.1 Suliffeqarfinni namminersortuni sulisut**

#### *Sulinngiffeqarnermi akissarsiaqarneq*

Suliffeqarfinni namminersortuni sulisut sulinnigiffeqarnerminni akissarsiaqartinneqarnissamik siunnersuut aqutigalugu pisinnaatitaaffeqalissapput. Aallaaviatigut sulisup sulinnigiffeqarnerminni nalinginnaasumik akissarsiaasa 80%-iinik sulisitsisut akiliinissaminnik siunnersuutikkut pisussaaffilerneqarput.

Qaffasinnerpaamik akigititamit qaffasinnerusumik sulisitsisoq nalunaaquttap akunneranut akissarsiaqartitsinissaminut pisussaaffeqanngilaq, aamma tamassuma akissarsiaqartup nalinginnaasumik akissarsiami 80%-iinit minnerusumik tigusinissanik kingunerissagaluarpagu. Qaffasinnerpaamik akigititap 2021-imi 125 kr.-imut aalajangerneqarnissaa naatsorsuutigineqarpoq.


Taamaakkaluortoq tamassuma akissarsiaqartup nalinginnaasumik akissarsiami 80%-iinit annerusumik tigusinissaanik kinguneqassagaluarpalluunniit, meerartaarnermut atatillugu sulinngiffeqarnermi ullormusianut akigititamit appasinnerusumik sulisitsisoq nalunaaquttap akunneranut akissarsiaqartitsinissaminut akiliisinnaangilaq.

Meerartaarnermut atatillugu ullormusianut akigititaq tassaavoq nalunaaquttap akunneranut 98,27 kr. (1. aprili 2020-miit).

Qulaani meerartaarnermut atatillugu ullormusianut akigititaq aallaavigalugu, akissarsiaqartoq nalinginnaasumik nalunaaquttap akunneranut 98,27 kr.-imik akissarsisartoq, nalunaaquttap akunneranut 98,27 kr.-inik akilerneqarnissaminut pisinnaatitaassaaq, aamma tamanna akissarsiat nalinginnaasut 100%-erigaluarpaguluunniit.

Sulinngiffeqartoq sulinngiffeqalinnginnermi akunnermut 115 kr.-inik amerlanernilluunniit akissarsiaqarsimappat, taava sulinngiffeqarnermi akissarsiat ikinnerpaamik maannamut akissarsiat 80 %-erissavaat taamaammallu nalunaaquttap akunneranut meerartaarnermut atatillugu ullormusianut akigititamit qaffasinnerusumik akissarsiaqartinneqassalluni.

Assiliartami ataani takuneqarsinnaasumi meerartaarnermut atatillugu ullormusianut akigititaq nalunaaquttap akunneranut 98,27 kr.-iusoq aamma akigititaq qaffasinnerpaaffissaa 125 kr.-iusoq aallaavigineqarput.



Meerartaarnermut atatillugu sulinngiffeqarnermut aningaasaateqarfimmut suliffeqarfeqarfinni namminersortuni akissarsiaqartut tamarmik ilaatinneqarput. Uani ullup ilaannaani sulisartut piffissarlu tamaat sulisartut pineqarput. Ullup ilaannaani sulisartut nalunaaquttap akunneri suliffigisamik nalingi akissarsiarissallugit pisinnaatitaaffigaat.

Akissarsiaqartoq piffissaq aalajangersimasoq sulisuusimanngippat, sulinngiffeqarnermi akissarsiat sapaatit akunneri kingulliit 13-it sulisimanermi akunnerit amerlassusaat



tunnngavigalugit naatsorsorneqassapput, tassanili Inatsisartut inatsisaat malillugu piffissat feeriarfiusut, nioqutissiassaaleqineq, maskiinaq ajoqusersimanera silalu pissutigalugu suliffeqannginneq, naatsorsuutigineqarsimanngitsunilluunniit assigisaanik pisoqartillugu, sivikitsumik pikkorissarnerit akissarsiaqarnanilu ilinniaqinnerit, aamma piffissaq akissarsiaqartup suliffeqarfeqarfimmiissimannginneri naatsorsuinermi ilanngunneqassanngillat.

Isumaqatigiissutit imaluunniit isumaqatigiissutit atorfilimmut siunnersuummit pitsaaneruseqarfiusut, siunnersuummit atorunnaarsinneqassanngillat. Atorfilik sulinngiffeqarnermini tamarmiusumi ilaannaaniluunniit tamakkiisumik akissarsiaqartinneqarnissamik pisinnaatitaasoq, tamakkiisumik akissarsiaqartinneqarnissamik pisinnaatitaaffini pigiinnassavaa, aamma akigititap qaffasinnerpaaffissaa qaangeraluarpaguluunniit.

*Sulisitsisunut namminersortunut meerartaarnermut atatillugu sulinngiffeqarnermut aningaasaateqarfik*

Siunnersuut aqutitigalugu suliffeqarfeqarfinni namminersortuni meerartaarnermut atatillugu sulinngiffeqarnermut aningaasaateqarfimmik pilersitsisoqassaaq. Suliffeqarfeqarfinni namminersortuni suliffeqartunut meerartaarnermut atatillugu sulinngiffeqarnermut aningaasaateqarfik assigiimmik pisussaaffeqarluni naligiissaarisarnissamut aningaasaateqarfiuvoq, sulisitsisut tamarmiusut akornanni sulinngiffeqarnerup nalaani akissarsianut aningaasartuutit naligiinneruseqarfiuvoq, taamaalilluni suliffeqarfeqarfinni namminertortuni akissarsiallit sulisitsisullu sulinngiffeqarnerup nalaani akissarsiaqartinneqarnissamik akissarsianullu aningaasartuutit pillugit utertitsivigineqarnissamik pisinnaatitaaffimmik ilaatinneqalissallutik.

Sulisitsisut namminersortut tamarmik sulisoqarnermut akitsuummik akiliinissaminnut pisussaaffeqartut meerartaarnermut atatillugu sulinngiffeqarnermut aningaasaateqarfiup malittarisassaanut ilaatinneqassapput. Sulisitsisunut ilaatinneqartunut meerartaarnermut atatillugu sulinngiffeqarnermut aningaasaateqarfimmut ilaanissaq peqqussutaavoq.

*Akissarsianut aningaasartuutit utertitsineq*

Sulisunut sulinngiffeqartunut akissarsianut aningaasartuutit sulisitsisup qinnuteqarnermigut meerartaarnermut atatillugu sulinngiffeqarnermut aningaasaateqarfimmit utertissinnaavai.

Aningaasat utertinneqartussat amerlassusaat siunnersuummi sulinngiffeqarnerup nalaani sulisitsisup akiligassaatut pisussaaffiliunneqartut assigaat.

Akigititat minnerpaaffissaata qaffasinnerpaaffissaatalu iluanni akissarsiap nalinginnaasup 80%-iilik sulisitsisoq akissarsiaqartitsiguni, taamaalilluni akissarsianik tunniunneqartunik tamakkiisumik utertitsivigineqassaaq. Sulisitsisoq akissarsiaqartitsineruguni, aningaasartuutaaneruseqarfiuvoq sulisitsisup nammineerluni akilissavai.

*Meerartaarnermut atatillugu sulinngiffeqarnermut aningaasaateqarfiup aningaasalersorneqarnera*

Ilaatigut sulisitsisut akiliutaannik sulisoqarnermut akitsuut aqutigalugu akilerneqartunik, ilaatigullu namminersortuni sulisunut meerartaarnermut atatillugu sulinngiffeqarnermi ullormusianut massakkut aningaasartuutaasartunut naapertuuttunik, Namminersorlutik Oqartussanit ukiumoortumik aningaasaliissuteqartarnikkut, meerartaarnermut atatillugu sulinngiffeqarnermut aningaasaateqarfiup aningaasartuutai aningaasalersorneqassapput.

Meerartaarnermut atatillugu sulinngiffeqarnermut aningaasaateqarfiup aningaasarsiai aningaasaateqarfiup ingerlataanut atatillugu aningaasartuutitut tamanut matusissutaasassapput, matumani utertitsisarnernut, allaffissornermut il.il.

Aningaasaateqarfimmi sinneqartoorutaajunnartut ukiumut aningaasanut inatsiseqarfiusumut tulluuttumut nuunneqartassapput. Aningaasaateqarfik, aningaasaateqarfiup ingerlaavartumik ingerlanneqarneranut pisariaqartinneqartut saniatigut, aningaasanik katerseqqusaanngilaq.

Sulisitsisut akileeqataassutaat Akileraartarnermut Aqutsisoqarfimmit (AKA) sulisoqarnermut akitsuut peqatigalugu akileeqquneqartassapput, Akileraartarnermullu Aqutsisoqarfimmit meerartaarnermut atatillugu sulinngiffeqarnermut aningaasaateqarfimmut nuunneqartassallutik.

*Meerartaarnermut atatillugu sulinngiffeqarnermut aningaasaateqarfimmi ingerlatsineq*

Meerartaarnermut atatillugu sulinngiffeqarnermut aningaasaateqarfik siulersuisunit aqunneqassaaq, taakkulu allattoqarfimmi meerartaarnermut atatillugu sulinngiffeqarnermut aningaasaateqarfiup ingerlanneqarnissaanut pisariaqartinneqartumik paasisimasaqarluartunik inuttaqartussamik pilersitsissapput. Meerartaarnermut atatillugu sulinngiffeqarnermut aningaasaateqarfimmi allaffissorneq avataaneersunik suleqateqarluni pisinnaavoq.

Siulersuisut tassaassapput siulersuisoq 1, siulersuisunullu ilaasortat 4; katillugit ilaasortat 5. Ilaasortat tamarmik 5-sut Naalakkersuisunit toqqarneqassapput, taakkua ilaat 4 suliffeqarfeqarfimmi illuatungeriinnit innersuussinerup kingorna toqqarneqassallutik.

### **2.2.2 Pisortani sulisut**

Pisortani sulisut amerlanerpaat piffissami matumani sulisut isumaqatigiissutertik malillugu sulinngiffeqarnerminni akissarsiaqartinneqarnissamut ilanngunneqartut, Namminersorlutik Oqartussani kommuninilu sulisut pillugit pisortani atorfinitsinneqarnermi atugassarititaasut misissorneqarnerisa takutippaat. Pisortani sulisut, isumaqatigiissut malillugu sulinngiffeqarnermi akissarsiaqartinneqarnissamik pisinnaatitaanngitsut, meerartaarnermut atatillugu sulinngiffeqarnermi ullormusiaqartitsinermut akigititap assingajaanik nalinginnaasumik akissarsiaqartinneqartarput.

Taamaamat pisortani sulisunut aningaasaateqarfimmik imaluunniit naligiissaarinissamik aaqqissuussinermik pilersitsisoqarnissaa akilersinnaangitsoq takuneqarsinnaasimavoq.

Pisortani sulisut isumaqatigiissutertik malillugu meerartaarnermut atatillugu sulinngiffeqarnerminni akissarsitinneqarnissaminnik pisinnaatitaangitsut, suli meerartaarnermut atatillugu sulinngiffeqarnermi ullormusiaqartinneqarsinnaapput.

### **2.2.3 Namminersorlutik inuussutissarsiuteqartut**

Namminersorlutik inuussutissarsiutillit taakkulu aapparisaat inooqatigisaalluunniit ikiortaasartut, siunnersuut manna aqqutigalugu sulinngiffeqarnerminni suli meerartaarnermut atatillugu sulinngiffeqarnerminni ullormusiaqarsinnaapput. Namminersorlutik inuussutissarsiuteqartunut malittarisassat allanngortinngingajalluinnarlugit ingerlateqqinneqarput.

Namminersorlutik inuussutissarsiutillit taakkulu aapparisaat inooqatigisaalluunniit ikiortaasartut, aningaasarsiatik tunngavigalugit, minnerpaamik sapaatip akunneranut nalunaaquttap akunnerini 14-ini annerpaamillu sapaatip akunneranut nalunaaquttap akunnerini 40-ni meerartaarnermut atatillugu sulinngiffeqarnermi ullormusiaqartinneqarnissaminnut pisinnaatitaaffeqarput.

Namminersorlutik inuussutissarsiutillit, namminersorlutik inuussutissarsiutimik saniatigut suliffeqarnermikkut akissarsiaqartinneqartut, siunnersuut manna aqqutigalugu akissarsiaqartunut allanut atugassaritinneqartut assigalugit sulinngiffeqarnerminni akissarsiaqarnissamut pisinnaatitaassapput. Taamaattoq namminersorlutik inuussutissarsiuteqartut meerartaarnermut atatillugu sulinngiffeqarnermi ullormusianik aamma akissarsianik nalunaaquttap akunneri katillugit 40-t sinnerlugit pisinnaangilaat.

Inatsisartut inatsisaat manna aqqutigalugu namminersorlutik inuussutissarsiuteqartunut meerartaarnermut atatillugu sulinngiffeqartarnermi naligiissaarinermik aaqqissuussinermik avaqqunneqarsinnaangitsumik eqqussisoqassanngilaq. Tamanna ilaatigut Danmarkimi misilittakkanik pissuteqarpoq, tassani meerartaarnermut atatillugu naligiissaarinermik avaqqunneqarsinnaangitsumik aaqqissuussineq 1. januar 2014 eqqunneqarmat, taannalu namminersorlutik inuussutissarsiuteqartunit akiliisarnikkut aningaasalersorneqarpoq.

Aaqqissuussinerli piffissami sivikitsuinnarmi ingerlavoq 2016-imilu 1. aprilimi atorunnaarsinneqareerluni. Ulluinnarni ingerlanneqalernerani namminersorlutik inuussutissarsiutillit killilissallugit ajornartorujussuusimasoq paasinarsisimavoq, tassami aaqqissuussinermut akileeqataassutinik akileeqqusinerup siulliup kingunerisimammagu inunnit akileeqataassummut akileeqqusissummik tigusaqarsimasunit saaffiginnissuterpasuarnik tigusaqartoqarsimanera, taakkumi naak inuit pineqartut oqaatsip nalinginnaasumik paasineqartarneratut namminersorlutik inuussutissarsiuteqartut taaneqarsinnaangikkaluarlutik akileeqqusissummik pisimammata. Tamatumani ilaatigut

pineqarput soraarnerussutisiallit qinersinernut atatillugu nakkutilliisuusimasut, ilinniartullu oqalugiarsimasut, taamaalillutillu amerlanngitsunik B-nik aningaasarsiaqarsimasut.

### **2.3 Meerartaarnermut atatillugu sulinngiffeqarnermi ullormusiaqarsinnaatitaaneq**

Meerartaarnermut atatillugu sulinngiffeqarnermi ullormusianut malittarisassat atuuttut, mikisualuit eqqaassanngikkaanni, ingerlateqqinneqarput. Taamaattoq meerartaarnermut atatillugu sulinngiffeqarnermi ullormusiaqarsinnaasutut sullinniarneqartut ikilissapput. Angajoqqaat ullumikkut meerartaarnermut atatillugu sulinngiffeqarnermi ullormusiaqartut 45% missaat, suliffeqarfimmi namminersortumi atorfeqarput. Taakku Inatsisartut inatsisaat malillugu sulinngiffeqarnerminni akissarsiaqarsinnaanermut nuunneqassapput.

Ilinniartut namminersorlutillu inuussutissarsiuteqartut maannamut pingaarnertut meerartaarnermut atatillugu sulinngiffeqarnermi ullormusiaqarsinnaatitaanissaat atuutiinnassaaq.

Ilinniartut namminersorlutillu inuussutissarsiutillit ilinniarnermik imaluunniit namminersortutut inuussutissarsiummik ingerlatamik saniatigut sulisartut meerartaarnermut atatillugu sulinngiffeqarnermi ullormusiaqarsinnaallutillu sulinngiffeqarnerminni akissarsiaqarsinnaatitaassapput.

### **2.4 UPA2019/53-imi Inatsisartut aalajangernerata atuutilersinneqarnera**

Matuma saniatigut arnat naartusut erninissaannut sapaatip akunneri sisamaannanngortut tagginneqarneraniit naartunerminnut atatillugu sulinngiffeqartalernissaat pillugu malittarisassat atuuttut allannguutissaanik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuutip Inatsisartunit akuersissutigineqarnera atuutilersinneqarpoq.

### **2.5 Angajoqqaat sulinngiffeqarsinnaanerat nikisinneqarsinnaasoq**

Angajoqqaat sulinngiffeqarnerini sapaatit akunneri kingulliit 4 nikisinneqarsinnaanerat siunnersuutikkut aallarnarniarneqarpoq. Taamaalilluni akissarsiaqartup sulisitsisuni isumaqatigalugu sapaatit akunneri kingulliit imaluunniit taakku ilaat kingusinnerusukkut tigusinnaavai, imaluunniit piffissap ilaannaa sulinissi aallartissinnaavaa sulinngiffeqarfissarlu atorneqanngitsoq kingusinnerusukkut tigusinnaallugu.

### **2.6 Naartunermi, erninermi meeravissiarthaarnermilu sulinngiffeqartarneq pillugu malittarisassat atuuttut naleqqussarneqarnerat**

*Arnat najugaqarfigisamik avataanut erniartortussatut innersuunneqartut*

Sulinngiffeqarnermut malittarisassani atuuttuni, nakorsat suliannut atatillugu kaammattuuteqarnerat tunngavigalugu, arnat najugaqarfigisamik avataanut erniartortussatut innersuunneqartut eqqarsaatigineqarsimannigillat.

Arnat ilaat suli sulinngiffeqarnissartik aallartinnigutsoq ernivissaminnut aallartariaqartarput.

Arnat ilaat suliffiminni unammilligassaqartarmata, tamatuma malitsigisimavaa, tassami ernivissaq naatsorsuutigineqartoq sioqqullugu sapaatit akunneri 2 sioqqullugit sulisitsisut pissutissaqartumik sulinngissinnaatitsinissamut pisussaaffeqarsimannimmata.

Taamaattumik siunnersuutikkut arnat ullormiit erniartorlutik aallarfirminniit sulinnginnissamut pisinnaatitaalerput. Tamanna peqatigalugu isumaqatigiissut imaluunniit atorfeqartitaanermi atugassarititaasut malillugit akissarsiaqarsinnaatitaannikkuni, arnaq meerartaarnermut atatillugu sulinngiffeqarnermi ullormusiaqarsinnaatitaassaaq.

Arnat qanoq amerlatigisut angerlarsimaffiup avataani erniartortussatut innersuunneqartartut siunnersuutikkut allanngortinneqassanngillat. Taamaattumik arnat qanoq amerlatigisut suliffiminniit sulinnginnissaq piumannaneraat, siunnersuutikkut allanngortinneqarnissaa naatsorsuutigineqanngilaq.

Innersuunneqarnek tunngavigalugu arnap sulinngittariaqarnera pissutissaqarani sulinnginnertut isigineqannginnissaa siunnersuutip malitsigissavaa. Siunnersuut aqutigalugu inatsimmik tunngaveqartumik naartusut sulinngissinnaaneq pisinnaatitaaffigilissavaat, taannalu sulisitsisut arnamut angalasumut ajoqutinngorlugu avaqqussinnaanngilaa.

*Angajoqqaat sulinngiffeqarnerminni meeqqamik annaasaqartut.*

Ullumikkut malittarisassat malillugit angajoqqaat erninerup kingorna sapaatit akunneri siulliit 15-it aamma 19-it iluanni meeqqamik annaasaqartut sulinngiffeqarnerminnik attassiinnarsinnaatitaapput.

Meerarli angajoqqaatut sulinngiffeqarnerup nalaani toquppat, taava piffissaq sulinngiffeqarsinnaatitaaffik, angajoqqaat sulinngissinnaatitaanerat ilanngullugu, ulloq taanna atorunnaassaaq.

Taamaattumik angajoqqaanut sulinngiffeqarnermi meeqqamik annaasaqartunut sapaatit akunnerini 4-ni sulinngissinnaatitaaneq eqqunneqassaaq. Erninerup kingorna sapaatit akunnerisa 15-it 19-illu siulliit iluanni sulinngiffeqarnerup ingerlatinneqarnerqarsinnaanera allanngortinneqassanngilaq.

Meeqqat 1-imik ukioqalinnginnerminni ukiumut 5-init 7-inut toqusartut Kalaallit Nunaanni Naatsorsueqqissaartarfimmit kisitsisit takutippaat. Taakku affaasa missaat tassaapput meeqqat inunngornermik kinguninngua toqusut. Siunnersuummi inuit pineqartut amerlanaviannngillat, angajoqqaanulli meeqqaminnik annaasaqartunut tamanna inatsisitigut inissisimanerannik annertuumik pitsanngoriaataassaaq.

*Angajoqqaat suiaaqatigiissut*

Ullumikkut malittarisassat malillugit nalunaarsugaasumik aapparizat aapparizap meeraata meeravissiarineqarnerani meerartaarnermut atatillugu sulinnigiffeqarnermi sulinnigiffeqarsinnaatitaapput. Kisianni malittarisassat meeravissiararnermut malittarisassanut naapertuutinngillat, taamaattumillu meeravissiararnerq aatsaat naammassineqarsinnaasarluni meeraq pingasunik qaammateqaleraangat.

Taamaattumik aappariinnut suaiaqatigiinnut malittarisassat allanngortinneqarput.

Siunnersuummi “ataataasoq” “ataataasoq imaluunniit anaanaaqataasoq”-mut allanngortinneqarpoq. Taamaaliornerup siunnersuut manna malillugu arnat anaanaaqataasut ataataasutulli pisinnaatitaaffeqalersillugillu pisussaaffeqalersissavai.

Danmarkimi Børnelov-ip 2013-imi allanngortinneqarneratigut anaanaaqataassuseq eqqunneqarpoq. Massakkuugallartillugu anaanaaqataassuseq pillugu malittarisassat Kalaallit Nunaanni eqqunneqanngillat.

Kalaallit Nunaanni “anaanaaqataassuseq” pillugu tunngaviusumik paasisimanninnerup siunnersuutikkut eqqunneqarnissaa pineqanngilaq. Taamaammatt meeqqamut anaanaaqataasutut meerartaarnermut atatillugu sulinnigiffeqarnissamut pisinnaatitaassaguni arnaq meeqqamut anaanaaqataasutut inatsit alla malillugu nalunaarsugaasimassaaq.

Siunnersuummi matumani anaanaaqataasup sulinnigiffeqarnermi sulinniginnermilu siunnersuut manna malillugu pisinnaatitaaffii taamaallaat pineqarput.

Naalagaaffeqatigiinnermi killeqarfinni aporfii atorunnaarsinneqarnissaat allannguummi siunertarineqarpoq, taamaalilluni Danmarkimi Savalimmiuniluunniit arnaq anaanaaqataasutut akuerisaasimasooq, aamma Kalaallit Nunaanni sulinnigiffeqarnissamut sulinniginnissamullu pisinnaatitaaffeqalissalluni. Massuma saniatigut inatsisiliornerup siunissami atornerqarsinnaanissaanik qulakkeerinninnermik allannguneq siunertaqarpoq, taamaalilluni Inatsisartut inatsisaat manna siunissami Kalaallit Nunaanni anaanaaqataassuseq eqqunneqassappat eqqunneqarnissaanut naleqqussarneqareerpoq.

Inatsisiliornikkut killiliussat iluanni angajoqqaanut aappariinnut angutaannarnut taamaaqataanik pisinnaatitaaffiliinissaq ajornarsimavoq.

Malittarisassat ullumikkut atuuttut malillugit arnaq ernisoq meeqqap anaanaatut aamma nalunaarsorneqassaaq. Taamaattumik erninnermi kinarpiaq anaanaanersooq aalajangersarneqareertarpoq, anaanaassuserlu taanna aatsaat meeravissiarannortitsinikkut, meeraq 3-nik ukioqalerpat aatsaat pisinnaasukkut, inangerneqassaaq.

Taamaalilluni taamaaqataanik angutinut angajoqqaat 2-nnut taamatut pisinnaatitaaffiliigaluaraanni meeravissiararnermut malittarisassanut taamaaliorneq

akerliussaaq, naammassineqarsinnaananilu anaanaasup sulinnigiffeqarsinnaatitaanerani ingiaanermik.

*Sulinnigiffeqarneq meeraq peqatigalugu ingerlanneqassaaq*

Siunnersuut sulinnigiffeqarnerup aallaavittut meeraq peqatigalugu ingerlanneqarnissaanik nutaatut aalajangersagartaqarpoq. Tamannali siunnersuummi §§ 16- 18 malillugit, meeqqanut napparsimavimmut unitsinneqartunut angajoqqaanut, imaluunniit angajoqqaanut erninerup kingorna sapaatit akunnerini siullerni 15-ini aamma 19-ini meeqqaminnik annaasaqartunut atuutinngilaq.

Inatsisartut inatsisaat pingaarnertut meeqqat isiginnittariaasaat aallaavigalugu atuarneqassaaq, aamma pingaarnertut sulinnigiffeqarneq meeqqap paaqqutarineqarneranut isumassorneqarneranullu atorneqassalluni.

Angajoqqaat sulinnigiffeqartut aallaavittut ullut tamaasa meeqqamut attaveqarnissaat aalajangersakkap malitsigissavaa.

Aalajangersagaq ima killiliitigisumik nassuiarneqassanngilaq, assersuutigalugu angajoqqaajusup arlaata ulluni marlussunni piniariarsinnaanissaa imaluunniit angajoqqaat sapaatit akunnerisa naanerani meeqqaminnik paarisitsisinnaanissaat inissaqassanani.

Angajoqqaat inatsisitigut innarlitsaaliugaanerak akigalugu aalajangersagaq atuutilersinneqassanngilaq, matumani nammineq inuuneqarnerup ataqqineqarnissaa ilanngullugu. Taamaattumik aalajangersagaq aallaavittut pisuni erseqqilluinnartuni aatsaat atorneqartassaaq, assersuutigalugu meeraq illoqarfimmi nunaqarfimmiluunniit angajoqqaaminit allaanerusumi najugaqarpat, imaluunniit ataataasup kissaatiginngippagu meeqqamut attuumassuteqannginnissaani, tamatumalu malitsigisaanik ataataassutsini akueriumanngippagu.

*Meeqqamik paarisassamik inissiinermi sulinnigiffeqartarneq pillugu Namminersorlutik Oqartussat nalunaarutaat nr. 3, 26. februar 2010-imeersoq*

Ilaqutariit paarisartut meeqqamik paarisassaminnik tigusinermi sulinnigiffeqarsinnaanerak pillugu aalajangersakkat ullumikkut Meeqqamik paarisassamik inissiinermi sulinnigiffeqartarneq pillugu Namminersorlutik Oqartussat nalunaarutaat nr. 3, 26. februar 2010-imeersumi aalajangersarneqarput.

Inatsisip matuma atuutilersinneqarnerani nalunaarut taanna atorunnaarsinneqassaaq nalunaarullu nutaaq suliarineqarumaarpoq.

**2.7 Angajoqqaanut aningaasaqarniarnikkut pissutsit pillugit pitsanngoriaatit allat**  
Angajoqqaanut piffissami sulinnigiffeqarfiusumi appasissunik akissarsiaqartunut pissutsit siunnersuutikkut pitsaanerulersinneqassapput.

Sulinngiffeqarnermi akissarsiaqarsinnaatitaaneq meerartaarnermulluunniit atatillugu ullormusiaqarsinnaatitaaneq piffissaq sulinnigiffeqarfiusoq sioqqullugu sapaatit akunnerini kingullerni 13-ini nalunaaquttap akunneri pineqartup suliffigisimasai tunngavigalugit naatsorsorneqartarput. Taamaattumik nalunaaquttap akunnerinik naatsorsuineri annikitsuinnarmik naatsorsuiffigineqartunik, taamaattumillu sulinnigiffeqarnerup nalaani annikitsumik aningaasarsiaqartussanik aamma aningaasat naammattusaarnissaannut ajornakusooruteqartussanik angajoqqaqarsinnaavoq.

Malittarisassat ullumikkut atuuttut malillugit nalunaaquttap akunnerinik naatsorsuineq nalunaaquttap akunneri pineqartup suliffigisimasai, kiisalu akissarsiaqarluni sulinnigiffeqarfigisimasai imaluunniit sulinnigiffeqarnermi ajunngitsorsiaqarluni sulinnigiffeqarfigisimasai, suliament atatillugu pikkorissarnernut peqataaffigisimasai, aamma suliffeerunnermi ikiorsiissutinik pisinnaatitaasimanera aallaavigalugit pisarpoq.

Siunnersuutikkut nalunaaquttap akunneri pineqartup suliffigisimasai suli aallaavigineqartassapput. Piffissalli ilaat suliffiunngitsut assigiinngitsut naatsorsuineri ilaatinneqannginnissaat nutaatut eqqunneqassaaq. Tamatumani pineqarput makku pissutigalugit piffissat sulinnigiffiusut:

- Napparsimaneq, pineqartoq piffissami suliffeerunnermi ikiorsiissutinik pisinnaatitaasimanersoq apeqqutaatinnagu.
- Inatsisartut inatsisaat manna malillugu sulinniginnerit, matumani naartunermik pissuteqartumik sulinniginnerit imaluunniit arnap najugaqarfigisami avataani erninissaa pissutigalugu sulinniginnerit ilanngullugit.
- Tunisassiassaaleqineq, maskiinat unittoorneri silallu qanoq innera pisulluunniit assingusut ilimagineqarsinnaanngitsut pissutigalugit piffissap ilaani suliffissaaleqinerit.
- Sulinnigiffeqarnerit, tamanna akissarsiaqarluni akissarsiaqarnaniluunniit imaluunniit sulinnigiffeqarnermi ajunngitsorsiaqarluni ingerlanneqarsimanersoq apeqqutaatinnagu.
- Akissarsiaqarani pikkorissarluni qaffasinnerusunilluunniit ilinniagaqarnerit, suliffeqaannarsinnaanermut pingaarutillit.

Assersuutigalugu naartusut, tamakkiisumik suliinnaraluarunik nakorsat suliament atatillugu naliliinerat tunngavigalugu namminerminnik naartuminnillu ulorianartorsioertitsisinaanertik pissutigalugu piffissap ilaanna sulilersut, siunnersuut malillugu piffissami sulinnigiffeqarfigisaminni eqqorneqassanngillat, nalunaaquttap akunnerisa suliffigisimasaasa naatsorsorneqarnerani piffissap ilaannaani sulilernerq naatsorsuutigineqassanngimmat. Arnaq sapaatip akunneranut nalunaaquttap akunnerani 30-ini sulisussatut atorfinitsinneqarsimasoq, kisianni naartuneq pissutigalugu nalunaaquttap akunnerini 10-ni sulinnigittariaqartoq suli sapaatip akunneranut nalunaaquttap akunnerini 30-ini sulisimasatut nalunaarsorneqassaaq.



Taamaaqataanik angajoqqaq tunisassiassaaleqineq silaalluunniit ajornera pissutigalugit suliffimminnit angerlartinneqartariaqalersoq piffissami sulinngiffeqarfiusumi aningaasarsiaminit ilanngaanneqassanngilaq.

Meerartaarnermut atatillugu sulinngiffeqarnermi ullormusianut malittarisassat massakkut atuuttut malillugit sapaatip akunneranut nalunaaquttap akunnerinik 14-nik ikinnerusunik meerartaarnermut atatillugu sulinngiffeqarnermi ullormusiaqartitsisoqarsinnaanngilaq, aamma naak agguaqatigiissillugu piffissaq suliffiusimasoq sivikinnerusimagaluarpat. Tamanna siunnersuummi ingerlateqqinneqassaaq.

### **3. Pisortanut aningaasaqarnikkut allaffissornikkullu kingunerisassai**

#### **3.1 Pisortanut aningaasaqarnikkut kingunerisassai**

Meerartaarnermut atatillugu sulinngiffeqarnermi ullormusianut aningaasartuutit tamarmiusut 2021-mi 41,2 mio. kr.-iusussatut missingersorneqarput. Tamatuma saniatigut 2021-mit meerartaarnermut atatillugu sulinngiffeqarnermut aningaasaateqarfimmut 4.025.000 kr.-it immikkoortinneqarsimapput, erninnginnermilu sulinngiffeqarneq sivitsorneqarluni.

2020-mut aningaasanut inatsisissap akuersissutigineqareernerata kingorna meerartaarnermut atatillugu ullormusianut akigititaq 91,67 kr.-miit 98,27 kr.-mut qaffanneqarpoq.

Meerartaarnermut atatillugu sulinngiffeqarnermi ullormusianut aningaasartuutaasut qaffanneqarnissaannut naatsorsuutigineqassasoq tamatuma kinguneraa, taamaalilluni 2021-mut aningaasartuutit 44,2 mio. missaaniissasut naatsorsuutigineqarpoq.

Aningaasartuutaanerusussat taakku uunga siunnersuummut attuumassuteqanngillat, taamaattumillu aningaasartuutaanerusutut ilanngunneqarnatik.

Erninnginnermi sulinngiffeqarnerup sivitsorneqarnera 3,9 mio. kr.-it missaani akeqassasoq naatsorsorneqarpoq.

Allaffissornermik aningaasanillu akiliinermik meerartaarnermut atatillugu sulinngiffeqarnermut aningaasaateqarfiup suliaqarneranut atatillugu, meerartaarnermut atatillugu, tamanna sulinngiffeqarnermi ullormusianut aningaasartuutit ilaannik iperaassaaq, taakkualu meerartaarnermut atatillugu sulinngiffeqarnermut aningaasaateqarfimmut tapiissutitut nuunneqassapput.

Akilerartarnermut Aqutsisoqarfiup ataaniittumi Pisariillisaanermut suliniummi ERP-mi akigititat allangortinneqarnissaannut aamma pisortani sulisitsisunilu namminersortuni sulisut immikkoortinnissaannut ingerlatsivimmik nutaamik ineriartortitsisoqassaaq.

Pisariillisaanermut suliniummi ERP-mi ingerlatsivimmik ineriartortitsineq naatsorsorneqarpoq 0,9 mio. kr.-iussasoq.

Malittarisassat massakkut atuuttut malillugit meerartaarnermut atatillugu ullormusianut aningaasartuutit ima agguataarneqarsimapput, Namminersorlutik Oqartussat 90 %-ii aningaasalersorpaat kommunillu 10 %-ii aningaasalersorlugit. Tamanna siunnersuutikkut allanngortinneqassaaq, Namminersorlutik Oqartussat 100 %-imik aningaasalersuisussanngorlugu. Tamanna Namminersorlutik Oqartussat 2,2 mio. kr.-nik aningaasartuuteqarnerulerneranik nassataqassaaq, taakkuli kommuninut ataatsimoortumik tapiissutinut aningaasaliissutinut naligiissarinikkut pissaaq, taamaammallu missingersuutinut sunniuteqartussaananani.

Tamatuma saniatigut siunnersuut suliniutinik arlalinnik imaqarpoq, tamakku ataatsimut isigalugit annikitsumik aningaasartuutaanerunissaat naatsorsuutigineqarput.

Nalunaarsufiffimmi tullinnguuttumi aningaasartuutit tamarmiusut takuneqarsinnaapput. Taamaattorli meerartaarnermut atatillugu ullormusianut naatsorsuisarnermi tunngaviup allanngortinneqarnera qanoq akeqassanersoq pillugu missiliuussisoqarsinnaannginnera nangaanartoqarpoq.

Ataatsimut isigalugu siunnersuummut aningaasartuutit 2021-imut Aningaasanut inatsisimmi aningaasaliissutigineqarsimasut iluanniit aningaasartuutaassut naatsorsuutigineqarpoq.

Siunnersuummut aningaasartuutit mio. kr.-inngorlugit agguataarneqarnerat	2021	2022
Meerartaarnermut atatillugu sulinngiffeqarnermut aningaasaateqarfiup pilersinneqarnerata malitsigisaanik meerartaarnermut atatillugu ullormusianut aningaasartuutit apparneqarnerat	10,823	21,645
Namminersorlutik Oqartussat meerartaarnermut atatillugu sulinngiffeqarnermut aningaasaateqarfimmut tapiissutaat	-10,823	-21,645
Namminersorlutik Oqartussat meerartaarnermut atatillugu ullormusianik 100 %-imik aningaasalersuisunngorneranut ikaarsaariarneq	0	0
Meerartaarnermut atatillugu sulinngiffeqarnermut aningaasaateqarfimmut aningaasat immikkoortinneqartut, erninnginnermilu sulinngiffeqarnerup sivitsorneqarnera	4,025	4,025

Erninginnermi sulinngiffeqarnerup sivitorneqarnera	-3,9	-3,9
Kommunini allaffissornikkut sipaarutit	0,6	1,2
Aningaasaateqarfimmut sulisitsisut akileeqaataassutissaannik naatsorsuinnermut Pisariillisaanermut suliniummi ERP-mi ingerlatsivimmik ineriartortitsineq	0,9	0
Angajoqqaanut meeqqamik annaasaqartunut sulinngissinnaatitaaneq	-0,05	-0,05
Arnanut najugaqarfisamik avataanut erniartortussatut innersuunneqartunut sulinngissinnaatitaaneq	-0,09	-0,09
Meerartaarnermut atatillugu ullormusianut naatsorsuisarnermi tunngaviup allanngortinneqarnera	(ilisimaneqanngilaq)	(ilisimaneqanngilaq)
<b>Katillugit</b>	<b>-0,315</b>	<b>1,186</b>

*Meerartaarnermut atatillugu sulinngiffeqarnermi ullormusiat*

Suliffeqarfinni namminersortuni sulisunut meerartaarnermut atatillugu Namminersorlutik Oqartussat kommunillu aningaasartuutaat tamarmiusut 2016-imi meerartaarnermut atatillugu sulinngiffeqarnermi ullormusianut aningaasartuutit tamarmiusut 45 pct.-iisa missaannut naapertuuttut Kalaallit Nunaanni Naatsorsueqqissaartarfiup naatsorsorsimavaa. Taamaattorli paasissutissat pitsaassusiat eqqarsaatigalugu nalornissuteqarneq pissutigalugu naatsorsuineq nalorninartortaqaarsinnaavoq.

Meerartaarnermut atatillugu sulinngiffeqarnermi ullormusiat pillugit suliat aqqissuussineq maanna tunngavigalugu kommuninit suliarineqartarpoq. Pisortani sulisut pillugit meerartaarnermut atatillugu sulinngiffeqarnermi suliat 2015-imi 553-iusut aamma suliffeqarfinnit namminersortunit meerartaarnermut atatillugu sulinngiffeqarnermi suliat 518-it Kalaallit Nunaanni Naatsorsueqqissaartarfiup naatsorsorsimavaa. Immikkuullarissuni taakkunani ukiumiit ukiumut suliasat nikerartarput. Tassunga aamma ilaapput ilinniartut namminersorlutillu inuussutissarsiuteqartut pillugit meerartaarnermut atatillugu sulinngiffeqarnissamut suliat. Ilinniartut namminersorlutillu inuussutissarsiuteqartut pillugit meerartaarnermut atatillugu sulinngiffeqarnissamut suliat ukiumut 50-it 100-llu akornanniittut naatsorsuutigineqarpoq.

Suliffeqarfinni namminersortuni sulisut sulinngiffeqarnerminni akissarsiaqartinneqarnissamik siunnersuut aqutugalugu pisinnaatitaaffeqalissapput. Taamaattumik 2021-imi

meerartaarnermut atatillugu ullormusianut aningaasartuutit 1. juli 2021-imi ikaarsaarnermut atatillugu aningaasartuutit 45 %-imik apparnissaat naatsorsuutigineqarpoq, 2021-imi aningaasanngorlugit 10,823 mio. kr.-iussallutik. 2022-imi aningaasat 21,6 mio. kr.-iussapput.

*Suliffeqarfeqarfinnut namminersortunut meerartaarnermut atatillugu sulinngiffeqarnermut aningaasaateqarfik*

Meerartaarnermut atatillugu sulinngiffeqarnermut aningaasaateqarfik ilaatigut sulisoqarnermut akitsuut aqqutigalugu sulisitsisumit akilerneqartumik, sulisitsisut akiliutaannit aningaasalersorneqassaaq, ilaatigullu Namminersorlutik Oqartussanit ukiumoortumik aningaasaliissuteqartarnikkut aningaasalersorneqassalluni. Namminersortuni sulisut sulinngiffeqarnerisa nalaanni meerartaarnermut atatillugu ullormusiaqarsinnaatitaajunnaarneranni sipaarutaasut anguneqartut, Namminersorlutik Oqartussanit tapiissutit assigissavaat. Taamaammat 2021-mi Namminersorlutik Oqartussat aningaasaateqarfimmut 10,8 mio. kr.-inik aningaasaliissaaq. Taakkunanga 0,25 mio. kr.-it allattoqarfiup pilersinneqarnissaanut neqerooruteqarnissamut najoqqutassanut 1. januar 2021 akilerneqariissapput. Aningaasat 1. juli 2021-imi akiliinermi ilanngaaticineqassapput.

Sulisitsisunut namminersortunut meerartaarnermut atatillugu sulinngiffeqarnermi aningaasaateqarfimmut Namminersorlutik Oqartussanit aningaasaliissutaasussat naatsorsorneqarnerisa nalorninartoqarnerat eqqarsaatigalugu, atuineq piviusoq takuneqarsinnaalerpat aningaasartuutit aaqqivigineqarnissaat eqqarsaatigineqarpoq.

Massakkuugallartoq allaffissornikkut aningaasartuutissat qanoq annertutigissanersut eqqortumik naatsorsorneqarsinnaanngilaq. Taamaattoq sulisitsisunut namminersortunut meerartaarnermut atatillugu sulinngiffeqarnermut aningaasaateqarfiup pilersinneqarneranut ingerlanneqarneranullu aningaasartuuteqartoqassaaq, matumani sulisunut, ininut, IT atorlugu atortorissaarutinut, paasititsiniaaner- aamma ilitersuisarnernut, internettikkut quppersakkamut il.il. Tamakkununga aningaasartuutit sulisitsisunut namminersortunut meerartaarnermut atatillugu sulinngiffeqarnermut aningaasaateqarfimmi aningaasat ator- neqarsinnaasut iluannit matussuserneqassapput.

*Arnat najugaqarfigisamik avataanut erniartortussatut innersuunneqartut*

arnat arlallit ernivissamut allamut erniartortussatut innersuunneqartut, meerartaarnermullu atatillugu sulinngiffeqarnissap aallartinnginnerani aallartariaqartartut siunnersuutikkut sulinngissinnaatitaallissapput. Pisinnaatitaaffiup taassuma, piffissami tassani arnat akissarsiaqarsinnaatitaanngippata, arnat § 3, imm. 1 malillugu sulinngiffeqarsinnaanerup aallartinnessaanut meerartaarnermut atatillugu sulinngiffeqarnermi ullormusiaqarsinnaaner- mut pisinnaatitaaffilissavaa.

Arnat qassit ilaatinneqartut pillugit kisitsisinik pissarsisoqarsinnaasimannngilaq. Aallaaviatigut taamaallaat arnat ernivissamut imaatigut angalasussat sulinngiffeqarsinnaatitaanerup aallartinnginnerani aallartariaqartartut Peqqissutsimut Pitsaaliuiner- mullu Aqutsisoqarfimmi

Peqqinnissaqarfiup qullersaqarfiata nalunaarutigaa. Arnat taakku sulinnigiffeqarnissap aallartinnigitsiarnerani aallarajuttarput, taakku kingunerluutilinnik naartunatillu ernineq ajorput, taamaammallu nakorsat naliliinerat tunngavigalugu sulinnigiffeqarnissap siornatigut aallarnissaat pisariaqarani.

Aalajangersakkami arnat 80-it miss. ilaassasut missiliorneqarpoq.

Sulinnigissinnaatitaanermut pisinnaatitaaffeqarnerup aningaasatigut kingunerisassai erseqqissumik nalunaarutigineqarsinnaanngillat. Arnat taakku sulinnigiffeqarnissap aallartinnissaa sioqqullugu qanoq sivisutigisumik peqannginnissaannut innersuunneqartarnersut aamma arnat qassit isumaqatigiissutitik malillugit akissarsiaqarnissamik, taamaammallu meerartaanermut atatillugu sulinnigiffeqarnermi ullormusiaqarnissamut pisinnaatitaanersut pillugit paasissutissanik pissarsisinnaanerup ajornarsimaneranik tamanna pissuteqarpoq. Arnat taakku qanoq annertutigisumik meerartaanermut atatillugu sulinnigiffeqarnissaminnut ullormusiaannut, sulinnigiffeqalernerup aallartinniginnerani nalunaaquttap akunnerini qassini sulisimanersut apeqquataavoq. Taamaattorli aningaasartuutaanerusussat annikitsuunissaat naatsorsuutigineqarpoq. Aningaasartuutaanerusussat 90.000 kr.-it ataaniissasut qajassuartumik missiliunneqarput.

Arnat naartunerup nassataanik ajornartorsiuteqalersartut, Nuna tamakkerlugu napparsimavimmut Nuummiittumut imaluunniit Rigshospitalimut Danmarkimiittumut innersuunneqartartut, naartunerup nassataanik ajornartorsiuteqalernermik pissuteqarlutik meerartaanermut atatillugu ullormusiaqarlutik sulinnigissinnaatitaareermata uani aalajangersakkami ilaatinneqanngillat.

*Meeraq sulinnigiffeqarnerni toqppat sapaatit akunneri 4-ni sulinnigissinnaatitaaneq*  
Siunnersuutikkut angajoqqaat sulinnigiffeqarnermi meeqqamik annaasaqartut sapaatit akunnerini sisamani sulinnigissinnaatitaalerput, meerartaanermut atatillugu sulinnigiffeqarnermi ullormusianut annertunngitsumik aningaasartuuteqarnerulernermik kinguneqartussamik. Tamatumani ukiumut meeqqat 2-4-t pineqartassasut naatsorsuutigineqarpoq, ukiumut 50.000 kr.-inik aningaasartuuteqarnerunermik naleqartumik.

*Meerartaanermut atatillugu sulinnigiffeqarnermi ullormusiat naatsorsorneqarnerinut nalunaaquttap akunnerisa tunngaviusartut naatsorsorneqartarnerinut tunngaviusut allanngortinneqarnerat*

Akissarsialinnut sapaatit akunnerini kingullerni 13-ini akunnernik aalajangersimasunik suliffeqarsimanngitsunut nalunaaquttap akunnerisa suliffiusimasut naatsorsorneqartarnerat siunnersuutikkut allanngortinneqarnissaa aallartinniarnearpoq, taamaalilluni piffissat sulinnigiffiusut aalajangersimasut naatsorsuinermi ilaatinneqartarunnaarsillugit. Takku ilaatigut tassaapput naartunerup atatillugu sulinniginneq, napparsimaneq pissutigalugu suliffeqannginneq, aamma tunisassiassaaleqineq, maskiinat ajoquserneri pissutigalugit silalu pissutigalugu suliffissaaleqinerit. Tamanna annikitsumik aningaasartuuteqarnerulernermik

kinguneqassaaq. Aningaasartuutaanerusussalli missingersorneqarsinnaanngillat, tassami paasissutissat aningaasatigut kingunerisassaasa naatsorsorneqarnerannut tunngaviusinnaasut pigineqanngimmata.

### **3.2 Pisortanut allaffissornikkut kingunissai**

*Kommuninut allaffissornikkut kingunissai*

Meerartaarnermut atatillugu sulinngiffeqarnermi ullormusiaqarneq pillugu suliat ullumikkut kommuninit suliarineqartartut 45 %-iisa missaat siunissami sulisitsisunut namminersortunut meerartaarnermut atatillugu sulinngiffeqarnermut aningaasaateqarfimmut utertitsinissamik suliassanngorlugit nuunneqassasut naatsorsuutigineqarpoq.

Kommunit siunissami innuttaasunut ikittunnguanut meerartaarnermut atatillugu sulinngiffeqarnermi ullormusiaqartitsineramik akiliisassapput, matumani ilinniartut namminersorlutillu inuussutissarsiutillit, inuit sulinngiffeqalinnginnermi sapaatit akunneri 13-it sioqqullugu suliffeerussimasut aamma pisortani sulisunut sulinngiffeqarnermi akissarsisinnaatitaanngitsut ilanngullugit. Taakkua ullumikkut suliassaasartut tamarmik 55 %.-iisa missigigaat naatsorsuutigineqarpoq.

Allaffissornikkut nukit 45 %-ii ullumikkut meerartaarnermut atatillugu sulinngiffeqarnermi ullormusiaqartitsinermut atorineqartartut, kommunit allaffissornikkut sipaarutigissagaat tamanna isumaqarpoq.

Meerartaarnermut atatillugu sulinngiffeqarnermi ullormusiaqartitsisarnermik suliat 160-it sulisup ataatsip ukiumut suliarisinnaagai, kommuninit paasissutissat pissarsiat takutippaat.

2020-imi meerartaarnermut atatillugu sulinngiffeqarnermi ullormusianik suliat 1080-it kommunit suliarissagaat naatsorsuutigineqarpoq, taakkulu ukiumut sulisunik 7-it missaannik naleqarpoq.

Taamaattumik kommunini suliat sulisitsisuni namminersortuni sulisunut meerartaarnermut atatillugu sulinngiffeqarnermi ullormusianik akiliisarnernut attuumassutillit ukiumut sulisunik 3-nik missaannik naleqarpoq, taakkulu meerartaarnermut atatillugu sulinngiffeqarnermi ullormusianik suliat tamarmiusut 45 % missarivai.

Kommuninut allaffissornikkut sipaarutissaat inuup ataatsip ukiumut suliarisinnaasaasa naatsorsorneranni sulisut 3 naligaat. Taamaalilluni kommuninut ataatsimoortumik tapiissutit inuup ataatsip ukiumut suliarisinnaasaasa naatsorsorneranni sulisut 3 nalinginik ikilisinneqassapput. Meerartaarnermut atatillugu sulinngiffeqarnermut aningaasaateqarfik 2021-imi 1. juli aallartissaaq, taamaammallu 2021-imi ataatsimoortumik tapiissutit inuup ataatsip ukiumut suliarisinnaasaanik naatsorsuinerami sulisut 1,5-nik ilanngarneqassapput aamma ukiup tulliani inuup ataatsip ukiumut suliarisinnaasaanik naatsorsuinerami sulisut 3-nik ilanngarneqassallutik.

*Namminersorlutik Oqartussanut allaffissornikkut kingunissai*

Akileraartarnermut Aqutsisoqarfiup annertunerusumik allaffissulernissamik siunnersuut kinguneqassaaq.

Sulisitsisunut namminersortunut meerartaarnermut atatillugu sulinngiffeqarnermut aningaasaateqarfimmut sulisitsisut akiliutaat sulisoqarnermut akitsuutip qaffanneratigut akilersinniarneqartassaaq, aamma tamatuma kingorna meerartaarnermut atatillugu sulinngiffeqarnermut aningaasaateqarfimmut nuunneqartartussaapput.

Sulisoqarnermut akitsuut Akileraartarnermut Aqutsisoqarfimmit akiligassiissutigineqartarpoq. Aningaasaateqarfimmut akiliisitsiniarnermut aamma aningaasaaliissutinik agguaanissamut sularinnittussamik Pisariillisaanermut suliniummi ERP-mi ingerlatsivimmik ineriartortitsisoqarnissaa pissutigalugu, meerartaarnermut atatillugu sulinngiffeqarnermut aningaasaateqarfiup aallartinneqarneranut atatillugu akileraartarnermut aqutsisoqarfimmut killilimmik allaffissornermi aningaasartuutit amerlineqarnissaat siunnersuutip kingunerissavaa.

#### **4. Inuussutissarsiornermik ingerlataqartunut aningaaraqarnikkut allaffissornikkullu kingunerisassai**

##### **4.1. Inuussutissarsiornermik ingerlataqartunut aningaasaqarnikkut kingunerisassai**

Meerartaarnermut atatillugu sulinngiffeqarnermut aningaasaateqarfimmit pilersitsinikkut inuussutissarsiornermik ingerlataqartut aaqquissuussinermut sulisitsisut akileeataassutaannik akiliisalerneqassapput, taakkulu akissarsiarititat katinnerisa 2 promilliannik annertussuseqartussatut missingersorneqarput, taakkulu ukiumut 19 mio. kr.-it missigaat.

Meerartaarnermut atatillugu sulinngiffeqarnermut aningaasaateqarfimmut inuussutissarsiornermik ingerlataqartut akileeataassutaat taamaattoq inuussutissarsiorneq ataatsimut isigalugu annertuumik aningaasartuuteqarnerulernermik kinguneqarnaviannigilaq, tassami tamatumani nammaqatigiilluni agguataareqqinneq taamaallaat pineqarmat. Suliffeqarfiit ikittunik sulisullit, sulinngiffeqarsinnaatitaanermik atuinissamik naatsorsuuteqartut, suliffeqarfimmut amerlasuunik sulisulinnut sulinngiffeqarsinnaatitaanermik atuinissamik naatsorsuuteqartunut, akileeataasarumaartut naatsorsuutigineqartariaqarpoq.

Taamaattoq inuussutissarsiutinik ingerlataqartut, ataatsimut isigalugu sulisitsisunut, isumaqatigiissutit imaluunniit sulinermi atugassarititaasunut naleqqiullugu, aamma 125 kr.-it sinnerlugit nalunaquttap akunnermorsiaqartitsisunut, sulinngiffeqarnerup nalaani tamakkiisumik akissarsialinnut akissarsiaqartitsinngitsunut, annikitsumik aningaasartuuteqarnerussapput.

Massakkuugallartoq akissarsiaqartut taakku nalunaaquttap akunneranut 98,27 kr.-inik meerartaarnermut atatillugu sulinngiffeqarnermi ullormusiaqarnissaminut taamaallaat pisinnaatitaapput. Siunnersuut aqqutigalugu akissarsiallit sulinngiffeqarnerminni akissarsiamik ikinnerpaamik 80 %-ii akissarsiarisinnaalissavaat. Akissarsiaqartooq nalunaaquttap akunneranut 125 kr.-inik akissarsisartooq taamaalilluni ikinnerpaamik nalunaaquttamut ataatsimut ullumikkut ullormusianut akigititamut tunniunneqartartumit 2 kr.-inik amerlanerusunik akissarsiaqassaaq. Aningaasartuutaanerusooq taanna sulisitsisut akiliutaannit matussuserneqassaaq.

Sulisitsisooq qaffasinnerpaamik akigititaaq qaangerlugu akissarsisitsinissaminut pisussaataaangimmat, aningaasartuutaanerususaaq taanna annikitsumiitinneqassaaq.

Sulisitsisut sulisumik sulinngiffeqarneranni tamakkiisumik akissarsisitsisartut, ullumikkut akissarsiaritittakkatik tamakkiisut akissarsianut missingersuutiminnit akilertarpaat. Siunnersuut aqqutigalugu sulisitsisut taakku, qaffasinnerpaamik akigititaaq tikillugu akissarsianut akiliutigisimasaminut utertitsivigineqarsinnaangussapput. Tamatuma sulisitsisumut pineqartumut pingaarutilimmik sipaarutaanissaanik kinguneqassaaq, kisiannili inuussutissarsiornermik ingerlataqartunut ataatsimoortillugu aningaasartuutaanerusalluni. Taamatuttaaq aningaasartuutaanerususaaq taanna sulisitsisut akiliutaannit matussuserneqartassaaq.

Erninnginnermi sulinngiffeqarneq sapaatit akunnerinik 2-nik siunnersuut aqqutigalugu sivitsorneqassaaq. Tamatuma inuussutissarsiornermik ingerlataqartunut aningaasartuuteqarnerunissamik kinguneqarnissaa naatsorsuutigineqarpoq. Inuussutissarsiornermik ingerlataqartunut tamanut aningaasartuutaanerususaaq sulisitsisut aningaasaateqarfimmut akiliutigisartagassaannut tunngaviussaaq. Sulisitsisunut ataasiakkaanut sulisunut, qaffasinnerpaatut akigititamit qaffasinnerusumik akissarsitinneqarnissamik pisinnaatitaaffilinnut, kiisalu sulisunut taartaasussanut aningaasartuuteqarnerunermik kinguneqassaaq.

Siunnersuutikkut arnanut najugaqarfigisap avataanut erniartortussanut sulinngissinnaatitaaneq eqqunneqassaaq. Tamatuma inuussutissarsiornermik ingerlataqartunut taasariaqartumik aningaasartuutaanerusunissaa naatsorsuutigineqanngilaq, tassami arnamut atorfeqarnermi atugassarititaasut sulinnginnermi akissarsiaqartitsinissamut tunngavissiiingippata, piffissami peqanngiffiusumi akissarsiaqartitsinissamut sulisitsisooq pisussaaffilerneqanngimmat, taamatullu aamma arnat najugaqarfimmik avataanut erniartortussatut innersuunneqarnermik pissutigalugu sulinngitsut amerlassusiinik allannguuteqartoqarnissaa siunnersuummi naatsorsuutigineqanngimmat.

Aammattaaq angajoqqaat sulinngiffeqarnerminni meeqqamik annaasaqartut siunnersuutikkut sapaatit akunnerini 4-ni sulinngissinnaatitaallissapput. Siunnersuutilli inuussutissarsiornermik



ingataqartunut taasarialimmik aningaasartuutaanerulernissaa naatsorsuutigineqanngilaq, inuit taamatut pisinnaatitaaffimminnik atuisussat ikittuinnaasussaammata.

Taamaattorli aningaasartuutaanerusussaviit tamarmiusut eqqortumik naatsorsornissaannut kisitsisitigut paasissutissanik tunngavissanik pissarsinissaq ajornarsimavoq. Sulisitsisut akiliutaasa annertussusissaannut apeqqutaassaaq pissutsit assigiinngitsut nikerarsinnaasut, matumani meeqqat inuusartut amerlassusaat, akissarsiaqartup qanoq sivisutigisumik sulinngiffeqarnissaa aamma sulinngiffeqarnerminni qanoq akissarsiaqartinneqarnissaat ilanngullugit. Tamatuma saniatigut, meerartaarnermut atatillugu sulinngiffeqarnermut aningaasaateqarfimmik pilersitsinerup akissarsiallit ullumikkornit amerlanerusut sulinngiffeqarsinnaatitaanerminnik atuilersarnerat nunanit allanit takuneqaqqajaavoq. Taamaammata siunnersuutip massuma assinganik kinguneqarnissaa taamaassappallu qanoq annertutigisumik kinguneqarnissaa nalilissallugu periarfissaasimanngilaq. Tamatuma peqatigisaanik arnat qassit erninnginnermi sulinngiffeqarsinnaatitaanerup sivitsorneqarneranik atuisanersut nalilerneqarsinnaanngilaq.

Siunnersuut meerartaarnermut atatillugu sulinngiffeqarnermut aningaasaateqarfimmit utertitsivigineqarnissamik qinnuteqaateqarnermut taakkulu suliarinerannut atatillugu allaffissornikkut kinguneqassaaq. Qinnuteqaatit ilusissaannut piunasaqaatit nalunaarummi aalajangersarneqarumaarput, tassanilu inuussutissarsiortunut allaffissornikkut kingunerisassai minnerpaaffissaminniitinniarlugit, qinnuteqartarnerup ingerlasarnerata sapinngisamik pisariinnerpaanissaa pingaartinneqarumaarpoq.

Meerartaarnermut atatillugu sulinngiffeqarnermut aningaasaateqarfimmut sulisitsisut akileeqataassutaata akilersinniarneqartarnera allaffissornikkut kinguneqassanngilaq, sulisoqarnermut akitsuut, sulisitsisut Sulisoqarnermut akitsuut pillugu Inatsisartut inatsisaat malillugu akiligassareriigaat, aqqutigalugu akileqquneqartassammat.

## **5. Avatangiisinut, pinngortitamut inuillu peqqissusaannut kingunerisassai**

Avatangiisinut, pinngortitamut innuttaasullu peqqissusiannut kinguneqartussatut siunnersuut nalilerneqanngilaq.

## **6. Innuttaasunut kingunerisassai**

Siunnersuutip suliffeqarfeqarfimmi angutit arnallu akornanni naligiissitaanermut annertuumik pingaaruteqarnissaa nalilerneqarpoq. Arnat kinguaassiorsinnaasutut ukioqarnertik pissutigalugu namminersortut suliffeqarfeqarfianni siunissami tunulliunneqartannginnissaat meerartaarnermut atatillugu sulinngiffeqarnermut aningaasaateqarfimmik pilersitsinerup malitsigissagaa naatsorsuutigineqarpoq.

Malittarisassanut atuuttunut sanilliullugu nalinginnaasumik erseqqissaanernik aqqissuussinnermillu pitsaanerusumik siunnersuut imaqarpoq. Tamatuma malittarisassat

inissisimanerminnut pingaarutillit iserfiginissaanut innuttaasut ajornannginnerusumik periarfissaqalersissavaat.

Naartunermi sulingiffeqartarnerup sapaatit akunnerinik 2-nik sivitsorneqarnera naartusunut pitsaasumik kinguneqassaaq, taakku erninissap sapaatit akunneri 4 sioqqullugit sulingiffeqarsinnaatitaaneq aallartereersinnaassagamikku.

Siunnersuut innuttaasunut sulingiffeqartussanut pitsaasunik kinguneqartussanik suliniutinik assigiinngitsunik aamma ima qarpoq. Matumani taaneqarsinnaapput arnat najugarisamik avataanni erniartortussatut innersuunneqartut sulingissinnaatitaalernissaat, angajoqqaat piffissami sulingiffeqarfiusumi meeqqaminnik annaasaqartut sulingissinnaatitaalernissaat, kiisalu angajoqqaanut suiaaqatigiinnut atugassarititaasut pitsaanerulernerat.

Peqatigitillugu ilaqutariinnut naartunermut erninermullu atatillugu sulingiffeqartunut pilersorneqarnissamut tunngaviit pitsaanerulissapput.

#### **7. Kingunerisassat pingaarutillit allat**

Siunnersuutip pingaarutilinnik allanik kinguneqarnissaa naatsorsuutigineqanngilaq.

#### **8. Oqartussaasunut suleqatigiiffinnullu il.il. tusarniaaneq**

Siunnersuut 10. april 2019-imi [www.naalakkersuisut.gl](http://www.naalakkersuisut.gl)-imi tusarniaasarfimmi tamanut saqqummiunneqarsimavoq, tusarniaanermut atatillugu akissuteqarnissaq 15. maj 2019-imut killilerneqarluni.

Siunnersuummi ilanngussaq 1-imi tusarniaanermut akissutit oqaaseqaatitallit oqaaseqaatitai tamakkerlugit allaqqinneqarput naapertuuttumillu oqaaseqarfigineqarlutik. Tusarniaanermut akissutinut oqaaseqaatit uingasumik allanneqarput.

#### **Oqartussanut suliniaqatigiiffinnullu il.il. ilassutaasumik tusarniaaneq**

Piffissami tusarniaavigineqartumi 2019-imi 10. apriliimiit 15. maajimut tusarniaanermut akissutit tiguneqarsimasut tunngavigalugit, tamatuma malitsigisaanik siunnersuummi pingaarutilinnik allannguutinik arlalinnik allannguisoqarpoq. Tamanna pissutigalugu siunnersuut naqqitaq piffissami 1. novembari 2019-imiit 29. novembari 2019-imut ilassutaasumik tusarniutigineqarsimavoq. Siunnersuut piffissami tassani [www.naalakkersuisut.gl](http://www.naalakkersuisut.gl)-imi tusarniaasarfimmi tamanut saqqummiunneqarpoq.

Siunnersuummi ilanngussaq 2-mi tusarniaanermut akissutit oqaaseqaatitallit oqaaseqaatitai tamakkerlugit allaqqinneqarput naapertuuttumillu oqaaseqarfigineqarlutik. Tusarniaanermut akissutinut oqaaseqaatit uingasumik allanneqarput.

## Siunnersuummi aalajangersakkanut ataasiakkaanut nassuiaatit

### § 1-imut

Imm. 1-imut

Inuit qaqugukkut naartunermut erninermullu atatillugu angajoqqaatut sulinngiffeqarsinnaatitaanersut, meeravissiarthaarnissaq siunertarlugu meeqqamik paaqqtarineqartussamik tigusinermut atatillugu sulinngiffeqarsinnaatitaanersut, kiisalu meeravissiarthaarnermut atatillugu sulinngiffeqarsinnaatitaanersut aalajangersakkami killilerneqarput.

Sulinngiffeqarsinnaatitaaneq inummut pineqartumut sulinngissinnaatitaanermik kinguneqarpoq. Inunnut suliffeqartunut pineqartup suliffigisaminit sulinngissinnaatitaanera tamatuma kinguneraa. Inunnut suliffeqanngitsunut piffissami sulinngiffeqarfiusuni pineqartup suliartoqquneqarsinnaanissaa piunasaqaatigineqarsinnaanngitsoq tamatuma kinguneraa.

Inuk pineqartoq piffissami sulinngiffeqarfiusumi qanoq akissarsiaqarsinnaatitaanersoq Inatsisartut inatsisaanni kapitalini 2-mi imaluunniit 5-imi, kiisalu pineqartup atorfeqartitaanerani atugassarititaasuni aalajangersarneqarput.

Siunnersuummi sulinngiffeqarsinnaatitaaneq sulinngissinnaatitaanerlu immikkoortinneqarput.

Namminersortumi sulisuugaanni, kapitali 2 malillugu sulinngiffeqarnermi sulisoq akissarsiaqarsinnaatitaavoq. Inuit namminersortumi sulisuunngitsut isumaqatigiissut malillugu akissarsiaqarsinnaatitaapput imaluunniit kapitali 4 malillugu meerartaarnermut atatillugu sulinngiffeqarnermi ullormusiaqarsinnaatitaallutik.

Piunasaqaatit naammassineqarsimappata, kapitali 4 malillugu sulinnginnermi inuk meerartaarnermut atatillugu ullormusiaqarsinnaatitaavoq.

Assersuutigalugu arnaq akissarsialik § 5 malillugu naartunerminut attuumassutilimmik sulinngitsoq aatsaat akissarsiaqarsinnaatitaassaaq tamanna pineqartup atorfeqartitaanerani atugassarititaasuni aalajangersarneqarsimappat. Arnarli piffissami meerartaarnermut atatillugu sulinngiffeqarnermi ullormusiaqarsinnaatitaassaaq.

Nr. 1

Inatsisartut inatsisaat malillugu sulinngiffeqarsinnaatitaassagaanni Kalaallit Nunaanni aalajangersimasumik najugaqarlunilu inuit nalunaarsorsimaffiannut nalunaarsimanissaa nr. 1-imi aalajangersarneqarpoq.

Aalajangersimasumik najugaqarsimaneq imatut paasineqartussaavoq, sulinngiffeqarluni, sulinermut atatillugu angalatilluni, napparsimalluni assigisaatigulluunniit peqquteqarluni

tassani najugaqarsinnaasimanninneq eqqaassanngikkaanni, tassani aalajangersimasumik pisattallu inissisimaffigisaanni sinittarnissaq.

Nr. 2

Sulinngiffeqarsinnaatitaaneq Isumaginninnikkut isumannaallisaaneq pillugu Nunat Avannarliit isumaqatigiissutaannut imaluunniit nunat assigiinngitsut akornanni isumaqatigiissummut allamut Kalaallit Nunaannut atuuttumut inunnut ilaatinneqartunut aamma atuuttoq nr. 2-mi aalajangersarneqarpoq.

Nunat assigiinngitsut akornanni isumaqatigiissut alla assersuutigalugu taaneqarsinnaasoq tassaavoq Naalagaaffiit Peqatigiit qimaasut pillugit isumaqatigiissutaat 1951-imeersoq, tassungalu New Yorkimi tapiliussaq 31. januaari 1967-imeersoq.

Imm. 2-mut

Meeqqap erniunerata imaluunniit tiguneqarnerata kingorna sulinngiffeqarneq meeraq peqatigalugu ingerlanneqassasoq aalajangersakkami aalajangersarneqarpoq.

”Tiguneqarnera” tassaavoq piffissaq angajoqqaat meeravissiartaartut meeqqamik tigusiffiat. Meeravissiartaarnermut tunngatillugu malittarisassat allat eqqarsaatigalugit §§ 8-10 taakkunungalu nassuiaatit innersuussutigineqarput.

Sulinngiffeqartup meeqqamik najugaqateqarnissaa piunasaqaataangilaq, sulinngiffeqartulli aallaavittut ullut tamaasa meeqqamik najuisarnissaa piunasaqaataavoq.

Taamaattumik oqarasuaatikkut oqaloqatigiittarnertigut imaluunniit attaveqaqatigeriaatsit elektroniskiusut FaceTimetut Skypetulluunniit ittut aqutigalugit meeqqamut attaveqartarnissaq naammanngilaq.

Angajoqqaat ullut ataasiakkaat meeraq najornagu atoraluarpatigut sulinngiffeqarsinnaatitaaneq atorunnaassanngilaq. Taamaalilluni assersuutigalugu sulinngiffeqartup sapaatip akunnerata naanerani piniariarsinnaaneranut, imaluunniit sapaatip akunnerata naanerani angajoqqaat meeqqaminnik allanut paarsisitsisinaanerannut aalajangersagaq aporfussanngilaq.

Pineqartoq illoqarfimmi nunaqarfimmiluunniit allami meeqqap najugaqarfiginngisaani najugaqarpat, angajoqqaat aallaavittut sulinngiffeqarsinnaatitaassanngimmat, tassami taamaattoqarpat pineqartup ulluinnarni meeraq najortassanngikkaa ilimagineqarsinnaammat, aalajangersakkap malitsigaa.

Taamaattoq § 16 malillugu § 3, imm. 2-3, § 7 imaluunniit § 9 malillugit meeraq toqungalluni erniuppat, meeravissiassanngortinneqarpat, angerlarsimaffiup avataanut inissinneqarpat, imaluunniit meeraq erniunermi kingornatigut sapaatit akunnerisa 15-it imaluunniit 19-it siulliit iluanni toquppat sulinngiffeqarsinnaatitaaneq atorunnaassanngilaq.

Meeraq sulinnigiffeqarnerup nalaani toquppat, angajoqqaat assinganik suli sulinnigitsitaasinnaapput, matumani § 17, imm. 2 malillugu angajoqqaatut sulinnigiffeqarnermi aamma.

Taamatutaaq § 18 malillugu aalajangersakkami napparsimavimmut uninnerit ilaatinneqanngillat. Piffissami napparsimavimmi uninngaffiusumi ullut tamaasa meeqqamik najuisoqartarnissaa piumasaqaataanngilaq.

#### *§ 2-mut*

Inatsisartut inatsisaat una malillugu inunnut sulinnigiffeqarsinnaatitaasunut imaluunniit sulinnigissinnaatitaasunut, Inatsisartut inatsisaanni malittarisassat ajoqutaasumik sanioqqunneqarsinnaannginnerat aalajangersakkami aalajangersarneqarpoq.

Assersuutigalugu sapaatit akunnerini 10-nnarni taanna angajoqqaatut sulinnigiffeqarsinnaatitaassasoq, imaluunniit akissarsialik kapitali 2 malillugu meerartaarnermut atatillugu taamaallaat sulinnigiffeqarnermini, angajoqqaatut sulinnigiffeqarnerminiunngitsoq, akissarsiaqarsinnaatitaassasoq, sulisitsisup akissarsialik isumaqatigiissuteqarfigisinnaanngilaa.

Assersuutit tamakkiisuunngillat.

#### *§ 3-mut*

Imm. 1-imut

Naartunermut erninermullu atatillugu arnap sulinnigiffeqarsinnaatitaanera aalajangersakkami aalajangersarneqarpoq. Erninnissamut ulloq naatsorsuutigineqartoq sioqqullugu arnaq sapaatit akunnerini 4-ni naartunermi sulinnigiffeqarsinnaatitaavoq.

Ullormit erninnissamut naatsorsuutigineqartumut sapaatit akunnerisa 4-nngornerinik naatsorsuuteqalernermit meeqqallu inunngornissaata tungaanut, arnaq naartunermut atatillugu sulinnigiffeqarsinnaatitaavoq.

Arnaq naatsorsuutigineqartumit siusinnerusukkut ernippat, taava arnaq sulinnigiffeqarfissanik ernereermermi kingorna atorsinnaasaminik pisassaqaassanngilaq. Taamaalilluni erninerup kingorna sulinnigiffeqarsinnaatitaaneq sivitsorneqassanngilaq.

Arnaq naatsorsuutigineqartumit kingusinnerusukkut ernippat, arnaq ullormit ernivissatut naatsorsuutigineqartumit erninnissap tungaanut aamma naartunermi sulinnigiffeqarsinnaatitaavoq. Ernereermerup kingorna sulinnigiffeqarsinnaatitaaneq sivikillisinneqassanngilaq.

Imm. 2-mut

Ernereernerup kingorna arnap sulinngiffeqarsinnaatitaanera aalajangersakkami aalajangersarneqarpoq. 1-mik meerartaarnermi ernereernerup kingorna arnaq sapaatit akunnerini 15-ini sulinngiffeqarsinnaatitaavoq.

Ullormi meeqqap inunngorfiani sulinngiffeqarneq aallartissaaq, ernereernerullu kingorna sapaatit akunneri 15-it tungaanut sivissuseqassalluni.

Imm. 3-mut

Marlulinermi imaluunniit amerlanerusunik ataatsikkut erninermi erninerup kingorna arnap sulinngiffeqarsinnaatitaanera aalajangersakkami aalajangersarneqarpoq.

Arnaq 1-imiit amerlanerusunik ataatsikkut ernippat, erninerup kingorna sapaatit akunnerinut 19-inut sulinngiffeqarsinnaatitaanera sivitsorneqassaaq.

#### *§ 4-mut*

Arnat peqqinnissaqarfimmi naartusulerinermut ernisussiornermullu najoqqutassiat malillugit arnap angerlarsimaffigisaata avataanut illoqarfimmut allamut erniartortussatut innersuunneqartut aalajangersakkami pineqarput.

Arnat pineqartut tassaapput illoqarfimmi imaluunniit nunaqarfimmi najugallit, najukkami erninermi sullinneqarnissamut neqeroorfeqarsinnaanngitsut, taamaattumillu ernivissaminut aallartariaqartut.

Arnaq assartuineramik ingerlatseqatigiiffinit akuttunngitsumik angallanneqartariaqartassaaq, taakkulu arnat naatsorsuutigisamik erninissaat sioqquitsiarlugu angalasinnaanernut killiliisunik nammineq iluminni malittarisassaqartarput. Tamatuma saniatigut umiarsuit angalanissaannut pilersaarusiata timmisartukkullu angallassinermut pilersaarutit pissutaallutik, arnaq suli sulinngiffeqarnissamik pisinnaatitaaffeqalinngitsoq aallartariaqarsinnaavoq.

Arnat taakku ullormiit aallarfirminniit atuutilersumik § 3, imm. 1 malillugu sulinngiffeqalersinnaanermik tungaanut sulinngissinnaatitaallissapput.

Nakorsap suliamut atatillugu arnap pisariaqartumik aallartinneqarnissaa nalilerpagu, arnap ulloq taanna aallarnissaa piumasqaataavoq.

Nakorsap aalajangigaanik arnaq angallanneqarpat, tamanna ullormiit nakorsamit aallarfiissatut aalajangerneqartuminngaanniissaaq.

Napparsimasup najugaqarfimmi avataani misissorneqarnerani katsorsarneranilu kiffartuussinerit pillugit Namminersornerullutik Oqartussat nalunaarutaanni nakorsap aalajangigaanik angalanernut piumasaqaatit takuneqarsinnaapput.

Arnaq allatut angalassappat, arnap ernivissaatalu arnap aallarnissaa pisariaqartutut isumaqatigiissutigereerpassuk, ullormit aallarfirmmit sulinnigissinnaatitaanera aallartissaaq. Tamanna assersuutigalugu tassaasinnaavoq, arnap nammineq umiatsiani atorlugu ernivissaminut aallassalluni toqqarpagu.

Arnamut angalanissaq suli pisariaqartutut nalilerneqanngitsoq aallassalluni toqqarpagu, taava arnaq § 3, imm. 1 malillugu sulinnigiffeqarsinnaatitaanerup atuutilinnginnerani sulinnigissinnaatitaassanngilaq.

#### *§ 5-imut*

Arnap naartulluunniit peqqissusaanut ajoqutaasinnaasumik, nakorsap sulinerminut atatillugu nalilerpagu suliffiup pissusaata naartumut navianaateqarsinnaanera, imaluunniit pisortat aalajangigaat malillugit arnap sulinissaa inerteqqutigineqarpat, aamma sulisitsisup arnaq naleqquttumik suliffissaqartinngippagu § 3, imm.1 malillugu sulinnigiffeqarneq atuutilissasoq, aalajangersakkami aalajangerneqarpoq. Taamaalilluni aalajangersagaq malillugu arnaq sulinnigiffeqarsinnaatitaalinnginnermini naartuneq pissutigalugu sulinnigissinnaatitaavoq.

Arnap ajornartorsiornerisa naartunermut attuumassuteqarnissaa piumasaqaataavoq. Arnaq naartunermut attuumassuteqanngitsumik napparsimalerpat, taava aalajangersagaq taanna malillugu sulinnigissinnaatitaassanngilaq.

Aammattaaq suliinnarnerup arnamut naartumulluunniit peqqissutsikkut aarlerinartitsilersinnaanera piumasaqaataavoq. Taamaalilluni nalinginnaasumik naartunermi iluaalliuutaasinnaasut aatsaat ilaatinneqarsinnaapput, arnap suliinnarneratigut tamanna arnap naartulluunniit peqqissusiinut aarlerinartorsiortitsippata. Tamanna pillugu nakorsaq suliaminut atatillugu naliliisimassaaq, tamannalu nalinginnaasumik nakorsap allagarsiussaatiqut pisarpoq.

#### *§ 6-imut*

##### *Imm. 1-imut*

Nakorsap naliliinera malillugu suliap pissusia naartumik ulorianartorsiortitsippat, imaluunniit aalajangersakkat pisortanit aalajangersarneqartut arnap naartusup suliinnarnissaa akornuserpassuk, aamma sulisitsisup arnaq suliffissamik allamik naleqquttumik neqeroorfigisinnaanngippagu, § 3, imm.1 malillugu sulinnigiffeqarneq sioqqullugu arnat sulinnigissinnaanerat atuutilissasoq aalajangersakkami aalajangersarneqarpoq.

Naartusunut naartunerminni peqqissutsimut ajoqutaasinnaasunik atugassaqartitaallutik sulisunut aalajangersagaq illersuutaavoq. Sapinngisamik arnap sulinerata naartusumut naleqquttumik aaqqissuunnissaa pillugu arnap sulisitsisua pisussaaffilerneqarpoq. Tamanna ajornarpat sulisitsisup suliassamut naapertuuttumut allamut nuunneqarnissaanik arnaq neqeroorfigissavaa. Tamanna aamma ajornassappat arnaq suliffimmit sulinngissinnaatitaavoq.

Aalajangersakkami pissutsit marluk ilaatinneqarput:

- 1) arnap sulinera arnap peqqissusianut naartuanulluunniit aarlerinartorsiortitsisoq nakorsap nalilerpagu, imaluunniit
- 2) aalajangersakkat pisortanit aalajangersarneqarsimasut arnap sulisinnaanera akornuserpassuk.

Arnap sulisitsisuata suliffimmik allanik naapertuuttumik arnaq neqeroorfigisinnaappagu aalajangersagaq atuutissanngilaq.

Imm. 2-mut

Pissutsit aalajangersimasut atuutsillugit arnaq naartusoq naartunermi imm. 1 malillugu suliffimmik naapertuuttumik allamik neqeroorfigineqartoq, neqeroorummik itigartitsisinnaatitaasoq, aalajangersakkami aalajangersarneqarpoq. Suliffiup naapertuuttuunissaa pillugu, naapertuuttuunerata aalajangersimasumik qanoq paasineqarneranik nassuiaaneq pissutaasassaaq.

Nr. 1

Arnap nalinginnaasumik sularisartagaanit allaanerujussuarmik suliaqarnissaq pineqarpat, taava arnap sulisitsisumit allamik suliaqarnissamik neqeroorut itigartissinnaagaa nr. 1-imi aalajangersarneqarpoq. Suliassaqarfik arnap piginnaasaasa avataanniittoq assersuutigalugu tassani pineqarsinnaavoq.

Nr. 2

Arnap nalinginnaasumik sularisartagaanit allatut qaffasissusilimmik suliaqarnissaq pineqarpat, taava arnap sulisitsisumit allamik suliaqarnissamik neqeroorut itigartissinnaagaa nr. 2-mi aalajangersarneqarpoq. Arnaq aqutsisutut inissisimasooq atorffimmik aqutsinermik ingerlatsiffiunngitsumik neqeroorfigineqarpat, tamanna suliatus massakut suliavit allaanerujussuarmik qaffasissulittut assersuutigineqarsinnaavoq.

Nr. 3

Arnap nuuttariaqarneranik imaluunniit suliffimmut suliffimmiillu sivilisuumik assartorneqartariaqalerneranik malitseqartumik suliffigisaq taarserneqarpat, taava arnap sulisitsisumit allamik suliaqarnissamik neqeroorut itigartissinnaagaa nr. 3-mi aalajangersarneqarpoq. Tamanna soorlu arnaq illoqarfimmi nunaqarfimmiluunniit allami suliffissaminik neqeroorfigineqarpat atuutissaaq.



Nr. 4

Ullukkut imaluunniit sapaatip akunnerani sulisarnissamik pingaarutilimmik allaanerujussuarmik sulisitsisoq neqerooruteqarpat, taava arnap sulisitsisumit allamik suliaqarnissamik neqeroorut itigartissinnaagaa nr. 4-mi aalajangersarneqarpoq. Tamatumunnga arnaq nalinginnaasumik ulluunerani sulisaraluarluni, pineqartup unnuarsiortalernissamik neqeroorfigineqarnera assersuutaasinnaavoq.

Nr. 5

Pineqartup sapaatip akunneranut piffissaq suliffigisartagaa annertuumik allannguuteqarpat, arnap sulisitsisumit suliffimmik allamik neqeroorfigineqarnini itigartissinnaagaa nr. 5-imi aalajangersarneqarpoq. Matumani arnaq suliffimmik nalinginnaasumiit sapaatip akunneranut piffissamik suliffiusumik 50 %-imik annikinnerusumik neqeroorfigineqarpat pissutsinut aallaavittut ilaapput. Tamannali aalajangersimasumik nalilersuinikkut pisassaaq.

Imm. 3-mut

Imm. 1 malillugu siusinnerusukkut suliffigisimasami sapaatip akunneranut nalunaaquttap akunneri suliffiusartut amerlaqataannik suliffiusumik suliffimmik naleqquttumik nassaartoqarsinnaanngippat, arnaq piffissami sivikillisami sulisinnaatitaasoq aalajangersakkami aalajangersarneqarpoq.

Assersuutigalugu sulisitsisup arnaq suliffissamik naapertuuttumik allamik sapaatit akunneranut nalunaaquttap akunnerini taamaallaat 30-ni sulisinnaaneramik neqeroorfigisinnaappagu, arnallu siusinnerusukkut suliffigisimasamini akunnerit 40-ni sulisarsimappat, taava arnaq sapaatip akunneranut nalunaaquttap akunnerini qulini sulinnigissinnaatitaassasoq tamanna isumaqarpoq.

#### *§ 7-imut*

Imm. 1-imut

Ataataasut anaanaaqataasullu meeqqap erniunerata kingorna sapaatit akunnerisa 15-it siulliit iluanni sapaatit akunnerini ataqatigiissuni 3-ni meerartaarnermut atatillugu sulinnigiffeqarsinnaatitaasut, aalajangersakkami aalajangersarneqarpoq.

”Ataataasutut” paasineqassaaq Meeqqat inatsiseqartitaanerannik Kalaallit Nunaanni inatsimmi inatsisitigut ataataatitaasoq. Angut meerartaartussamut katinnikoq inooqataasorluunniit, taakku pissutiginnarlugit inatsisartut inatsisaat manna malillugu sulinnigiffeqarsinnaatitaanngilaq.

“Anaanaaqataasoq” tassaavoq inatsit alla malillugu arnaq meeqqamut anaanaaqataasut nalunaarsorneqarsimasooq. Siunnersuummi “anaanaaqataassuseq”-mut isummap imarisaata Kalaallit Nunaannut eqqunneqarnissaa siunnersuummi pineqanngimmat malugineqassaaq.

Ataataasoq anaanaaqataasorlu Inatsisartut inatsisaat manna malillugu assigiinnik pisinnaatitaaffeqarlutillu pisussaataaffeqarput.

Imm. 2-mut.

Anaanaasoq marlulippat ataatsikkulluunniit amerlanerusunik ernippat ataataasup anaanaaqataasulluunniit sulinngiffeqarsinnaatitaanera aalajangersakkami aalajangersarneqarpoq.

Anaanaasoq ataatsikkut meeqqanik 1-imit amerlanerusunik ernippat, taava inunngornerup kingorna sapaatit akunnerisa siulliit 19-it iluanni ataataasoq anaanaaqataasorluunniit sapaatit akunnerini 3-ni ataqatigiissumik sulinngiffeqarsinnaatitaavoq.

#### *§ 8-mut*

Imm. 1-imut

Meeqqamik Kalaallit Nunaanni najugalimmik meeravissartaartut, meeqqap tiginissaa sioqqullugu sapaatip akunnerani 1-imi sulinngissinnaatitaasut aalajangersakkami aalajangersarneqarpoq.

Meeravissartaartussat sumiiffimmut meeqqamik meeqqanilluunniit aallerfissaminnut angalasinnaanissaminnut aalajangersakkakut periarfissinneqarput. Meeravissartaartussat meeqqamik meeqqanilluunniit tigusinnginnerminni meeqqamut meeqqanulluunniit piffissamik ataatsimoorfeqarnissaat, taamaalilluni meeqqap meeqqalluunniit meeravissartaartussat tiguneqarnissartik sioqqullugu ataqatigilerniassamatigit, aalajangersakkakut aamma periarfissinneqarpoq.

Meeraq meeravissartaartunit paarineqalerpat, Inatsisartut inatsisaat manna malillugu meeraq tiguneqartutut isigineqassaaq.

Imm. 2-mut

Meeqqamik Kalaallit Nunaata avataani najugalimmik meeravissartaartut, meeqqap tiginissaa sioqqullugu sapaatit akunnerini 3-ni sulinngissinnaatitaasut aalajangersakkami aalajangersarneqarpoq. Meeqqamik Kalaallit Nunaata avataanut aallarnerup sivisusinnaanera taamaalilluni piffissami sulinngiffiusinnaasumi isiginiarneqarsimavoq.

Meeraq meeravissartaartunit paarineqalerpat, Inatsisartut inatsisaat manna malillugu meeraq tiguneqartutut isigineqassaaq.

#### *§ 9-mut*

Imm. 1-imut

Sulinngiffeqarsinnaanerup sivilissusaanut tunngatillugu meeravissartaartut angajoqqaavinnut aalajangersakkami naligiissitaapput, matumani meeravissartaartut akunnerminni sulinnngiffeqarnerup agguataarinerat ilanngullugu.

Meeravissartaartut ataatsimut katillugit sapaatit akunnerini 15-ini sulinnngiffeqarsinnaatitaapput. Sapaatit akunnerisa 15-it taakku iluanni meeravissartaartut sapaatit akunnerini 3-ni ataatsikkut sulinnngiffeqarsinnaatitaapput. Taamaalillutik meeravissartaartut meeqqap tiguneqarnerata kingorna sapaatit akunnerisa 15-it siulliit iluanni ingerlanneqartussanik, katillugit sapaatit akunnerini 18-ini sulinnngiffeqarsinnaatitaapput.

§ 3, imm. 2 malillugu sapaatit akunneri 15-it taakku erninerup kingorna piffissamut anaanaasup sulinnngiffeqarfigisinnaasaanut naapertuupput, taakkulu § 7, imm. 1 malillugu sapaatit akunnerini 3-ni taamaaqataanik erninerup kingorna ataataasup anaanaaqataasulluunniit sulinnngiffeqarfigisinnaasaanut naapertuupput.

Sapaatit akunneri sinneruttut meeravissartaartut arlaannit ataasiinnarmit atorneqarsinnaassapput. Meeravissartaartut sapaatip akunneri qanoq agguataassanerlugit namminneq aalajangissavaat.

*Imm. 2-mut*

Aalajangersakkami sulinnngiffeqarsinnaanerup sivilissusaanut tunngatillugu meeravissartaartut angajoqqaaviillu naligiissitaapput, matumani meeravissartaartut akornanni sulinnngiffeqarnerup agguataarnera ilanngullugu.

Meeravissartaartut ataatsikkut meeqqanik 2-nik amerlanerusunilluunniit tigusaqartut tigusinermut atatiinnarlugu katillugit sapaatit akunnerini 19-ini sulinnngiffeqarsinnaatitaasut aalajangersakkami aalajangersarneqarpoq. § 7 malillugu meeravissartaartut ataatsikkut sapaatit akunnerini 3-ni sulinnngiffeqarsinnaatitaapput. Taamaalillutik meeravissartaartut ataatsimut sapaatit akunnerini 22-ini sulinnngiffeqarsinnaapput, meeqqat tiguneqarnerisa kingorna sapaatit akunnerisa 19-it siulliit iluanni ingerlanneqartussanik.

§ 3, imm. 2 malillugu sapaatit akunneri 19-it taakku piffissamut marlulinermi ataatsikkulluunniit amerlanerusunik meerartaarnermini anaanaasup sulinnngiffeqarfigisassaanut naapertuupput, § 7, imm. 2-lu malillugu sapaatit akunneri 3-t taakku piffissamut erninerup kingorna ataataasup anaanaaqataasulluunniit sulinnngiffeqarfigisassaannut naapertuullutik.

Sapaatit akunneri sinneruttut meeravissartaartut arlaannit ataasiinnarmit atorneqarsinnaapput. Meeravissartaartut sapaatip akunneri qanoq agguataassanerlugit namminneq aalajangissavaat.

*§ 10-mut*

#### Imm. 1-imut

Meeqqamik tigusaqannginnerminni nalusaminnik meeravissartaartunut, meeravissartaartut §§-ini 8-mi 9-milu angajoqqaaviusunut naligiissinneqarnerat taamaallaat atuuttoq aalajangersakkami aalajangersarneqarpoq. Taamaalillugu assersuutigalugu meerarsiasamik ilaqtamilluunniit meeravissartaarneq §§-inut 8-mut 9-mullu ilaatinneqanngillat.

Meeravissartaartussat Kalaallit Nunaanni qitornavissartaartussat akuersissutigineqartarnerat pillugu nalunaarut malillugu akuerineqartarput.

Matuma kingorna meeravissartaartussat katissimassapput meeravissartaarsinnaassagunik. Aappariit assigiinngitsunik assigiimmilluunniit suaassuseqarnerut tamatumani apequtaanngilaq.

Inuit nalunaarsugaasumik aappariittut meeravissartaarsinnaassapput nalunaarsugaasumik aappariinnertik katissimanermut allanngortikkunikku.

Meeravissartaartut meeravissartaarnissaq siunertaralugu ilaqtariittut paarsisartut akuerineqarsimasut aalajangersakkami aamma pineqarput.

#### Imm. 2-mut

Piffissami meeravissartaarfiusumi meeqqamik nalunngisaminnik meeravissartaartut sulinngiffeqarsinnaanerannik kommunalbestyrelsip akuersissuteqarsinnaanera aalajangersakkakut periarfissiissutigineqarpoq.

Meeqqap tigunerani meeravissartaartut meeraq nalunngereerneraat apequtaatinnagu, naalungiarsummik meeravissartaartoqartillugu angajoqqaat meeravissartaartut meeqqallu angajoqqaat sulinngiffeqarnissaat pisariaqartissavaat.

Paarlattuanik assersuutigalugu aapparisaq meeraanik anngajaamik meeravissartaartoqartillugu, sulinngiffeqarnissaq pisariaqartinneqarnaviannngilaq.

Sulinngiffeqartoqassanersoq kommunalbestyrelsip nalilissavaa, matumani sulinngiffiup qanoq sivistiginissaa ilanngullugu.

### *§ 11-mut*

#### Imm. 1-imut

Meeraq ilaqtariinnut paarsisartunut inissinneqarpat meeqqap tiguneqarneranut atatillugu angajoqqaarsiat sulinngiffeqarsinnaanerat pillugu kommunalbestyrelse aalangiisinnaasoq aalajangersakkami aalajangersarneqarpoq.

#### Imm. 2-mut

Meeqqap ilaqtariinnut paarsisartunut inissinneqarneranut atatillugu sulinngiffeqarnermut malittarisassanik sukumiinerusunik aalajangersaasinnaanerumut Naalakkersuisut

piginnaatinneqarput. Assersuutigalugu kommunalbestyrelsit qaqugukkut angajoqqaarsiat sulinngiffeqartissinnaaneraat, sulinngiffeqarnerup sivilsussusia sulisitsisumullu ilisimatitsisarnermut atugassarititaasussat pillugit atugassarititaasussanik Naalakkersuisut aalajangersaasinnaapput.

Nalinginnaasumik nassuiaatini imm. 2.6 innersuutigineqarpoq.

### *§ 12-imut*

Imm. 1-imut

§ 3, imm.1, § 7, imm. 1 aamma § 9, imm. 1 malillugit angajoqqaat, sulinngiffeqarnerup sapaatit akunnerinut siullernut 15-inut uiggiullugu katillugit sapaatit akunneri 21-it angajoqqaatut sulinngiffeqarsinnaatitaasut aalajangersakkap aalajangersarpaa.

Inatsisitigut pisinnaatitaallunilu pisussaataasutut angajoqqaat meeqqap angajoqqaavinut ilaapput, matumani aamma meeravissiallit ilanngullugit.

Imm. 2-mut

§ 3, imm. 3 § 7, imm. 2 aamma § 9, imm. 2 malillugit meeqqanut 2-nnut imaluunniit amerlanernut ataatsikkut inuusunut imaluunniit tigusanut angajoqqaat, sulinngiffeqarnerup sapaatit akunnerinut siullernut 19-inut uiggiullugu katillugit sapaatit akunneri 25-it angajoqqaatut sulinngiffeqarsinnaatitaasut aalajangersakkap aalajangersarpaa.

Imm. 3-mut

Imm. 1 aamma 2 malillugit angajoqqaatut sulinngiffeqarsinnaatitaaneq taamaallaat angajoqqaat ataasiakkaarlutik atorsinnaagaat aalajangersakkami aalajangersarneqarpoq.

Piffissap angajoqqaatut sulinngiffeqarfiusup ingerlanerani angajoqqaat paarlakaallutik angajoqqaatut sulinngiffeqarsinnaanerat aporfissaqanngilaq. Assersuutigalugu angajoqqaatut sulinngiffeqarneq agguataarneqarsinnaavoq, angajoqqaajusup aappaata sapaatit akunnerini siulliit 10-t sulinngiffeqarfigalugit, aappaatalu sulinngiffeqarnissap sinnera tigullugu.

### *§ 13-imut*

Imm. 1-imut

§ 12 malillugu inuit angajoqqaatut sulinngiffeqarfiusumi sapaatit akunnerini 4-ni kingullerni sulinertik tamakkiisumik ilaannakoortumilluunniit aallarteqqissinnaagaat aalajangersakkakkut periarfissinneqarpoq, aallartitseqqinneq isumaqarpoq inuk sulileqqittoq, matumani aamma suliffimmi nutaami sulilerneq ilanngullugu.

Ilaannakoortumik suleqqilernermin, inuup atorfinitsitaanerminut atatillugu nalunaaquttap akunnerini ikinnerusuni sulilluni inuk aallartissaaq, taamaalillunilu ilaannakoortumik sulilluni

aamma ilaannakoortumik angajoqqaatut sulinnigiffeqassalluni. Uani pisumi inuup angajoqqaatut sulinnigiffeqarnermi sivitsorneqarnissaa pisinnaatitaaffigivaa.

Sulineq qanoq aallarteqqinneqassanersoq sulisitsisunut isumaqatigiissutigineqassaaq. Akissarsiaqartup angajoqqaatut sulinnigiffeqarnerup sivitsuutaani ilaannakoortumik sulinerminik aallartitseqqinnissaa sulisitsisup piumasarisinnaangilaa.

Assersuutigaluguli akissarsiallip kissaatigippagu piffissap affaannaani sulisarluni sulinini aallarteqqinniarlugu, tamanna sulisitsisup itigartissinnaavaa.

Sulisitsisup sulinerup tamakkiisumik ilaannakoortumilluunniit aallarteqqinneqarnissaa itigartippagu, piffissami ataqatigiissumi akissarsiallip angajoqqaatut sulinnigiffeqarsinnaatitaanini attatiinnassavaa.

Aalajangersagaq inunntut suliffilinnut taamaallaat atuuppoq. Inuup meerartaarnermut atatillugu sulinnigiffeqarnermi ullormusiaqartup, aamma suliffeqanngitsup, taamaalilluni angajoqqaatut sulinnigiffeqarnermi sapaatit akunneri kingulliit 4 sivitsornerisigut, meerartaarnermut atatillugu sulinnigiffeqarnermi ullormusiat piffissami sivilunerusumi aannertusarsinnaangilai.

Imm. 2-mut

Angajoqqaatut sulinnigiffeqarnermi sapaatit akunneri 4 ingerlanerini inuup sulinermi ilaannakoortumik aallarteqqinneqarnissaa toqqarpagu, taava angajoqqaatut sulinnigiffeqarsinnaatitaanerup sinnerisa assinganik nalunaaquttap akunnerinik sulinerup aallarteqqinneqarneranut atorneqartunik angajoqqaatut sulinnigiffeqarneq sivitsorneqassaaq.

Inuk sapaatip akunneranut nalunaaquttap akunnerini 40-inut akissarsiaqartartoq imaluunniit meerartaarnermut atatillugu sulinnigiffeqarnermi ullormusiaqartoq, sapaatit akunnerisa 4-t ingerlanerini katillugu nalunaaquttap akunnerini 160-ini sulinnigiffeqassaaq.

Sulinerup ilaannakoortumik aallarteqqinneqarneratigut inuk nalunaaquttap akunnerini 160-ini sulinnigiffeqarnissaaq pigiinnassavaa, nalunaaquttalli akunneri piffissamut sivilunerusumut siaarsinnaallugit.

Inuk sapaatip akunneranut nalunaaquttap akunnerinut 30-ni akissarsiaqartoq imaluunniit meerartaarnermut atatillugu sulinnigiffeqarnerup nalaani ullormusiaqartoq taamaaqataanik nalunaaquttap akunnerinik 4x30-nik sulinnigiffeqassaaq, tassa nalunaaquttap akunnerinik 120-nik, pissaqassaaq, piffissamut sivilunerusumut siaarneqarsinnaasunik.

Inuk meerartaarnermut atatillugu ullormusiaqartoq aamma ilaannakoortumik sulileqqittoq, inuup akunnerit suliffigisaasa aamma meerartaarnermut atatillugu

ullormusiaqarsinnaatitaaffiisa akunnerit amerlassusaasa assigiingissusaata taamaaqataanik meerartaarnermut atatillugu ullormusiaqarsinnaatitaassaaq.

Inuk sapaatip akunneranut akunnernut 30-t taamaaqataanik meerartaarnermut atatillugu ullormusiaqartartoq, sapaatillu akunneranut atorfimmi akunnerit 30-t sulisalersoq, kisiannili angajoqqaatut sulingiffeqarnerup nalaani sapaatip akunnerisa kingulliit 4-t ingerlanerini sapaatip akunneranut nalunaaquttap akunnerini 20-ini sulisartoq, akunnernut 20-inut akissarsisassaaq aamma akunnernut 10-inut meerartaarnermut atatillugu ullormusiaqartassaaq.

Inulli sapaatip akunneranut akunnernut 30-inut atorfimmi sulilerpat, taava ilaannakoortumik sulinerminik sulileqqinnerussanngilaq, kisianni § 14 malillugu tamakkiisumik sulileqqinnerussaaq.

Aalajangersagaq nikerarsinnaasumik aaqqissuunneqarsinnaavoq, aamma akissarsiallip sulisitsisullu akunnerminni tamanut naammaginartumik aaqqiissuteqarnissaq nassaariniassavaat.

Akissarsiallip sulisitsisullu assersuutigalugu isumaqatigiissutigisinnaavaat akissarsialik:

- 1) sapaatit akunnerini 8-ni piffissap suliffiusussap affaani sulisarluni sulinerminik aallartitseqqissasoq,
- 2) sapaatit akunnerini 16-ini piffissap suliffiusussap 75 %-iani sulisarluni sulinerminik aallartitseqqissasoq,
- 3) sapaatit akunnerini 2-ni tamakkiisumik sulingiffeqassasoq tamatumalu kingorna sapaatit akunnerini 4-ni piffissap affaannaa sulisarluni sulinerminik aallartitseqqissasoq, imaluunniit
- 4) sapaatit akunnerini 3-ni tamakkiisumik sulingiffeqassasoq tamatumalu kingorna sapaatit akunnerini 2-ni piffissap affaannaa sulisarluni sulinerminik aallartitseqqissasoq.

Angajoqqaat taamatuttaaq angajoqqaatut sulingiffeqarnermi sapaatip akunneri 4 kingulliit akunnerminni agguataarnissaat toqqarsinnaavaat, assersuutigalugu angajoqqaap aappaa sapaatit akunnerini siullerni 2-nni piffissaq tamaat sulingiffeqarluni, tamatumalu kingorna angajoqqaap aappaata sapaatit akunnerini tulliuttuni 4-ni piffissap affaani sulinini aallarteqqissallugu.

Akissarsiaqartup sulinini ilaannakoortumik aallarteqqippagu aamma taanna malisungaannarlugu angajoqqaatut sulingiffeqarnermut piffissaq sinneruttoq angajoqqaap aappaanit atorluarneqarpat, taava angajoqqaatut sulingiffeqarnerup nikerartumik aaqqissuunneqarnera uani pineqanngilaq. Taamatuttaaq angajoqqaatut sulingiffeqarnermi sapaatit akunnerini 4-ni kingullerni angajoqqaat tamarmiullutik piffissap affaanik sulinissaminnut pisinnaatitaanngillat.

§ 14-imi allaaserineqartutut, angajoqqaatut sulinngiffeqarnermi sapaatit akunneri kingulliit kinguartinneqarsinnaanerannut aalajangersagaq ataqatigiissinneqarsinnaavoq. Assersuutigalugu akissarsiallip sapaatit akunneri kingulliit 4 agguataarsinnaavai, taamaalilluni sapaatip akunneri siulliit 2 nikerartussanngorlugit aaqqissuullugit, aamma sapaatit akunneri kingulliit 2 kinguartillugit.

Assersuutit tamakkiisuunngillat.

#### *§ 14-imut*

Imm. 1-imut

Akissarsiallip sapaatit akunneri 4-t tikillugit suvisussuseqartussamik angajoqqaatut sulinngiffeqarnissartik piffissamut kingusinnerusumut kinguartitsisinnaanissaanik sulisitsisuminnut isumaqateqarsinnaanerat aalajangersakkap pisinnaatitaaffilerpaa.

Akissarsiallip sapaatit akunnerini 4-ni kingullerni angajoqqaatut sullinngiffeqarsinnaanani atorniarnagu toqqarpagu, taava sulisitsisuni isumaqatigiissuteqarfigisimaguniuk, kingusinnerusukkut sapaatit akunnerini 4-ni angajoqqaatut sulinngiffeqarnissaminik pisassaqaassaaq.

Kisiannili sulinngiffeqarnerup kinguartinnissaa sulisitsisumut isumaqatigiissuteqarfigeqqaarnagu, inuup angajoqqaatut sulinngiffeqarnissamini sapaatit akunneri 4-t kingulliit sulinngiffeqarfiginiarnagit toqqarsimappagu, taava sulinngiffeqarfissat sinneruttut atorunnaarsinneqassapput. § 19 innersuussutigineqarpoq.

Sulinngiffeqarnermi sapaatit akunneri 4 kingulliit kisimik kinguartinneqarsinnaapput.

Assersuutigalugu assigiinnik suliaqarfinni ukiup qanoq ilineranit sunnertiasuni inunnut aalajangersagaq atorneqarsinnaavoq. Angajoqqaatut sulinngiffeqarnermi sapaatit akunneri 4-t kingulliit piffissami suliassaqarfiulluartumi inissisimappata, taava inuup tamatuma nalaani sulinini aallarteqqissinnaavaa, angajoqqaatullu sulinngiffeqarfissami sinnera piffissamut suliassaqarfiunnginnerusumut nuussinnaallugu.

Aammattaq inunnut sulinngiffeqarnerup nalaani sulinngitsunut, kisianni angajoqqaatut sulinngiffeqarnerup nalaani sapaatip akunneri 4-t kingullit ingerlanerini suliffissamik neqeroorfigitinneqartumut aalajangersagaq atorneqarsinnaavoq. Inuup suliffissaq neqeroorutigineqartoq akuerisinnaavaa, aamma inuk sulinngiffeqarfissamik sinneruttumik annaasaqannginnissaq pillugu sulisitsisumut nutaamut isumaqatigiissusiorsinnaavoq.

Assersuutigalugu aamma inuup sulinermik tamakkiisumik aallartitseqqinnissaa sulisitsisumut isumaqatigiissutigineqarsinnaavoq, angajoqqaatullu sulinngiffiusussap sinnera feeriarnermut nangissutiginnarlugu ingerlassinnaallugu, imaluunniit akissarsiallip angajoqqaatut



sulinngiffeqarfissami sinneruttup meeqqami meeqquerivimmi aallartinnissaanut toqqorsinnaallugu.

§ 13-imi allaaserineqartutut, nikerartumik aaqqissuussinermut aalajangersagaq ataqatigiissinneqarsinnaavoq. Assersuutigalugu akissarsiallip sapaatit akunneri kingulliit 4 agguataarsinnaavai, taamaalilluni sapaatip akunneri siulliit 2 nikerartussanngorlugit aaqqissuullugit, aamma sapaatit akunneri kingulliit 2 kinguartillugit.

Akissarsiallip sulinini tamakkiisumik aallarteqqippagu, angajoqqaajusullu aappaata tamanna malisungaannarlugu angajoqqaatut sulinngiffeqarsinnaatitaanerup sivitsukkap sinnera atorpagu, tamanna angajoqqaatut sulinngiffeqarsinnaatitaanerup kinguartinneqarneratut isigineqassanngilaq.

Assersuutit tamakkiisuunngillat.

Imm. 2-mut

Angajoqqaatut sulinngiffeqarsinnaatitaanerup sinnera meeqqap 5-inik ukioqalinnginnerani ingerlanneqassaaq. Sulinngiffeqarsinnaaneq atorneqanngikkuni atorunnaassaaq. Sulinngiffeqarnissaq sulinngissinnaatitaanerummat, inummut sulinngiffeqarnissamut taarsiullugu nalunaaquttap akunnerisa, akissarsiatut imaluunniit meerartaarnermut atatillugu sulinngiffeqarnermi ullormusiatut aningaasanngorlugit tiguneqarsinnaanissaat periarfissaanngilaq.

Taamaattorli sulinngiffeqarnissap sinnerata tiguneqarsinnaanera sulisitsisumut isumaqatigiissutigineqassaaq. Taamaalilluni sulinngiffeqarallarnissap sinnerata piffissap sivikinnerusup iluani ingerlanneqarnissaanut sulisitsisoq piumasaqaateqarsinnaatitaavoq.

Suliffimmik allamik suliffittaarnermi angajoqqaatut sulinngiffeqarsinnaatitaanerup sinnera pigiinnarneqassaaq.

Angajoqqaatut sulinngiffeqarnerup sinnerata ingerlanneqarnerani, pineqartoq angajoqqaatut sulinngiffeqarnerup sinnerata ingerlanneqarnerani namminersortuni akissarsiaqarluni sulisartuusimappat, pineqartoq sulinngiffeqarnermi akissarsiaqarneq pillugu kapitali 2-mi malittarisassanut ilaatinneqassaaq.

Angajoqqaatut sulinngiffeqarnerup sinnerata ingerlanneqarnerani pineqartoq suliffeqanngippat, taava pineqartoq tamanna pillugu kapitali 4-imi piumasaqaatit naammassineqarsimappata meerartaarnermut atatillugu sulinngiffeqarnermi ullormusiaqarsinnaatitaavoq.

Imm. 3-mut

Sulinngiffissamik kinguartitsisimanerup ilaa ingerlanniaraanni, pinerit tamaasa sapaatip akunnera ataaseq sinnerlugu ingerlanneqartassasoq aalajangersakkami aalajangersarneqarpoq.

Taamaalilluni inuup sulinnigffeqarsinnaatitaanermini ullut sinneruttut ullunut ataasiakkaanut siammasissumik agguataarisinnaanngilai.

Piffissaq tamaat ataatsimut ingerlanneqarnissaa piumasaqaataanngilaq. Sulinnigffeqartussaq sapaatip akunneri 3-nik angajoqqaatut sulinnigffeqarnissamik suli pissarsiassaqarpat, pineqartoq sapaatip akunneri pingasut ataatsimut sulinnigffeqarsinnaavoq, imaluunniit assersuutigalugu pingasoriarluni sapaatip akunnera marloriarluniluunniit sapaatip akunnera affarlu sulinnigffeqarnissani agguataarsinnaallugu. Taamaallaat piffissat tamarmik sapaatip akunnera ataaseq sinnerlugu sivisussuseqassapput.

Taamaattoq sulinnigffeqarnissap sinnerata tiguneqarsinnaanera sulisitsisumut isumaqatigiissutigineqassaaq. Taamaalilluni assersuutitut sulinnigffeqarsinnaanerup sinnera ataatsikkut ingerlanneqarnissaa sulisitsisup piumasaqaatigisinnaavaa.

#### *§ 15-imut*

Angajoqqaq sulinnigffeqartoq toqukkut qimaguppat, imaluunniit angajoqqaq ima perulutsigilerpat meeqqamik paarsisinnaajunnaarluni, imaluunniit pissutsit immikkorluinnaq ittut atuuppata, sulinnigffeqarsinnaatitaanerani angajoqqaajusup aappaa tigusisinnaasoq aalajangersakkami aalajangersarneqarpoq.

Assersuutigalugu pisoq immikkorluinnaq ittoq tassaasinnaavoq, anaanaasup illoqarfimmut allamut ilinniariarnissamik akuerineqarsimanissaa, anaanaasullu meeqqamik nooqateqarnissaa naleqqunnani. Pisumi taamaattumi anaanaasup sulinnigffeqarfissaralua ataataasup anaanaaqataasulluunniit tigusinnaavaa.

#### *§ 16-imut*

Imm. 1-imut

Meeraq toqungalluni inuuppat, § 3, imm. 2-3-lu, § 7 aammalu § 9 malillugit sulinnigffeqarsinnaatitaaneq aamma atuuttoq aalajangersakkami aalajangersarneqarpoq.

Meeraq toqungalluni inuusutut isigineqassaaq, meeraq sapaatit akunnerisa 22-t naartooreernerme kingorna uumassuseqarneranik takussutissaqarani erniuppat. Meeraq erniunerme kingorna uumassuseqartutut ersiuteqartoq qaquguklut inunngornera apeqqutaatinnagu uumalluni inuusutut isigineqassaaq. Meeqqap erniunerata kingorna uumassuseqartutut ersiuteqarsimansoq, nakorsap suliaminut atatillugu naliliinera tunngavigineqassaaq.

Aalajangersakkami taamatuttaa q ilaatinneqarput meeravissiassanngortitsinerit aamma Meeqqat tapersorsorneqarnissaannut Inatsisartut inatsisaat malillugu angerlarsimaffiup avataanut inissiinerit tamarmik, matumani paaqqutarineqartussatut imaluunniit ulloq unnuarlu paaqqinnittarfimmuut inissiinerit ilanngullugit.

Meeqqap toqunerani sulinngiffeqarsinnaatitaaneq eqqarsaatigalugu aalajangersakkami erseqqissarneqarneqarpoq tamanna atuuttoq meeraq erniunermi kingornatigut sapaatit akunnerisa, taama malittariillutik, 15-it 19-illu siulliit iluanni toquppat, apeqqutaalluni § 3, imm. 2-3 malillugit meeqqap ataatsip inunngornera imaluunniit marlulisooqarnersoq ataatsikkulluunniit amerlanerusunik meerartaartoqarnersoq.

Aalajangersagaq § 1, imm. 2-mut avaqqutsineruvoq, tassani inuup sulinngiffeqartup aamma sulinngiffeqarnermini meeraq najussagaa piumasagaataammat.

Imm. 2-mut

Meeraq erniunermi kingornatigut sapaatit akunnerisa, taama tulleriissillugit, 15-it 19-illu siulliit iluanni toquppat, angajoqqaallu §§-it 3, 7 imaluunniit 9 malillugit sapaatit akunneri 4-nik suli ikinnerusunik sulinngiffissaqarpata, taava angajoqqaat sulinngiffeqarnertik sapaatip akunneri 4 tikillugit sulinnginnermik ilasinnaagaat aalajangersakkami pisinnaatitaaffilerneqarput.

Meeraq erniunermi imaluunniit tiguneqarnermi kingornatigut sapaatit akunnerisa, taama tulleriillutik, 15-it 19-illu siulliit iluanni toquppat, aamma sapaatit akunneri 4-t ataallugit angajoqqaat sulinngiffeqarfissaqaralaruni, angajoqqaajusoq sivikinnerpaamik sapaatit akunnerini 4-ni aliasuffissaminik piffissamik qulakkeerinniffigineqassasoq, aalajangersakkap kinguneraa.

Assersuutigalugu angajoqqaat sulinngiffeqarfiup naanissaanut sapaatip akunnera ataaseq sioqqullugu meeqqaminik annaasaqarpat, taava sapaatip akunnera ataaseq sulinngiffeqarnissaminut sinneruttoq sulinngiffeqassaaq, tamatumalu kingorna sapaatit akunnerini 3-ni sulinnginnissaminut pisinnaatitaaffeqassalluni.

Taamatuttaa q aamma angajoqqaat sapaatit akunneri 3-t suli sulinngiffeqartussaaguni, sapaatip akunneranik ataatsimik sulinnginnissaminut pisinnaatitaaffeqassaaq.

Sulinngissinnaatitaanerup aallartinnginnerani sulinngiffeqarsinnaaneq sinneruttoq atoqqaarneqassaaq.

Aalajangersagaq anaanaasumut imaluunniit meeravissiartaartumut, § 3, imm. 2-3 imaluunniit § 9 malillugit sapaatit akunneri 4-t sinnerlugit sulinngiffeqartussaasunut atuutissanngilaq, anaanaasup meeravissiartaartulluunniit sulinngiffeqarsinnaatitaanera meeqqap toquneratigut atorunnaarsinneqassanngimmat.

Angajoqqaat marluullutik sapaatit akunnerini 4-ni tamarmik immikkut sulinnngissinnaatitaapput.

Angajoqqaat atorfinitsitaanermi atugassarititaasut malillugit akissarsiaqartussaataangippata, kapitali 4 malillugu meerartaarnermut atatillugu sulinnngiffeqarnermi ullormusiaqarsinnaassapput.

#### *§ 17-imut*

Imm. 1-imut

§ 12 malillugu angajoqqaatut sulinnngiffeqarsinnaatitaaneq meeqqap toqunerani imaluunniit Meeqqat tapersorsorneqarnissaannut Inatsisartut inatsisaat malillugu angerlarsimaffiup avataanut inissinneqarnerani atorunnaassasoq aalajangersakkami aalajangersarneqarpoq.

Meeqqat tapersorsorneqarnissaannut Inatsisartut inatsisaat malillugu meeraq angerlarsimaffiup avataanut inissinneqarsimasoq angajoqqaatut sulinnngiffeqarnermi angerlartinneqarpat, angajoqqaatut sulinnngiffeqarsinnaatitaaneq piffissap sinneranut atuutileqqissaaq. Taamaalilluni piffissaq meeqqap angerlarsimaffiup avataanut inissinneqarfigisimasaa piffissamut tamarmiusumut angajoqqaatut sulinnngiffeqarfigisassamut ilaatinneqassaaq.

Imm. 2-mut

§ 12 malillugu piffissami angajoqqaatut sulinnngiffeqarfiusumi meeraq toquppat, angajoqqaat sapaatit akunnerini 4-ni sulinnngissinnaatitaasut aalajangersarneqarpoq.

Angajoqqaat tamarmik immikkut sapaatit akunnerini 4-ni sulinnngissinnaatitaapput. Sulinnngissinnaatitaaneq meeqqap toquneraniit atuutilertarpoq, sapaatillu akunnerinut tulluuttunut 4-nut atuutissalluni. Taamaalilluni sulinnngissinnaatitaaneq kingusinnerusumut toqqorneqarsinnanngilaq.

Angajoqqaat atorfeqarnermi atugassarititaasut malillugit akissarsiaqarsinnaatitaangippat, kapitali 4 malillugu piffissami meerartaarnermut atatillugu ullormusiaqarsinnaatitaasinnaassaaq. Taamaalilluni angajoqqaat isumaqatigiissut malillugu sapaatit akunnerini 2-ni akissarsiaqarsinnaatitaasooq, aallaavittut sapaatit akunnerini 2-ni akissarsiaqarsinnaatitaasaaq, sapaatit akunnerinilu 2-ni meerartaarnermut atatillugu sulinnngiffeqarnermi ullormusiaqarsinnaatitaalluni.

#### *§ 18-mut*

Imm. 1-imut

Meeraq piffissami angajoqqaat sulinngiffeqarsinnaatitaaffiata iluani napparsimmavimmut unitsinneqarpat, piffissaq sulinngiffeqarfiusoq piffissap napparsimmavimmi uninngaffiusup sivisoqataanik sivitsorneqassasoq aalajangersakkami aalajangersarneqarpoq.

Tamanna meeqqap inunngorneranit tigungeranilluunniit sapaatit akunnerini siullerni, taama tulleriillutik, 15-ini 19-inilu sulinngiffeqarsinnaatitaanermut aamma angajoqqaatut sulinngiffeqarsinnaatitaanermut atuuppoq. Ataataasulli anaanaaqataasullu § 7 malillugu sulinngiffeqarsinnaatitaanerat ilaatinneqanngilaq.

Imm. 2-mut

Meeraq, nakorsat suliaannik pissuteqartumik piffissap inunngornerup kingorna nalinginnaasumik uninngaviusartup kingorna, angerlartinneqarsinnaanngikkaangat tamanna aamma atuuppoq.

Assersuutigalugu meeraq angajoqqaatut sulinngiffeqarnerup nalaani sapaatip akunnerini 2-ni uninngatinneqarpat, taava piffissaq angajoqqaatut sulinngiffiusussaq sapaatit akunnerinik 2-nik sivitsorneqassaaq.

Aalajangersagaq manna malillugu piffissaq sulinngiffeqarfiusoq sapaatit akunnerinik 13-inik sivilisunerusumik sivitsorneqarsinnaanngilaq.

#### *§ 19-imut*

Imm. 1-imut

Sulinngiffeqarneq kipitinneqarpat, sulinngiffeqarnissap sinnera atorunnaassasoq aalajangersakkami aalajangersarneqarpoq. Taamaalilluni sulinngiffeqartoq sulileruni ilinnialerluniluunniit sulinngiffeqarfissat sinneri kingusinnerusumut toqqorsinnaanngilai.

Tamanna § 12 malillugu angajoqqaatut sulinngiffeqarnermi sapaatit akunnerinut 4-nut kingullernut atuutinngilaq, taannami § 13 malillugu nikerartumik aaqqissuunneqarsinnaammat, imaluunniit § 14 malillugu kinguartinneqarsinnaammat.

Imm. 2-mut

Sulineq ilinniarnarlunniit aallarteqqinneqarpat aallartinneqarluniluunniit, angajoqqaajusullu aappaa tamanna malisungaannarlugu sulinngiffeqarnermik aallartitsinngippat, sulinngiffeqarneq kipitinneqartutut isigineqassasoq aalajangersakkami aalajangersarneqarpoq.

Akissarsiaqartoq suliffigisaminut uterpat aammalu soorlu akissarsisalerpat, pigaartutut pilersaarutinut ilannguppat, nalinginnaasumik suliassaminik suliaqaqqilerpat assigisaanilluunniit, sulinngiffeqarneq kipitinneqartutut isigineqassaaq.

Taamatutaaq sulinnigiffeqartoq feeriarpat, akissarsiaqaatigaluni feeriarnerisutisiaqarluniluunniit imaluunniit nammineq akilikkaminiq sulinnigiffeqarnerisooq apeqqutaatinnagu feeriarpat, tamanna sulinnigiffeqarnermik unitsitsinertut isigineqassaaq.

Ilinniartoq ima annertutigisumik ilinniartitsinermit peqataappat allaat ilinniarnermik ingerlatsisutut isigineqarsinnaalluni, taava sulinnigiffeqarnerminik unitsitsisutut isigineqassaaq.

Pisuni immikkut ittuni sulinnigiffeqartoq, sulinnigiffeqarnermik unitsinnigikkaluarlugu, sulileqqissinnaavoq imaluunniit ilinniakkaminiq aallartitseqqissinnaalluni.

Sulinnigiffeqarnermik assersuutigalugu sulinermit atatillugu sivikitsumik ataatsimeersuarnernut, pikkorissarnernut, sammisaqarluni ulloqarnermut assigisaaniluunniit peqataasoqarpat unitsinneqartutut isigineqassanngilaq.

Tamatuma assigisaanik ilinniarnermik ingerlatsineq aallarteqqinneqartutut isiginigikkaluarlugu ilinniagaqartoq ilinniartitsinermit killilimmik peqataasinnaavoq. Tamatuma assersuutigalugu specialiliorneq, ilinniaqatinik naapitsineq imaluunniit ilinniartitsinermit tiimini ataasiakkaani peqataaneq kinguneraa. Erninerup kinguinngua soraarummeertoqarpat soraarummeernermit peqataaneq taamaalillunilu soraarummeernermit peqataannitsoornerup kingunerisaanik ilinniagaqarnerup sivilisumik sivitsornissaanik kinguneqarnissaagaluanik pinngitsoortitsineq, sulinnigiffeqarnermik unitsitsinertut aallaaviatigut isigineqassanngilaq.

Pisut immikkut ittut tassaasinnaapput, assersuutigalugu ajunaarnersuaqartillugu imaluunniit annertuumik ajutoornermik nalaatsisoqartillugu, soorlu nappaammik tunillaassuuttoqartillugu, akissarsiallip killilimmik suleqquneqarnera.

Aalajangersakkat allannguiffigineqarnissaat eqqarsaatigineqanngilaq.

Imm. 3-mut

§ 13 malillugu angajoqqaat sulinnigiffeqarfiusussami sapaatit akunneri 4-t kingulliit nikerartumik aqqissuunniallugit, imaluunniit § 14 malillugu sulinnigiffeqarallarnissap ilaa kingusinnerusumut kinguartinniallugu toqqarpassuk, sulinnigiffeqarallarneq unitsitsinerunaviannitsoq aalajangersakkami aalajangersarneqarpoq.

#### § 20-mut

Imm. 1-imut

Arnap akissarsiallip naartunini pillugu, erniffissatut naatsorsuutigineqartoq kingusinnerpaamik sapaatit akunnerinik 13-inik sioqqullugu, sulisitsisuminut ilisimatitsissutigissagaa aalajangersakkakut aalajangersarneqarpoq. Tamatuma

peqatigisaanik sulingiffeqarnini qaqugu aallartissallugu naatsorsuutiginerini sulisitsisuminut ilisimatitsissutigissallugu akissarsiallip pisussaaffigaa.

Imm. 2-mut

Anaanaasup erninermi kingornatigut kingusinnerpaamik sapaatit akunnerisa 12-it kingornatigut, qaqugu sulileqqinnissani naatsorsuutiginerlugu sulisitsisuminut ilimatitsissutigissagaa aalajangersakkami aalajangersarneqarpoq.

#### *§ 21-mut*

Imm. 1-imut

Ataataasup anaanaaqataasulluunniit inatsimmi matumani malittarisassat malillugit sulingiffeqarnissani kissaatigiguniuk, sulingiffeqarfiup aallartiffissaatut naatsorsuutigineqartoq sapaatit akunnerinik sisamanik sioqqullugu sulisitsisuni ilisimatissallugu pisussaaffeqartoq aalajangersakkami aalajangersarneqarpoq, taamaattorli imm. 2 takuuk.

Imm. 2-mut

Meeraq napparsimmavimmi nalinginnaasumik uninnganermi saniatigut napparsimmavimmut unitsineqarpat uninngatiinnarneqarpalluunniit, meeqqap ataataata anaanaaqataasulluunniit piffissaq sulingiffeqarfiusussatut imm. 1 malillugu nalunaarutigisani allanngortissinnaagaa aalajangersakkami aalajangersarneqarpoq.

Assersuutigalugu anaanaasoq najugaqarfimmi avataani ernissappat, anaanaasup angerlarnissaanut ataataasup anaanaaqataasulluunniit § 7 malillugu sulingiffeqarnissani utaqqissunniarpagu, tamanna pisinnaavoq. Kingunerluutit pissutigalugit erninerup kinguninngua anaanaasoq angerlarsinnaanngippat, taava ataataasup anaanaaqataasulluunniit aalajangersagaq malillugu § 7 malillugu sulingiffeqarfissami qaqugu aallartinnissaa allanngortissinnaavaa.

Napparsimmavimmut unitsitsineq imaluunniit napparsimmavimmi uninnganerup sivitsorneqarnissaa ataataasup anaanaaqataasulluunniit ilisimalerniariarpagu, tamanna sulingiffeqartup sulisitsisuminut ilisimatitsissutigissavaa.

#### *§ 22-mut*

Akissarsiallip sulingiffeqarnera § 18 malillugu meeqqap napparsimmavimmut unitsineqarneranik pissuteqartumik sivitsorneqarpat, napparsimmavimmi uninnganerup sivitsorneqarnissaa ilisimalerniariarlugu tamanna akissarsiallip sulisitsisuminut ilisimatitsissutigissagaa, aalajangersakkami aalajangersarneqarpoq. Meeqqap angerlartinneqarnera kiisalu piffissaq sulingiffeqarnerup qanoq sivistigisumik

sivitsorneqarnera pillugu akissarsiaqartup sulisitsisuminut taamatutaaq ilisimatitsissutigissavaa.

#### *§ 23-mut*

Akissarsiallip angajoqqaajusup aappaata § 15 malillugu sulinngiffeqarsinnaatitaanerani tigusippat, akissarsiallip tigusinini kiisalu sulinngiffeqarnerup sivisussusissaa sulisitsisuminut ilisimatitsissutigissagaa, aalajangersakkami aalajangersarneqarpoq. Ilisimatitsineq piaarnerpaamik pissaaq.

#### *§ 24-mut*

##### *Imm. 1-imut*

Namminersortuni akissarsiallit sulinngiffeqarnermini § 25-mi killiliussatut aalajangersarneqartut tunngavigalugit akissarsiaqarsinnaatitaasut, aalajangersakkami aalajangersarneqarpoq.

Aalajangersagaq taamaallaat namminersortuni suliffinni atorfilinnut atuuppoq.

Taamaalilluni aalajangersagaq pisortani oqartussaasuni atuutinngilaq, matumani naalagaaffiup Kalaallit Nunaanni atorfilittai ilanngullugit. Taakku isumaqatigiissut malillugu akissarsiaqarsinnaatitaasinnaapput imaluunniit kapitali 4 malillugu meerartaarnermut atatillugu ullormusiaqarsinnaatitaallutik.

Inatsisartuni Naalakkersuisunilu il. il. ilaasortat aningaasarsiaqartitaanerani il.il. pillugit Inatsisartut inatsisaanni kingusinnerusukkullu allanngortinneqartumi aamma Inatsisartut Suleriaasianni maleruagassat malillugit Inatsisartunut Naalakkersuisunullu ilaasortat naartunermi, erninermi meeravissartaarnermilu sulinngiffeqarnermi aningaasarsiaqarsinnaatitaapput. Taamaattumik ilaasortat aalajangersakkami ilaatinneqanngillat.

Kommunit aqunneqarnerat pillugu Inatsisartut inatsisaanni maleruagassat naapertorlugit kommunalbestyrelsinut ilaasortat aamma nunaqarfinni aqutsisunut ilaasortat naartunermi, erninermi meeravissartaarnermilu aningaasarsiatik annaanagit sulinngiffeqarsinnaatitaapput. Taamaattumik aamma ilaasortat taakku ilaatinneqanngillat.

##### *Imm. 2-mut*

Akissarsiaqarlutik sulisartut sulinngiffeqarnissaq sioqqullugu sapaatip akunneranut nalunaaquttap akunnerinik aalajangersimasunik suliffeqarsimangitsut eqqarsaatigalugit, sulinngiffeqarfissaq sioqqullugu nalunaaquttap akunneri sapaatit akunnerini 13-imi kingullerni agguaqatigiissitsinikkut suliffigisimasai aallaavigalugit sulisitsisoq naatsorsuissasoq aalajangersarneqarpoq.



Taamaassappat akissarsialik agguaqatigiissillugu akunnermut pisarnertut akunnermusiai aallaavigalugit akissarsitinneqartarumaarpoq. Qanoq annertutigisunik akissarsiaqarsinnaatitaanermut sinaakkutissat § 25-mi nassuiaqqapput.

Akissarsiallip sulinngiffeqalernissani sioqqullugu sapaatip akunnerini 13-ini kingullerni agguaqatigiissillugu akunnerit qassilluunniit sulisarsimansoq apeqquaatinnagu, sapaatip akunneranut nalunaaquttap akunneri 40-t sinnerlugit sulinngiffeqarnermi akissarsiaqartitsissalluni sulisitsisoq pisussaaffeqanngilaq.

Imm. 3-mut

Aalajangersakkami imm. 1 malillugu inunnut sapaatip akunneranut aalajangersimasunik akunnernik sulineq ajortut pillugit piffissat suut naatsorsuinermi ilanngaatigineqassanngitsut erseqqissaavigineqarput.

Aalajangersagaq malillugu piffissat suliffiusimannngitsut taaneqartut ilanngaatigineqassanngillat, taamaalillutillu akunnerit kisinneqarneranni agguaqatigiissillugu piffissaq suliffiusimasoq annikillisarneqassanngilaq.

Assersuutigalugu inuk sapaatip akunnerani 2-ni sulisimannngippat, taamaalilluni allaaviatigut sapaatip akunnerinut sinneruttunut 11-nut agguaqatigiissillugu akunnerit aallaavigineqassapput.

Inuk piffissap ilaannaani sulisarsimappat assersuutigalugulu sapaatip akunneranut akunnerit 30-t atorfeqarpat, kisianni akunnernik 10-inik sivikinnerusumik sulisimappat, piffissaq sivikinnerusunik suliffiusimasoq allatorneqarsimasut pissutaasut ilaannik pissuteqarsimappat, taava inuk suli sapaatip akunneranut 30-inut akunnernut sulisimasutut naatsorsuunneqassaaq.

Nr. 1

Piffissat, pineqartup napparsimalluni sulisimannginneranut piffissamik naatsorsuinermut, ilanngaatigineqassanngillat. Piffissat taakku tassaapput pineqartoq suliffimminit napparsimalluni nalunaarsimalluni peqarsimannginneri, aamma piffissat pineqartoq napparsimanini pissutigalugu suliffeqanngiffigisimasai.

Nammineq napparsimaneq taamaallaat aalajangersakkami ilaatinneqarpoq. Assersuutigalugu meeqqat napparsimaneri pissutigalugit piffissat sulinngiffiusut ilaatinneqanngillat.

Nr. 2

Piffissat, pineqartup suliffigisimannngisai, Inatsisartut inatsisaat manna malillugu sulinngiffigisimasai imaluunniit sulinngiffeqarfigisimasai, piffissanik naatsorsuinermut ilanngaatigineqassanngillat.

Tamatumunnga ilaapput piffissat, inuk sulinnigiffeqarsimaneq pissutigalugu sulinnigiffiit kiisalu naartusut §§ 4-6 malillugit sulinnigiffisimasai.

Naartusoq § 6, imm, 3 malillugu ilaannakoortumik sulisarsimappat, taava piffissamik naatsorsuinnermut akunnerit suliffigisarsimasai nalinginnaasut assigalugit naatsorsorneqassapput.

Nr. 3

Pissutsit avataaneersut piffissap ilaani, assersuutigalugu tunisassiassaaleqineq aamma silap qanoq innera pissutaalluni suliffeqannginnermik kinguneqartut, piffissamik naatsorsuinnermut ilanngaatigineqassanngillat.

Aalajangersagaq tamakkiisuunngilaq, kisianni pissutsit siumut naatsorsuutigineqarsinnaanngitsut pineqarnerat aalajangiisuvoq. Pisoq sulisumit sulisitsisumillu pinissaa siumut naatsorsuutigineqarsinnaassanngilaq.

Imaassinnaavoq maskiinamik ajutoorneq pissutigalugu tunisassiorfik tunisassiornerminik unitsitsisariaqartoq, pisiniarfik ikuallattoq imaluunniit atuarfik meeqqerivilluunniit imermik mingoqanngitsumik imissaaleqineq pissutigalugu matusariaqartoq.

Inuk assersuutigalugu sapaatip akunneranut ulluni 3-innarni sulisarpat ullullu sinnerini sulisannigippat, piffissakkuutaartumik suliffeqannginneq tassani pineqanngilaq, imaluunniit inuk sipaarniuteqarnerit assigisaalu pissutigalugit sapaatip akunneranut ullunik ikittuni sulisarpat aamma pineqarnani.

Nr. 4

Piffissamut feeria ilanngaatigineqassanngilaq. Akissarsiaqarluni akissarsiaqaraniluunniit feeriarneq apeqqutaatinnagu tamanna atuuppoq.

Nr. 5

Akissarsiaqaatanngitsumik ilinniaqqinneq aamma ilinniarnermik nangitsineq ilanngaatigineqassanngillat, suliffimmik attassiinnarnissamut siunertaqartumik ilinniaqqinnermut aamma ilinniarnermik nangitsinnermut pingaaruteqarpata.

Nr. 6

Piffissat pineqartup suliffeqarfeqarfimmiiffigisimangisai ilanngaatigineqassanngillat. Tassani inuk pisortanit ikiorsiissutinik pisartagaqarsimagaluarpalluunniit, suliffeerunnermut ikiorsiissutinik assigisaanilluunniit pisartagaqarsimagaluarpat tamanna atuuppoq.

Inuit annikinnerpaamik akunnattumilluunniit siusinaartumik pensionisiaqartartut peqatigitillugulu suliffeqarsimasut, piffissami sulinnigiffimminni suliffissaaleqisutut isigineqanngillat. Inuk annikinnerpaamik siusinaartumik pensionisiaqartoq aamma sapaatip

akunneranut akunnerit 20-t sulisartog taamaalilluni akunnerit 20-inut akissarsiaqarsinnaatitaavoq.

Assinganik inuit ilinniagaqartut suliffeqarfeqarfimmiinngitsutut isigineqarneq ajorput.

#### *§ 25-mut*

##### **Imm. 1-imut**

Aalajangersagaq malillugu piffissami akissarsiallip sulinngiffeqanngikkaluaruni akissarsiasaraluisa 80 procentiinik, sulisitsisut namminersortut minnerpaamik akissarsiaqartitsissapput. Sulinngiffeqarnermi piffissaq Angutit arnallu naligiissitaanissaat pillugu Inatsisartut inatsisaanni § 11, imm. 2 malillugu sulinngiffeqarneq atorfeqarnermi pissutsit atuuttut malillugit atorfeqarnerup sivisussusiata naatsorsorneqarnerannut ilaasussaammat, atorfeqarsimanerup sivisussusiata kingunerisaanik akissarsianut qaffaasoqassappat akissarsianut qaffaanerit ilaammata, tamatuma kinguneraa.

Akissarsiallit isumaqatigiissutikkut Inatsisartut inatsisaannit pitsaanerusunik atugassaqartinneqarpata, assersuutigalugu suliffeqarfeqarfimmi illuatungeriit akornanni sulinngiffeqarnermi tamakkiisumik akissarsiaqarnissamik isumaqatigiissutit, aalajangersakkap malittarisassiunngilai.

##### **Imm. 2-mut**

Akissarsiat meerartaarnermut atatillugu sulinngiffeqarnermi ullormusiaat pillugit akigititaasartumit atuuttumit minnerusinnaanngillat, aamma tamatumunnga naleqqiullugu akissarsiallip nalinginnaasumik akissarsiarisartagaasa 80 procentiinit annertunerugaluarpat.

Akissarsialik meerartaarnermut atatillugu sulinngiffeqarnermi ullormusianut akigititaanut assingusumik nalinginnaasumik akunnermut akissarsiaqarpat, taava akissarsiani nalinginnaasut akissarsiarisassavai.

##### **Imm. 3-mut**

Isumaqatigiissutini allatut aalajangiisoqarsimatinnagu, sulisitsisoq akigititamit qaffasinnerpaamit annerusumik nalunaaquttap akunneranut akissarsiaqartitsinissaminut pisussaatitaanngilaq. Akigititaq qaffasinnerpaaq nalinginnaasumik akissarsiat 80 procentiinit annikinnerugaluarpata aamma tamanna atuuppoq.

Akigititaq qaffasinnerpaaq ukiut tamaasa Aningaasanut inatsimmit aalajangerneqartarpoq.

#### *§ 26-mut*

Sulisitsisunut namminersortunut meerartaarnermut atatillugu sulinngiffeqarnermut aningaasaateqarfik pillugu inatsisartut inatsisaata kapitaliata 3-p atuuffia aalajangersakkami aalajangersarneqarpoq.

Inuit imaluunniit inatsisitigut pisinnaatitaasoq pisussaaitaasorlu sulisartumik 1-imik amerlanernilluunniit akilerlugit suliaqartinniarlugit atorfinitsitsisut, sulisitsisutut namminersortutut paasineqassapput.

Aalajangersakkami pineqarput sulisitsisut Sulisoqarnermut akitsuut pillugu Inatsisartut inatsisaat malillugu akissarsiarititat katinnerannit, sulisitsisup sulisuminut akilertakkaminit, sulisoqarnermut akitsuummik akiliisussaaitaasut.

Pisortani sulisitsisut, matumani danskit naalagaaffiata ataani sulisitsisut, aalajangersakkami ilaatinneqanngillat.

#### *§ 27-mut*

Imm. 1-imut

Sulisitsisup qinnuteqarnermigut, sulisunut Inatsisartut inatsisaat manna malillugu sulinngiffeqartunut, akissarsianut akilikkaminut akiliumminik utertitsivigineqarnissamik piumasqaqtussaasoq aalajangerneqarpoq. Isumaqatigiissutit isumaqatigissulluunniit malillugit/malillugu sulisitsisoq sulinngiffeqarnermi akissarsiaqartitsissagaluarpata tamanna aamma atuuppoq.

§§ 4-6, § 8, § 16, imm. 2 aamma § 17, imm. 2 malillugit piffissani sulinngiffiusuni inunnut sulinnginnerminni akissarsiaqartinneqartunut akissarsiaritinneqartut utertinneqarsinnaanngillat. Piffissani sulinngiffiusuni pineqartuni inatsisartut inatsisaata sulisitsisut akissarsiaqartitsinissaannik pisussaaffeqannginnerannut atatillugu tamanna isiginiarneqassaaq. Isumaqatigiissutit isumaqatigissulluunniit malillugu/malillugit sulisitsisoq piffissani sulinngiffeqarnermi pineqartuni akissarsiaqartitsissagaluarpata, tamanna aamma atuuppoq.

Sulisitsisup § 24 malillugu akiligassatut pisussaaffigisaatut, aningaasat utertinneqartussat amerlassuseqassapput.

Aningaasarsiassanut aningaasartuutit tassaapput tunngaviummik akissarsiat, inummut tapiissutit, sulisitsisup utoqqalinersianut akiliutaa, akortisiat aamma tuniniaasorisap akissarsiassai.

Imm. 2-mut

Akissarsiallip piffissami pisarnermisut akissarsiassaraluisa 80 procentiinik aningaasat utertinneqartussat amerlassuseqassapput, taamaattoq akigititamut minnerpaaffissaq imm. 3-miittoq aamma akigititamut annerpaaffissaq imm. 4-miittoq pillugit piumasaqaatit takukkit.

Sulisitsisoq akissarsiat nalinginnaasut 80 procentiinik akiliisoq, akissarsiassanik akilerneqartunik tamakkiisunik utertitsivigineqassaaq, taamaattoq imm. 3 aamma 4 takukkit.

Imm. 3-mut

§ 42 malillugu aningaasanik meerartaarnermut atatillugu sulinngiffeqarnermi ullormusiaritinneqartunut akigititap qaqugukkulluunniit atuuttup assinganik, ikinnerpaamik utertitsivigineqarnissaminik sulisitsisoq piumasaqarsinnaavoq.

Meerartaarnermut atatillugu sulinngiffeqarnermi ullormusianit ikinnerusunik 80 procentit taakku naleqarpata, taava sulisitsisoq taamaalilluni akissarsiat nalinginnaasut 80 procentii sinnerlugit utertitsivigineqarsinnaassaaq.

Sulisitsisoq meerartaarnermut atatillugu sulinngiffeqarnermi ullormusiat tunniunneqartussat amerlaqataannik akunnermut akissarsiaqartitsisoq, taamaalilluni akissarsianut aningaasartuutitut tamakkiisumik utertitsivigineqassaaq.

Assersuutit allat pillugit nalinginnaasumik nassuiaatini immikkoortoq 2.2.1-imut innersuussisoqarpoq.

Imm. 4-mut

Qaffasinnerpaamik akigititaq tassaavoq utertitsissutaasinnaasunut nalunaaquttap akunneranut qaffasinnerpaamik akigititaq.

Sulisitsisut nalunaaquttap akunneranut akissarsiaritinneqartup utertitsissutaasinnaasup qaffasinnerpaaffissaa qaangerlugu akiliisartut, qaffasinnerpaamik akigititaq qaangerlugu nalunaaquttap akunneranut akilersimasaminnut utertitsivigineqarsinnaanngitsut, qaffasinnerpaamik akigititap aalajangersarneqarnerata kinguneraa.

Akissarsialimmut atorfinitsitsinermi atugassarititaasut allaasut takuneqarsinnaanngippat, § 25, imm. 3 malillugu qaffasinnerpaamik akigititaq sinnerlugu akiliinissaminnut sulisitsisoq pisussaaffeqanngilaq.

Assersuutit allat pillugit nalinginnaasumik nassuiaatini immikkoortoq 2.2.1-imut innersuussisoqarpoq.

Meerartaarnermut atatillugu sulinngiffeqarnermut aningaasaateqarfimmi siulersuisut siunnersuuteqarnerisigut, qaffasinnerpaamik akigititaq ukiut tamaasa Aningaasanut Inatsimmi aalajangerneqartarpoq.

Imm. 5-imut

Akissarsianut aningaasartuutit suut utertinneqarsinnaatitaanersut pillugit sukumiinerusunik malittarisassiorsinnaanermut Naalakkersuisut piginnaatinneqarput.

Akissarsianut aningaasartuutit imm. 1-imut nassuiaatini nassuiaaserneqarput. Kingusinnerusukkut aningaasartuutit allat ilaatinneqartariaqartut ersersinneqarpat, aalajangersagaq aningaasartuutininut taamaattunut aamma atorneqarsinnaassaaq.

#### § 28-mut

Imm. 1-imut

Ukiup sisamararterutaata utertitsivigineqarnissamut tunngasup naanerata kingorna qaammatit 3-t qaangiutsinnagit, utertitsivigineqarnissamik qinnuteqaatip nassiunneqarnissaanut piffissaliussaavoq.

Assersuutigalugu utertitsivigineqarnissaq ukiup sisamararterutaasa aappaannut, tassa piffissamut aprilimiit junimut, tunngappat, taava utertitsivigineqarnissamik qinnuteqarnissamut piffissaliussaqaq novembarip ulluisa 30-ianni naassaaq. Ukiup sisamararterutaasa aappaanni piffissamut sumut utertitsivigineqarnissaq tunnganersoq apeqqutaatinnagu, piffissaliussaqaq novembarip ulluisa 30-ianni naassaaq.

Imm. 2-mut

Piffissarititaasup imm. 1-imi taaneqartup iluani qinnuteqaat sulisitsisup nassiutinngippagu, ukiup sisamararterutaanut pineqartumut sulinngiffeqarnermi akissarsianut aningaasartuutinik sulisitsisup utertitsivigineqarsinnaanera atorunnaassaaq.

Assersuutigalugu sulisitsisoq ukiup sisamararterutaasa aappaannut ukioq taanna novembarip ulluisa 30-iat tikitsinnagu utertitsivigineqarnissaminik qinnuteqaanngippat, taava ukiup sisamararterutaasa aappaannut sulisitsisup utertitsivigineqarsinnaanera atorunnaassaaq. Taamaattoq sulisitsisup ukiup sisamararterutaasa pingajuannut sulinngiffeqarnermi akissarsiaritinneqartunut utertitsisinnaatitaanini attatiinnassavaa, ukiup sisamararterutaasa pingajuannut qinnuteqaatimut piffissaliussap imm. 1-imi taaneqartup iluani nassiukkuniuk. Taamaalilluni ukiup sisamararterutaasa pingajuannut qinnuteqaat ukiup tulliani februaarip naannginnerani nassiunneqareersimassaaq.

#### § 29-mut

Imm. 1-imut

Sulisitsisut utertitsivigineqarnissamik qinnuteqarnermini uppersaasersuinissamik aalajangersakkakut pisussaaffilerneqarput. Taamaalilluni sulisitsisut utertitsivigineqarnissamik piumasagaatiminnik qularnarunnaarsitsisinnaanerat apeqqutaassaaq.

Imm. 2 malillugu uppersaatissat pillugit malittarisassat ersarinnerusut nalunaarummi aalajangersarneqassapput.

Imm. 2-mut

Sulisitsisut utertitsivigineqarnissamik qinnuteqarnerminni qinnuteqaatip ilusissaani piunasaqaatit suut naammassissaneraat pillugit, Naalakkersuisut ersarinnerusunik malittarisassiornissaannut piginnaatinneqarput, matumani uppersaatit suut sulisitsisut nassutissaneraat ilanngullugit. Assersuutigalugu taakku qinnuteqarnermi immersuiffissat immersorneqartussat pillugit malittarisassaasinnaapput imaluunniit sulingiffeqarnerup aallartinginnerani akissarsiallip sapaatip akunneranut nalunaaquttap akunnerinut suliffigisimasaanut uppersaatit pillugit malittarisassaasinnaallutik.

### § 30-mut

Imm. 1-imut

Sulisitsisunut namminersortunut meerartaarnermut atatillugu sulingiffeqarnermut aningaasaateqarfiup allaffissornikkut aqunneqarnera ingerlanneqarneralu siulersuisunut inissinneqassasoq aalajangersarneqarpoq.

§ 34 malillugu ulluinnarni allaffissornikkut aqutsinerup isumagineqarnissaanut siulersuisullu siunnersorneqartarnissaannut allaffeqarfimmik siulersuisut pilersitsissapput.

Imm. 2-mut

Siulersuisut 5-inik ilaasortaqaassapput, tamarmik Naalakkersuisunit toqqaassapput.

Ilaasortanit 2 sulinermik inuussutissarsiuteqartut kattuffiisa inassuteqarnerisigut toqqaarneqassapput, ilaasortanillu 2 sulisitsisut kattuffiisa inassuteqarnerisigut toqqaarneqassallutik.

Angutit arnallu naligiissitaanissaat pillugu Inatsisartut inatsisaani aalajangersakkat malillugit toqqaasoqassaaq.

Imm. 3-mut

Siulersuisunut ilaasortat akornanni siulersuisut siulittaasussaannik Naalakkersuisut toqqaassat, siulersuisullu namminneq qinikkaminnik siulittaasup tullilerlutik inissitsitissasut aalajangersarneqarpoq.

Ilaasortat akissarsillit sulisitsisullu soqutigisaannik isumaginnittussat amerlaqatigiissinneqarnissaat qulakkeerniarlugu innersuussinertaqaangitsumik Naalakkersuisut siulersuisumik toqqaassapput, tamatumalu peqatigisaanik ilaasortat amerlanerussuteqartut tunuliaqutaralugit aningaasaateqarfik aalajangiisinnaanissaminik periarfissaqalissaaq.

Imm. 4-mut

Siulersuisunut ilaasortat, siulittaasoq ilanngullugu, piffissamut ukiunut 4-nut toqqarneqartassasut toqqarneqaqqissinnaassasullu aalajangersarneqarpoq.

*§ 31-mut*

Nr. 1-3-mi piumasaqaat ataaseq arlallilluunniit naammassineqarsimappata, ukiunut sisamanut toqqagaaffiup iluani siulersuisunut ilaasortamik, matumani aamma siulersuisut siulittaasuannik siulittaasullu tullianik, Naalakkersuisut tunuartitsisinnaasut aalajangersakkami aalajangersarneqarpoq.

Piumasaqaatit taakkartorneqartut tamakkiisuupput.

Nr. 1-imut

Suliassat suliarineqarnerini ilaasortap ilungersunartumik sumiginnaasimanera ima paasineqassaaq, ilaasortap siulersuisunut ilaasortaanissaminik isumaginnissinnaanermik piukkunnassuseqannginnera, kukkussutitigut assigiiatigut imaluunniit kukkunermit ilungersunartumit uppersaasorsorneqarsimassalluni.

Taamaallaat ilaasortap iliuusai pillugit pisut ingasannerat uppersarneqarsinnaappat, ilaasortap tunuartinneqarneranik tamanna kinguneqarsinnaavoq. Peqatigitillugu ilaasortap siunissami suliassaminik illersorneqarsinnaasumik suliarinninnissaa ilimagineqarsinnaanngitsoq, kukkunerit assigiiartut imaluunniit ataasiarluni ilungersunartumik kukkusimanerup tunngavilersussavaa.

Ilaasortap arlaleriarluni, pissutissaqaranilu, siulersuisut ataatsimiinnerinut takkunneq ajornera, ilaasortap suliassaminik ingerlatsinerminik annertuumik sumiginnaaneratut aamma paasineqassaaq.

Assersuutit taaneqartut tamakkiisuunngillat.

Nr. 2-mut

Ilaasortap suliassaminik toqqissisimanartumik ingerlatsisinnaaneranik tatiginninnermik annertuumik ajoqusiisumik ilaasortap iliuuserisaatut taaneqarsinnaapput assersuutigalugu allat annaasaqartillugit ilaasortaq peqquserluuteqarsimasutut eqqartuunneqarsimappat, imaluunniit ilaasortaq sulisitsisutut sulisoq sulinngiffeqarnerani akissarsiaqartissimanngippagu.

Taamatuttaaq ilaasortaq aalakoorkuni siulersuisut ataatsimiinnerannut takkuppet, tamanna aamma ilaasortap suliassaminik toqqissisimanartumik ingerlatsisinnaaneranik tatiginninnermik annertuumik ajoqusiisutut isigineqassaaq.



Siulersuisunut ilaasortatut atuuffimmik isumaginninnermut akerliusutut isigineqartumik ilaasortap pissusilersorsimanera taamatutaaq tamatumani pineqarsinnaavoq.

Assersuutit taaneqartut tamakkiisuunngillat.

Nr. 3-mut

Ilaasortanik tunuartitsinissamik inassuteqaatit allakkatigut tunniunneqartassapput tunngavilersugaassallutillu.

Siulersuisunut ilaasortanit ikinnerpaamik pingasunit inassuteqaat ilalerneqarsimassaaq. Ilaasortat tamarmik, siulittaasoq aamma ilanngullugu, inassuteqaammut atsiornissaminnut periarfissaqarput.

Suliami pissutsit pillugit Naalakkersuisut peqqissaartumik misissuisussaanagerat, pisortat paasissutissanik pisariaqartunik tunngaveqartussaanagerisa ataanniippoq, tamatumalu allakkatigut tunngavilersuutitut takuneqarsinnaasut, innersuussinermi ilanngunneqartut, pillugit paasissutissat misissorneqartussaanagerat kinguneraa. Misissuinerup aalajangiisoqartinnagu sukumiinerusumik misissuisoqartariaqarnera malitsigippagu, Naalakkersuisut taamaaliornissaminnut pisussaataapput.

#### *§ 32-mut*

Siulittaasoq siulersuisunulluunniit ilaasortaq piffissap toqqagaaffiup naannginnerani tunuarpat toquppalluunniit, toqqagaaffiup sinneranut taartaasussamik Naalakkersuisut toqqaassasut aalajangersarneqarpoq.

#### *§ 33-mut*

Siulersuisut suleriaasissartik nammineq aalajangersassagaat aalajangersakkami aalajangersarneqarpoq.

Suleriaasissaq assersuutigalugu ataatsimiittarnerit amerlassusissaannut tunngasunik ataatsimiittarnerillu qanoq nalunaarutigineqartarnissaannut aalajangersakkanik imaqsinnaavoq. Siulersuisut namminneq siulittaasup tullissaanik qinersisinnaanerannut periarfissat eqqarsaatigalugit aalajangersakkanik imaqsinnaavortaaq.

#### *§ 34-mut*

Imm. 1-imut

Siulersuisut namminneq allaffeqarfimmik pilersitsissasut aalajangersakkami aalajangersarneqarpoq.

#### Imm. 2-mut

Allaffeqarfiup meerartaarnermut atatillugu sulinngiffeqarnermut aningaasaateqarfimmi ulluinnarni suliassat, matumani utertitassat tunniunneqartarnerinut atatillugu suliassanik sularinninneq ilanngullugu, isumagissavai, kiisalu ukiumoortumik nalunaarutit ukiumoortumillu naatsorsuutit sularineqartarnerannut peqataasassalluni.

#### Imm. 3-mut

Qassinik kikkunnillu allaffeqarfimmi sulisussanik atorfinitsitsissanerlutik siulersuisut piginnaatinneqarput, taamaaqataanillu soraarsitsisoqassanersoq namminneq aalajangissallugu.

Siulersuisut matumani piffissami killilikkami suliassat aalajangersimasut isumagineqarnissaannut sulianut atatillugu immikkut ilisimasalinnik atorfinitsitsisinnaapput.

Sulisoqarnermut aningaasartuutit meerartaarnermut atatillugu sulinngiffeqarnermut aningaasaateqarfiup missingersuutaanit akilerneqartassapput.

### § 35-mut

#### Imm. 1-imut

Siulersuisunut ilaasortatut atuunneq akissarsiaqaataanngilaq.

#### Imm. 2-mut

Siulersuisunut ilaasortat siulersuisut ataatsimiinnerinut peqataajartorlutik najugaqarfimminnit aallartariaqartut Inatsisartuni Naalackersuisunilu il.il. ilaasortat aningaasarsiaqartitaanerat il.il. pillugit Inatsisartut inatsisissaanni malittarisassat malillugit ullormusiaqartinneqarlutillu angalanermi aningaasartuutitik taarsiivigineqarsinnaasut aalajangersakkami aalajangersarneqarpoq.

Ullormusianut angalanernullu aningaasartuutininut matusissutissanut aningaasartuutit meerartaarnermut atatillugu sulinngiffeqarnermut aningaasaateqarfiup missingersuutaasa iluannit aningaasartuutigineqartassapput.

### § 36-mut

Meerartaarnermut atatillugu aningaasaateqarfiup aqunneqarnissaanut, ilaatigut akiliissutissat utertinneqartussallu annertussutissaasa naatsorsornissaannut, piffissap utertitsiviusussap takissusissaata aalajangerneqarnissaanut, akiliissutissanik akiliisitsiniarnissamut kiisalu utertitsissutsit akilerneqarnissaannut, sulisitsisunit pisortanilu oqartussaasunit paasissutissanik piniartoqarsinnaanera piumasajaataamat, sulisitsisunit, kommuninit, akileraartarnermik ingerlatsivimmit aamma pisortani oqartussaasuni allani, paasissutissanik naleqquttunik meerartaarnermut atatillugu aningaasaateqarfik pissarsiniarsinnaasoq aalajangerneqarpoq.

Paasissutissat taaneqartut tunniunneqarnissaat pisussaaffiuvoq.

*§ 37-mut*

Imm. 1-imut

Sulisitsisunut namminersortunut meerartaarnermut atatillugu sulinngiffeqarnermut aningaasaateqarfimmi siulersuisut ukiut tamaasa Naalackersuisunut nalunaarusiortassasut aalajangersakkami aalajangersarneqarpoq.

Nalunaarusiaq ukiut tamaasa kingusinnerpaamik 1. aprili tunniunneqartassaaq. Tamanna Namminersornerullutik Oqartussat Missingersuusiortarnermi malittarisassaannut 2008-imeesumut naapertuuppoq, aamma aningaasaateqarfiup missingersuutaata, kiisalu qaffasinnerpaamik akigititamut siunnersuutip sulisitsisullu akileeataassutissaasa annertussusissaasa ukiumut tulliuuttumut aningaasanut inatsisissamut ilanngunneqarnissaannut qulakkeerinnissaaq.

§ 52 malillugu sulisitsisut akileeataassutissaata annertussusissaanut siunnersuummik nalunaarusiaq imaqaassaaq aamma § 27, imm. 4 malillugu ukiumut aningaasarsiorfiusumut tulliuuttumut akigititap qaffasinnerpaaffissaanut siunnersuummik imaqaassalluni.

Ilaatigut erninerit amerlassusiinik naatsorsuinerit siulittuinerillu aamma meerartaarnermut atatillugu sulinngiffeqarnermut aningaasaateqarfiup imminut aningaasalersornissaa tunngavigalugit akileeataassutissamut aamma qaffasinnerpaamik akigititamut siunnersuut aalajangersarneqartassaaq.

Ukiumut tulliuuttumut meerartaarnermut atatillugu sulinngiffeqarnermi aningaasaateqarfiup aningaasarsiassatut aningaasartuutissatullu naatsorsuutigisaanik missingersuutissamut siunnersuummik siunnersuut imaqaassaaq.

Ukiumut missingersuusiortfiusumut tullermut akileeataassutissap annertussusissaanut siulersuisut siunnersuutaata malinnissaanut Naalackersuisut pisussaaffeqanngillat, akileeataassut aamma qaffasinnerpaamik akissarsiassamut akigititaq Sulisoqarnermut akitsuut pillugu Inatsisartut inatsisaat malillugu aningaasanut inatsimmi Inatsisartunit aalajangersarneqartarmat.

Naalackersuisunut nalunaarusiaq akiliutigineqarsimasut pillugit kisitsisit atorlugit nalunaarsuusiornernik aammattaaq imaqaassaaq, matumani assigiinnik suliaqarfinni sulinngiffeqarnerit sapaatit akunnerinut agguarneqarsimasut, suaassuseq kiisalu sulinngiffeqarneq naartunermet, meerartaarnermut atatillugu sulinngiffeqarnermet, meeravissartaarnermet imaluunniit angajoqqaatut sulinngiffeqarnermet atatillugu sulinngiffeqarnerunersut ilanngullugit.

#### Imm. 2-mut

Nalunaarusiamut piumasaqaatinik amerlanerusunik aalajangiisinaanermut Naalakkersuisut piginnaatinneqarput, matumani nalunaarusiap kingusinnerpaamik tunniunneqartarnissaannut piffissaliinissaq ilanngullugu. Ukiumut aningaasarsiorfiusumut tullermut aningaasanut inatsisissatut siunnersuutip suliaqarneranut nalimmassakkamik, piffissaliisoqarnissaa naatsorsuutigineqarpoq.

#### § 38-mut

#### Imm. 1-imut

Siulersuisut meerartaarnermut atatillugu sulinngiffeqarnermut aningaasaateqarfik pillugu ukiumoortumik nalunaarusiortassasut aalajangersarneqarpoq. Ukiumoortumik nalunaarut meerartaarnermut atatillugu sulinngiffeqarnermut aningaasaateqarfiup naatsorsuutaanik imaqassaaq.

Ukiumoortumik naatsorsuusiortarnermut malittarisassat atuuttut naapertorlugit naatsorsuutit suliarineqarlutillu tunniunneqartassapput.

Ukiumi naatsorsuuteqarfiusumi aningaasaateqarfiup aningaasarsiai aningaasartuutaalu pillugit paasissutissanik, kiisalu ukiumoortumik angusat taakkulu qanoq atorneqarsimanerannik, allaffissornermut aningaasartuutit aamma immikkoortitat pillugit paasissutissanik imalimmik erseqqissumik paasiuminartumillu siulersuisut ukiumoortumik naatsorsuusiortarnissaannut aalajangersakkakut pisussaaffilerneqarput.

#### Imm. 2-mut

Sulisitsisunut namminersortunut meerartaarnermut atatillugu sulinngiffeqarnermut aningaasaateqarfiup naatsorsuutai, kukkunersiuisumit nunatta karsiata naatsorsuutaanik kukkunersiuisartumit kukkunersiorneqartassammata maluginiarneqassaaq. Kukkunersiuiineq Namminersorlutik Oqartussat naatsorsuutaat pillugit inatsisiliornerni qaqugukkulluunniit atuuttuni malittarisassat malillugit pisassasooq ilanngullugu aalajangersarneqarpoq.

#### Imm. 3-mut

Ukiup naatsorsuuteqarfiup naanerani qaammatit sisamat qaangiutsinnagit naatsorsuutit atsiorneqarnissaannut aalajangersakkakut siulersuisut pisussaaffilerneqarput. Ukiumoortumik naatsorsuutit atsiorneqarsimanngitsut imaluunniit ukiumoortumik naatsorsuutit siulersuisunut ilaasortanit tamarmiusunit atsiorneqarsimanngitsut eqqortumik saqqummiunneqartutut isigineqanngillat.

#### § 39-mut

#### Imm. 1-imut

Meerartaarnermut atatillugu sulinngiffeqarnermut aningaasaateqarfik Naalakkersuisunit nakkutilliivigineqartassasoq aalajangersakkami aalajangersarneqarpoq.

Paasissutissat meerartaarnermut atatillugu sulinngiffeqarnermut aningaasaateqarfimmut akiliuteqarnermut tassanngaanniillu tunniussaqaarnermut tunngaviusimasut nakkutilliinermi aallaavittut pineqassapput.

Imm. 2-mut

Nakkutilliinerup ingerlanneqarnissaanut pisariaqartunik paasissutissanik Naalakkersuisut pissarsisinnaatitaassapput. Aammata paasissutissat pissarsiaqartinneqartut nammineq ilumit paasissutissaataagaluarpataluunniit imaluunniit paasissutissanik inummut tunngassuteqartunik imaqaraluarpataluunniit tamanna atuuppoq.

Imm. 3-mut

Meerartaarnermut atatillugu sulinngiffeqarnermut aningaasaateqarfimmik nakkutilliinerup piareersarneqarnera imarisassaalu pillugit malittarisassanik aalajangersaasinnaanissamut Naalakkersuisut piginnaatinneqarput, matumani akiliutaasartut tunniunneqartartullu nakkutigineqarnerat ilanngullugit.

Assersuutigalugu kikkut nakkutilliinermik isumaginninnissaat nakkutilliinerlu qanoq siumut nalunaarutigineqartassanersoq ulluinnarnilu qanoq ingerlanneqartarnissaa pillugit malittarisassanik aalajangersakkat imaqarsinnaapput.

Taagorneqartut tamakkiisuunngillat.

#### *§ 40-mut*

Imm. 1-imut

Inuit sulinnginnermi- imaluunniit sulinngiffeqarnermi meerartaarnermut atatillugu ullormusiaqarsinnaasunut aalajangersakkap erseqqissaavigai.

Nr. 1-imut

Inuk sulinngiffeqarsinnaatitaanermut sulinngissinnaatitaanermulluunniit ilaatinneqassaaq meerartaarnermut atatillugu sulinngiffeqarnermi ullormusiaqarsinnaatitaassaguni. Tamanna ilaatigut pineqartup inunnet § 1-imi pineqartunut ilaanissaanik isumaqarpoq.

Piumasaqaatit kapitali 1-imi aalajangersarneqartut tunngavigalugit pineqartoq taamatuttaaq sulinngiffeqassaaq sulinaniluunniit, soorlu aamma piffissamut kapitali 1-imi aalajangersarneqartumut taamaallaat meerartaarnermut atatillugu sulinngiffeqarnermi ullormusianik tunniussisoqarsinnaassasoq.

§ 3, imm. 1 malillugu naartusoq ernivissatut naatsorsuutigineqartoq sapaatit akunnerinik 5-nik sioqqullugu, tamanna ilinniarnep immikkoortuata naammassineranut naapertuunera pissutigalugu ilinniarnep sulinngiffeqartoq, kapitali 1-imi aalajangersakkat malillugit sulinngissinnaatitaasunut ilaatinneqanngikkuni, taamaalilluni erninissamut naatsorsuutigineqartup sapaatit akunnerisa 4-nngorneriniit aallaavittut meerartaarnermut atatillugu sulinngiffeqarnermi ullormusiaqarsinnaatitaalissaaq.

Taamatuttaaq angajoqqaq §§ 16-18 –imiittuni avaqqutsisinnaanermut aalajangersakkanut ilaatinneqanngippat, angajoqqaq meeqqani najornagu sulinngiffeqartoq piffissami sulinngiffeqarfigisamini meerartaarnermut atatillugu sulinngiffeqarnermi ullormusiaqarsinnaatitaassanngilaq.

Assersuutit tamakkiisuunngillat.

Nr. 2-mut

Piffissap sulinngiffissap imaluunniit sulinngiffeqarfiusussap nallernissaa sioqqullugu sapaatit akunnerini kingullerni 13-imi pineqartoq suliffeqarfeqarfimmut attuumassuteqarsimassasoq, namminersorluni inuussutissarsiuteqarsimasoq imaluunniit ilinniagaqarsimassasoq piumasaqaataavoq.

Pineqartup sapaatit akunnerini kingullerni 13-imi akissarsiaqarluni sulisimanissaa suliffeqarfeqarfimmut attuumassuteqarnermi pineqarpoq. Pineqartup nalunaaquttap akunnerini qassini suliffeqarsimanissaa pingaaruteqanngilaq, taakkuli § 41 malillugu pineqartup tigusassaasa naatsorsorneqarnerinut ilaassapput.

Namminersorlutik inuussutissarsiuteqartut taamatuttaaq ilaatinneqarput. Namminersorlutik inuussutissarsiutillit eqqarsaatigalugit malittarisassat erseqqinnerusut §§ 48-49-mi allaaserineqarput.

Inuit piffissaq sulinngiffissaq imaluunniit sulinngiffeqarfiusussaq sioqqullugu ilinniagaqarsimasut taamatuttaaq ilaatinneqarput. Tamatumani pineqarput inuit ilinniakkaminnit sulinngitsut imaluunniit sulinngiffeqartut, kiisalu inuit sulinngilernerminni sulinngiffeqalinnginnerminniluunniit sapaatit akunnerisa kingullit 13-it iluanni ilinniakkamik naammassinnissimasut.

”Piffissaq sulinngiffeqarfiusup nallernissaa sioqqullugu”-mi pineqarpoq piffissaq sulinngiffeqarfiusoq kipineqarani tamarmiusoq pineqartup sulinngiffeqarfigisaa.

Anaanaasoq ernivissamisut naatsorsuutigineqartoq sapaatit akunnerinik 4-nik sioqqullugu sulinngiffeqalernermini meerartaarnermut atatillugu sulinngiffeqarnermi ullormusiaqarsinnaanermut piumasaqaatinik naammassinnittoq, § 3, imm. 1-3 malillugit sulinngiffeqarnerminut uiggiullugu § 12 malillugu angajoqqaatut sulinngiffeqarneq

aallartikkuniuk, taamaalilluni aamma meerartaarnermut atatillugu sulinnigiffeqarnermi ullormusiaqarsinnaatitaassaaq.

§ 7 malillugu ullormi sulinnigiffeqalerfimmimi piumasaaqatit naammassisimagunigit, ataataq anaanaaqataasorluunniit § 7 malillugu sulinnigiffeqalersoq tamatumalu kingorna kipitinneqanngitsumik § 12 malillugu angajoqqaatut sulinnigiffeqalersoq, taamatutaaq meerartaarnermut atatillugu sulinnigiffeqarnermi ullormusiaqarsinnaatitaassaaq. §§ 7 aamma 12 malillugit sulinnigiffeqarneri ataqatigiissumik ingerlanneqanngippata, taava ullormi § 7 malillugu sulinnigiffeqalernermini kiisalu ullormi § 12 malillugu sulinnigiffeqalernermini piumasaaqatit naammassisimassavai.

Kapitali 1 malillugu piffissat sulinnigiffiusut § 41, imm. 2 malillugu meerartaarnermut atatillugu sulinnigiffeqarnermi ullormusiat naatsorsorneqarneranni ilaatinneqassanngillat.

Nr. 3-mut

Inuk piffissami meerartaarnermut atatillugu sulinnigiffeqarfiusumi akissarsiaqartoq allanilluunniit assigisaanik ikiorsiissutisisartoq, nalunaaquttap akunneri taakku eqqarsaatigalugit meerartaarnermut atatillugu sulinnigiffeqarnermi aamma ullormusiaqarsinnaatitaassanngilaq.

Pissutsit, meerartaarnermut atatillugu sulinnigiffeqarnermi ullormusiat taamaanngippat matussusigassaraluinik, akissarsiaqarsinnaatitaanermi ikiorsiissutisiaqarsinnaatitaanermilluunniit aningaasarsiat tunngassutillit, aalajangersakkami pineqarput.

Akissarsialik sapaatip akunneranut nalunaaquttap akunneri 40 nalinginik akissarsiaqartartoq, taamaalilluni nalunaaquttap akunneri 40-t taakku akissarsiaqarfigiitigalugit meerartaarnermut atatillugu sulinnigiffeqarnermi ullormusiaqarsinnaatitaanngilaq.

§ 41, imm. 4 malillugu inuk taamaattoq aningaasarsianit assigiinngitsunit 2-nit akissarsiaqarlunilu meerartaarnermut atatillugu sulinnigiffeqarnermi ullormusiaqarsinnaavoq.

Meeqqat tapersorsorneqarnissaannut Inatsisartut Inatsisaat malillugu ilaqutariinnut paarsisartunut, ilaqutariinnut oqilisaassisartunut aamma pinasuartumik pisoqartillu ilaqutariinnut paarsisartunut akissarsiaritinneqartartut, meerartaarnermut atatillugu ullormusianut taarsiullugit akissarsiatut isigineqassanngillat. Taamaammatt § 41, imm. 5 malillugu angajoqqaarsiaq paaqqinninersiutisisinnaavoq aamma suli meerartaarnermut atatillugu sulinnigiffeqarnermi ullormusiaqarsinnaatitaalluni. Inuussutissarsiutigalugu angajoqqaarsiat paaqqinninersiutisitinneqarneq ajormata, kisiannili akissarsitinneqartarmata, tamannalu aningaasarsiatut isigineqarmat, maluginiarneqassaaq.

Imm. 2-imut

Inunnut pinerluttunik isumaginnittoqarfiup ataani isertitsivimmiittut meerartaarnermut atatillugu sulinngiffeqarnermi ullormusiaqartitsisoqarsinnaangimmata aalajangersakkami aalajangersarneqarpoq.

#### § 41-mut

##### Imm. 1-imut

Meerartaarnermut atatillugu sulinngiffeqarnermi ullormusianik tiguisussap sulinngiffeqarnerup sulinnginnerluunniit aallartinnera sioqqullugu sapaatit akunnerini 13-ini nalunaaquttap akunnerini suliffigisimasaasa agguaqatigiissinneqarneranit meerartaarnermut atatillugu sulinngiffeqarnermi ullormusiat naatsorsorneqassasut, aalajangersakkami aalajangersarneqarpoq.

Sulinnginneq- imaluunniit sulinngiffeqarneq sapaatit akunnerinik 13-inik sioqqullugu, inuup pineqartup agguaqatigiissillugu sapaatip akunneranut nalunaaquttap akunnerini qassini sulisimanagera, inuup aningaasanik qassinik pisinnaatitaaneranut taamaalilluni apeqqutaassaaq.

Assersuutigalugu inuk sulinngiffeqarneq sioqqullugu sapaatit akunnerisa kingulliit 13-it iluanni nalunaaquttap akunnerini 260-ini sulisimasooq, sapaatip akunneranut agguaqatigiissillugu nalunaaquttap akunnerini 20-ini sulisimassaaq, taamaammallu § 42 malillugu nalunaaquttamut ataatsimut meerartaarnermut atatillugu sulinngiffeqarnermi ullormusiaritinneqartumut akigititap 20-eriaataata assinganik meerartaarnermut atatillugu sulinngiffeqarnermi ullormusiaqartinneqassalluni.

##### Imm. 2-mut

Imm. 1 malillugu naatsorsuineri piffissat suut piffissamik naatsorsuineri mut tunngaviusussamut ilaatinneqassannginnersut aalajangersakkami aalajangersarneqarput.

Assersuutigalugu inuk pineqartoq sapaatit akunnerisa kingullit 13-it ingerlaneranni sapaatip akunnera ataaseq feeriarimappat, taava piffissamik nalunaarsuineri sapaatit akunnerini aqqaneq-marlunni feeriarfiunngitsuni piffissaq suliffiusooq tunngavigineqassaaq.

Inuup pineqartuni sapaatit akunnerisa kingulliit 13-it iluanni suliffeqarsimanissaa suli piunaaqataavoq. Taamaalilluni inuk napparsimanini pissutigalugu sapaatit akunnerini 13-ini tamani suliffeqarsimanngitsoq meerartaarnermut atatillugu sulinngiffeqarnermi ullormusiaqarsinnaatitaanerit ilaatinneqassanngilaq.

##### Nr. 1

Piffissat pineqartup napparsimanini pissutigalugu suliffigisinnaasimaffiginngisai naatsorsuineri mut ilaatinneqassanngillat. Tamatumani pineqarput piffissat pineqartup napparsimanini pissutigalugu suliffigisimanngisai, taamatullu aamma piffissat pineqartup napparsimanini pissutigalugu suliffeqarfigisimanngisai.



Nr. 2

Inatsisartut inatsisaat manna malillugu sulinnginnerit pissutigalugit piffissat pineqartup suliffigisimanngisai piffissamik nalunaarsuinnermut ilaatinneqassanngillat.

Tamatumani pineqarput piffissat inuup pineqartup sulinngiffeqarsimanini pissutigalugu suliffigisimanngisai, kiisalu §§ 4-6 malillugit naartusut sulinnginneri.

Naartusooq § 6, imm. 3 malillugu nalunaaquttap akunnerini suliffiusartuni appartinneqarsimasumi sulisimappat, taava nalinginnaasumik akunnerit suliffigisarsimasai aallaavigalugit piffissamik naatsorsuineq suliarineqassaaq.

Nr. 3

Pissutsit avataaneersut pissutigalugit piffissap ilaani suliffissaaleqisarneq, assersuutigalugu tunisassiassaaleqineq silallu qanoq innera, naatsorsuinnermi ilaatinneqassanngillat.

Aalajangersagaq tamakkiisuunngilaq, kisianni pisut ilimagineqarsinnaanngitsuunissaat uani pingaaruteqarluinnarpoq. Sulisumut sulisitsisumullu pisoq ilimagineqarsinnaanngitsuussaaq.

Assersuutigalugu uani pineqarpoq suliffissuup maskiinat ajoquserneri pissutigalugit tunisassiorunnarsimanera, niuertarfik ikuallassimasooq imaluunniit atuarfik ulluuneraniluunniit paaqqinniffik minguitsumik imertoqarsinnaannginnera pissutigalugu matoqqasariaqalersimasooq.

Uani piffissap ilaanni suliffissaaleqisarneq pineqanngilaq, assersuutigalugu inuk taamaallaat sapaatip akunnerani ullut 3 sulisarpat ullullu sinneri sulinani, imaluunniit inuk sipaartoqarnera assigisaaluunniit pissutigalugu sapaatip akunnerani sivikinnerusumik sulisalernerana pineqanngilaq.

Nr. 4.

Feeriarnerit naatsorsuinnermi ilaatinneqassanngillat. Tamanna akissarsiaqarluni akissarsiaqaraniluunniit feeriarnermut atuuppoq.

Nr. 5.

Inuup suliffimminiiginnarnissaanut pingaaruteqartumik ilinniaqqinneq imaluunniit ilinniarnarup nangeqqinnera pineqartillugu, akissarsiaqarani ilinniaqqinneq imaluunniit ilinniarnarup nangeqqinnera naatsorsuinnermi ilaatinneqassanngillat.

Imm. 3-mut

Sapaatip akunneranut nalunaaquttap akunnerinit 14-inik ikinnerusunik inuk meerartaarnermut atatillugu sulinngiffeqarnermi ullormusianik pisinnaanngilaq. Sulisimanerup naatsorsorneqarnerata takutippagu sapaatip akunneranut agguaqatigiissillugu sulisimaneq nalunaaquttap akunnerinik 14-inik sivikinnerusooq, taamaattoq inuk sapaatip akunneranut

nalunaaquttap akunnerinut 14-inut meerartaarnermut atatillugu sulingiffeqarnermi ullormusiaqartinneqarnissamik pisinnaatitaavoq.

Inunnut agguaqatigiissillugu sapaatip akunneranut nalunaaquttap akunneri 14-it sinnerlugit sulisartunut aalajangersagaq attuumassuteqanngilaq.

Imm. 4-mut

Inuk sulingiffeqarnermini meerartaarnermut atatillugu sulingiffeqarnermi ullormusiaqarnissamik aamma sulingiffeqarnermini akissarsiaqarnissaminik pisinnaatitaasinnaavoq. Taamaattoq inuk katillugit nalunaaquttap akunnerinut amerlanerpaamik 40-nut akissarsiaqarlunilu meerartaarnermut atatillugu sulingiffeqarnermi ullormusiaqarsinnaatitaavoq.

Inuk ilinniartuq peqatigisaanillu piffissap ilaani sulisartuq, assersuutigalugu sulingiffeqarnermini ilinniartuunersiuutisiaminut taarsiullugu meerartaarnermut atatillugu sulingiffeqarnermi ullormusianik tiguisinnaassaaq, peqatigisaanillu piffissap ilaani sulinerminit inuk piffissap ilaani sulingiffeqarnerminit akissarsiaqartinneqarsinnaalluni.

Assigisaanik inuk namminersorluni inuussutissarsiuteqartoq akissarsiaqartuusorlu, akissarsiaqarluni namminersorluni inuussutissarsiuteqarnermini aningaasarsiasaraluaaminut matussutissanik, meerartaarnermut atatillugu sulingiffeqarnermi ullormusianik pisinnaavoq.

Sulinginnermi imaluunniit sulingiffeqarnermi meerartaarnermut atatillugu sulingiffeqarnermi ullormusianit akissarsiat salliutinneqassapput.

Inuk assersuutigalugu sapaatip akunneranut nalunaaquttap akunnerini 30-ini akissarsiaqarluni sulisimasoq nalunaaquttallu akunnerini 15-ini namminersortutut sulilluni taamaallaat nalunaaquttap akunnerinut quliut meerartaarnermut atatillugu sulingiffeqarnermi ullormusiaqartinneqassaaq.

Imm. 5-imut

Paaqqinninersiutit angajoqqaarsianut tunniunneqartartut angajoqqaarsiat meerartaarnermut atatillugu sulingiffeqarnermi ullormusiaqarsinnaatitaanerannut sunniuteqanngimmata aalajangersakkami erseqqissarneqarpoq.

Tassunga atatillugu paaqqinninersiutisiat akissarsiatut isigineqanngillat, aamma meerartaarnermut atatillugu sulingiffeqarnermi ullormusiat naatsorsorneqarneranni ilaatinneqanngillat.

Angajoqqaarsiaq nalunaaquttap akunnerini 40-ni atorfinitsinneqartoq, nalinginnaasumillu paaqqinninersiutisartuq, nalunaaquttap akunnerinut 40-nut meerartaarnermut atatillugu sulingiffeqarnermi ullormusiaqarnissaminut suli pisinnaatitaassaaq. Angajoqqaarsiat

paaqqinninersiutisisinnaatitaanerat meerartaarnermut atatillugu sulinngiffeqarnermi ullormusiaqarsinnaatitaanermit sunnerneqarneq ajorpoq.

Angajoqqaarsiaq qaffatamik paaqqinninersiutisiaqartinneqartoq peqatigisaanillu piffissap ilaanni, sapaatip akunneranut nalunaaquttap akunnerini 30-ini sulisartup, taamaalilluni nalunaaquttap akunnerinut 30-inut meerartaarnermut atatillugu sulinngiffeqarnermi ullormusiaqartinneqassaaq, tamatumalu peqatigisaanik qaffatamik paaqqinninersiutisiaqartarluni.

Angajoqqaarsiat meeqqamik paaqutassaminnik tigusinerannut atatillugu sulinngiffeqarnerannut aamma angajoqqaarsiat nammineq meeqqamik sulinngiffeqaatigineranni pissutsit aalajangersakkami pineqarput.

Inuussutissarsiutigalugu ilaqutariit paarsisartut ataatsikkut paaqqinninersiutisianik meerartaarnermullu atatillugu sulinngiffeqarnermi ullormusianik pisinnaatitaangillat. Inuussutissarsiutigalugu ilaqutariit paarsisartut angajoqqaarsiatut atorfinitsinneqartarnerat tamatumunnga pissutaavoq. § 40 malillugu meerartaarnermut atatillugu sulinngiffeqarnermi ullormusiat taamaallaat sulinnginnerni sulinngiffeqarniluunniit tunniunneqarsinnaapput. § 19 malillugu sulinngiffeqarnerup nalaani sulinissaq periarfissaanngilaq. Inuussutissarsiutigalugu angajoqqaarsiaq, nammineq meeqqaminik paarsiniarluni sulinngiffeqartoq, piffissamilu tassani angajoqqaarsiatut sulinngitsoq, meerartaarnermut atatillugu sulinngiffeqarnermi ullormusiaqartinneqarsinnaavoq.

#### *§ 42-mut*

##### *Imm. 1-imut*

Meerartaarnermut atatillugu sulinngiffeqarnermi ullormusiat nalunaaquttap akunneranut akigititaq aalajangersimasoq tunngavigalugu tunniunneqartassasut, taakkulu Sulinermik Inuussutissarsiuteqartut Kattuffiata (SIK) pisortallu sulisitsisuisa suliamik ilinniagaqanngitsut 18-inik ukioqalereersimasut pillugit isumaqatigiissutaat qaqugukkulluunniit atuuttoq malillugu akissarsiat ikinnerpaaffissaannut naapertuuttumik aallaaveqassasoq aalajangersakkami aalajangersarneqarpoq.

##### *Imm. 2-mut*

Meerartaarnermut atatillugu sulinngiffeqarnermi ullormusiamut akigititaq isumaginninnermi ikiorsiissutit tunniunneqartartut pillugit kaajallaasitami, naalackersuisoqarfimmit isumaginninnermut akisussaasuusumit ukiumut ataasiarluni aalajangerneqartarpoq.

Imm. 1 malillugu naalackersuisoqarfiup isumaginninnermik akisussaasuusup meerartaarnermut atatillugu sulinngiffeqarnermi ullormusiamut akigititaq, akissarsiat minnerpaaffiiniq aallaaveqartoq, aalajangersartarpaa. Taamaammatt akissarsiat minnerpaaffissaat malissallugu naalackersuisoqarfik pisussaataannngilaq. Assersuutigalugu

isumaqatigiissut piffissamut ingerlareersumut pisussaaffiliisoq, meerartaarnermut atatillugu sulinngiffeqarnermi ullormusianut akigititamut kingumut aaqqiinissamik kinguneqassanngilaq.

Akigititaq ukioq ataasikkaarlugu aalajangersarneqartarpoq. Ukiup ingerlanerani isumaqatigiissutit allanngortinneqarsimagaangata Isumaginninnermi ikiorsiissutit tunniunneqartartut pillugit kaajallaasitami akigititat atuuttassapput.

Kaajallaasitaq Naalackersuisut internettikkut quppersagaanni tamanut saqqummiunneqartarpoq.

Imm. 3-mut

Meerartaarnermut atatillugu sulinngiffeqarnermi ullormusiat feeriarnersiuteqaatigineqarsinnaanngitsut aalajangersakkami aalajangersarneqarpoq.

#### *§ 43-mut*

Imm. 1-imut

Inatsit manna tunngavigalugu meerartaarnermut atatillugu sulinngiffeqarnermi ullormusiat tunniunneqarnissaannik qinnuteqaat qinnuteqartup aalajangersimasumik najugaqarfigisaani inuillu nalunaarsorsimaffiannut nalunaarsorneqarfigisaani kommunalbestyrelsimut tunniunneqassasoq, aalajangersakkami aalajangersarneqarpoq.

Imm. 2-mut

Qinnuteqartoq sumiiffimmi nunatta kommuneqarfinnut aggorneqarnerata avataanii aalajangersimasumik najugaqarpat, qinnuteqaat Naalackersuisunut tunniunneqassasoq aalajangersakkami aalajangersarneqarpoq, taakkulu suliamik suliarinnineq suliarissavaat.

Kalaallit Nunaata nunap immikkoortuinut kommuneqarfinnullu aggorneqarnera pillugu Inatsisartut inatsisaanni nr. 34-mi, 23. november 2017-imeersumi § 5 malillugu sumiiffiit uku kommuneqarfinnut aggorneqarnerup avataatigut ingerlanneqarput:

- 1) Kalaallit Nunaata illersornissaa pillugu Angerfigeqatigiissut 27. april 1951-imeersoq malillugu danskit Amerikamiullu sakkutooqarfii (Pituffik).
- 2) Tunup Avannaani Nuna Allanngutsaaliugaq.

Imm. 3-mut

Meerartaarnermut atatillugu sulinngiffeqarnermi ullormusiaqarumalluni qinnuteqaat meerartaarnermut atatillugu sulinngiffeqarnermi ullormusiaqarsinnaatitaanerup atuutileranerani qaammatit tallimat qaangiutinnginneranni tunniunneqanngippat meerartaarnermut atatillugu sulinngiffeqarnermi ullormusiaqarsinnaatitaaneq atorunnaassasoq aalajangersakkami aalajangersarneqarpoq.

Ullormusiaqarsinnaatitaaneq ullormit siullermit, pineqartup meerartaarnermut atatillugu sulinngiffeqarnermi ullormusiaqarfigisinnaaligaanit atuutilertarpoq.

Tamanna nalinginnaasumik tassaassaaq sulinngiffeqarnermi sulinnginnermiluunniit ulloq siulleq. Inuit piffissap sulinngiffeqarfiusup ilaani akissarsiaqartut eqqarsaatigalugit, ullormusiaqarsinnaatitaaneq ullormit siullermit pineqartup akissarsiaqarunnaarfianiit atuutilissaaq.

#### *§ 44-mut*

##### *Imm. 1-imut*

Meerartaarnermut atatillugu sulinngiffeqarnermi ullormusiat aallaaviatigut sapaatit akunneri 2-kkaarlugit tunniunneqartarput. Taamaattoq pisortanit ikiorsiissutit tunniunneqartarnerinut tunngaviit malillugit piffissamut sapaatit akunnerinik 2-nnik sivikinnerusumut pisarsinnaasoq kommunalbestyrelsip aalajangersinnaagaa aalajangersakkami periarfissinneqarpoq.

##### *Imm. 2-mut*

Pissutsit immikkut ittut tamanna tunngavissaqartippassuk, meerartaarnermut atatillugu sulinngiffeqarnermi ullormusiat tamakkiisumik ilaannakoortumilluunniit nioqqutissanik pisissutissanngorlugit tunniunneqarnissaat, kommunalbestyrelsip aalajangersinnaagaa aalajangersakkami aalajangersarneqarpoq.

Sulinngiffeqartup meerartaarnermut atatillugu sulinngiffeqarnermi ullormusiani tamaasa ullut ikittunnguit ingerlanerinnaanni atugassai, taamaalilluni nerisassanut, atisanut pisariaqartinneqarsinnaasunullu allanut akissaarunnissaa aarlerinaateqarpat, taava meerartaarnermut atatillugu sulinngiffeqarnermi ullormusiat nioqqutissanik pisissutissanngorlugit tunniunneqarsinnaapput. Tamanna aamma pisortanit ikiorsiissutinik tunniussisarnermut tunngaviit malippaat.

##### *Imm. 3-mut*

Pisuni immikkut ittuni meerartaarnermut atatillugu sulinngiffeqarnermi ullormusiat kommunalbestyrelsimit tamakkiisumik ilaannakoortumilluunniit aqunneqassanersut pillugit kommunalbestyrelsip aalajangiisinaanera aalajangersakkap malitsigaa.

#### *§ 45-mut*

##### *Imm. 1-imut*

Inatsit manna malillugu meerartaarnermut atatillugu sulinngiffeqarnermi ullormusiaqartooq pissutsit nammineq meeqqalluunniit atugaasa allannguutaat tamaasa ullormusiaqarsinnaatitaanerup annikillisinneqarneranik atorunnaarneranilluunniit nassataqarsinnaasut pillugit, oqartussaasumut meerartaarnermut atatillugu sulinngiffeqarnermi

ullormusianik tunniussisartuusumut nalunaarutigissallugit pisussaaffeqartoq aalajangersakkami aalajangersarneqarpoq.

Sulinngiffeqartoq meerartaarnermut atatillugu sulinnigiffeqarnermi ullormusiaqartoq pissutsit suugaluartulluunniit sulinnigiffeqartup suli meerartaarnermut atatillugu sulinnigiffeqarnermi ullormusiaqarsinnaatitaaneranut pingaarutillit pillugit kommunalbestyrelsimut nalunaarutiginnittussaataavoq. Nalunaarutiginnittussaataaneranut taamaallaat ilaapput paasissutissat paasissutissanut kommunalbestyrelsip pigeriigaanut sanilliullugit allannguuteqarsimasut.

Nalunaarutigineqartussaataasunut ilaatigut ilaapput sulinnigiffeqartup sulinnigiffeqarnerminik kipititsinera, kiisalu sulinnigiffeqartup sulinnigiffeqarnermini aningaasanik tunniuttakkanik pissarsiarisimasai, matumani, taakkununngaannarli killilernagit, feeriarnermi ajunngitsorsiassat, sulinermi aningaasarsiassaraluanut annaasanut taarsiissutit ikiorsiissutilluunniit assingusut allat, piffissamut sulinnigiffeqartup meerartaarnermut atatillugu sulinnigiffeqarnermi ullormusiaqarfigisimasaanut tunngasut ilanngullugit.

Sulinngiffeqartup § 13 malillugu ilaannakoortumik sulilenera taamatuttaaq nalunaarutiginnittussaataaneranut ilaavoq.

*Imm. 2-imut*

Meerartaarnermut atatillugu ullormusianik tiguisartumut atugassarititaasut meerartaarnermut atatillugu sulinnigiffeqarnermi ullormusianik tiguisinnaanermik pisinnaatitsiunnaarnersut nalilerniarlugu, kommunalbestyrelsip oqartussaasunit allanit paasissutissanik piniarsinnaanerata periarfissiissutigineqarnera aalajangersakkami tunngavilerneqarpoq.

Meerartaarnermut atatillugu sulinnigiffeqarnermi ullormusiat tunniunneqartartut kommunalbestyrelse nakkutilliisinnaanermik aalajangersakkakut periarfissinneqarpoq. Assersuutigalugu tiguisup aningaasarsiai akileraarutaasussat pillugit akileraartarnermut oqartussaasunit paasissutissanik kommunalbestyrelse piniarsinnaavoq taamaalillunilu inuup meerartaarnermut atatillugu sulinnigiffeqarnermi ullormusisartup piffissami tassani akissarsiaqartinneqarnera nakkutigissallugu.

*Imm. 3-mut*

Pissutsit imm. 1-imi taaneqartut allannguutaat pillugit paasissutissiilluni nalunaarutiginninnginneq pissutigalugu meerartaarnermut atatillugu sulinnigiffeqarnermi ullormusiat eqqunngitsumik tiguneqarpata imaluunniit qinnuteqartoq paasissutissanik eqqunngitsunik suliap sularineqarnerani atugassanik tunniussippat, aningaasat eqqunngitsumik tiguneqartut utertillugit akilerneqassasut aalajangersakkami aalajangersarneqarpoq.

*§ 46-mut*

Sulinngiffeqartoq piffissami meerartaarnermut atatillugu sulinngiffeqarnermi ullormusiaqarfigisimasamini sulinermi aningaasarsiassaraluanut annaasanut taarsiissutisippat, taakkuluunniit assigisaannik pissarsippat, piffissamut pineqartumut meerartaarnermut atatillugu sulinngiffeqarnermi ullormusiaritinneqarsimasut tamakkiisumik ilaannakoortumilluunniit utertillugit akilerneqarnissaat piumasaqaatigineqarsinnaasoq, aalajangersakkami aalajangersarneqarpoq.

Sulinngiffeqartoq sulinngiffeqarnermini suliffimminit soraarsitaasoq peersitaasorluunniit inatsisip matuma malitsigisaanik meerartaarnermut atatillugu sulinngiffeqarnermi ullormusiaqarsinnaatitaavoq, tassami sulinngiffeqartoq § 40, imm.1, nr. 2 malillugu piffissap sulinngiffeqarfiusussap aallartinnissaata tungaanut suliffeqarnermut attuumassuteqarsimammat. Sulinngiffeqartoq sulinngiffeqarnermini suliffimminit soraarsitaasoq peersitaasorluunniit, soraarsinneqarnissamik nalunaarfigineqarnermi kingorna piffissamut soraarfigisassami tungaanut naapertuuttunik kingusinnerusukkut isumaqatigiissuteqarnikkut eqqartuussissutikkulluunniit eqqunngitsumik soraarsinneqarsimanerminut ajunngitsorsiassanik taartisisinnaavoq imaluunniit taarsiivigineqarsinnaalluni. Taartisiat taarsiillutilluunniit sulinngiffeqarnermi sulinikkut aningaasarsiassaagaluanut annaasanut taartaappata, taava kommunalbestyrelsip meerartaarnermut atatillugu sulinngiffeqarnermi ullormusiat tamakkiisunik ilaannakoortumilluunniit utertillugit akileqqusinnaavai.

#### *§ 47-mut*

Inuk piffissami tassani meerartaarnermut atatillugu sulinngiffeqarnermi ullormusiaqarfiusumi pineqartup tamakkiisumik ilaannakoortumilluunniit pilersorneqarneranut matusissutissatut taarsiissutinik assigisaannilluunniit tigusaqarsimappat, oqartussaasup meerartaarnermut atatillugu sulinngiffeqarnermi ullormusianik tunniussisup, taakku utertillugit akilerneqarnissaat piumasaqaatigisinnaagaa, aalajangersakkami aalajangersarneqarpoq.

Aningaasat akissarsianut assigisaannulluunniit taarsiullugit tunniunneqartut piffissamilu sulinngiffeqarfiusumi imminut pilersornissamut naatsorsuussat, uani pineqassapput. Aningaasat pineqartut meerartaarnermut atatillugu sulinngiffeqarnermi ullormusiaritinneqartartunit ikinneruppata, ilassutitut meerartaarnermut atatillugu sulinngiffeqarnermi ullormusiaqartitsisoqassaaq.

#### *§ 48-imut*

Imm. 1-imut

Namminersorlutik inuussutissarsiutillit aalajangersakkami pineqarput.

Meerartaarnermut atatillugu sulinngiffeqarnermi ullormusiaqarsinnaatitaassagaanni namminersortup piffissami sulinngiffeqarfiusumi inuussutissarsiummik ingerlatsinerminik unitsitsisimanissaa allanulluunniit tunniussisimanissaa piumasaqaataavoq, taamalu piffissami pineqartuni sulinanilu aningaasarsiaqarsimannginnissaa.

Imm. 2-mut

Aalajangersagaq malillugu namminersorlutik inuussutissarsiutillit aapparisaat inooqatigisaalluunniit ikiortaasartut piffissami sulinngiffeqarfiusumi meerartaarnermut atatillugu sulinngiffeqarnermi ullormusiaqarsinnaatitaapput, pineqartoq piffissami pineqartumi aapparisaat inooqatigisaalluunniit inuussutissarsiornermik ingerlatsinerani ikiutissanngippat.

Aapparisaq ikiortaasoq meerartaarnermut atatillugu sulinngiffeqarnermi ullormusiaqarsinnaatitaassaguni nalinginnaasumik sulisutuulli suliffimminit sulinngiffeqassaaq.

#### § 49-mut

Imm. 1-imut

Namminersorlutik inuussutissarsiutilinnut aamma namminersorlutik inuussutissarsiutillit aapparisaannut inooqatigisaannulluunniit ikiortaasartunut piffissap sulinngiffeqarfiusussap atuutilinnginnerani imaluunniit sulinngiffeqarnerup aallartinnerani sapaatit akunnerini kingullerni 13-imi akissarsiaqarlutik sulisimanngitsut pillugit aalajangersakkanik aalajangersagaq imaqarpoq.

Aallaaviatigut taakku sapaatip akunneranut nalunaaquttap akunnerinut 14-inut meerartaarnermut atatillugu sulinngiffeqarnermi ullormusiaqarsinnaatitaassapput.

Imm. 2-mut

Namminersorluni inuussutissarsiuteqartumut imaluunniit aapparisaatut ikiortit imaluunniit namminersorluni inuussutissarsiuteqartunut inooqataasunut pingaarutilimmik aningaasarsianut annasaqaataappat, imm. 1-imi aalaaviusup avaqqunneqarsinnaanera aalajangersakkami periarfissiissutigineqarpoq.

Sapaatit akunnerini kingullerni 13-imi annertunerusumik aningaasarsiaqarsimalluni, inuup meerartaarnermut atatillugu sulinngiffeqarnermi ullormusiaqartinneqarnissamik qinnuteqartup, aningaasarsiasatut annaaneqartussat uppersarsarneqarnissaat nammineerluni uppersarsassavaa.

Inuup aningaasarsiasaraluaminik annasaqarsimanini uppersarsarsinnaappagu, sulinngiffeqarnerup aallartinnginnerani sapaatit akunnerini kingullerni 13-imi aningaasarsiaviit aallaavigalugit naatsorsuisoqassaaq.



Sapaatit akunnerini taakkunani 13-ini aningaasarsiaviit meerartaarnermut atatillugu sulinngiffeqarnermi ullormusianut akigititamut agguarneqassapput, taamaalilluni piffissamut tamarmut nalunaaquttap akunneri tamarmiusut takuneqarsinnaalissallutik. Sapaatip akunneranut nalunaaquttap akunneri naniniarlugit kisitsit taanna 13-imik agguarneqassaaq, taannalu meerartaarnermut atatillugu sulinngiffeqarnermi ullormusiat naatsorsorneqarnissaannut atorneqassaaq.

Aatsaat pingaarutilimmik aningaasarsianik annaasaqarsimatillugu naatsorsuisoqassaaq. Qaaguqkut pingaarutilimmik nikingasoortoqarnersoq pillugu aalajangersimasumik naliliineq pissutaassaaq. Aningaasarsianut annaasat 10%-iuppata imaluunniit amerlaneruppata aallaaviatigut pingaarutilimmik annaasaqartoqassaaq.

Imm. 3-mut

Sapaatit akunnerini kingullerni 13-ini aningaasarsiat nalinginnaasutut isigineqarsinnaanngippata, ukiumut aningaasarsiat kingulliit atorneqassasut aalajangersakkami aalajangersarneqarpoq.

#### *§ 50-imut*

Ilinniartut ilinniarnermi sulinngiffeqartut piffissami sulinngiffeqarfigisaminni ilinniagaqarnerisuteqarsinnaatitaanngitsut, sungiusarlutik sulinerminni tapiissutisisinnaatitaanngitsut imaluunniit sungiusaammik sulinerminni akissarsiaqarsinnaatitaanngitsut, ilinniagaqarnerisutitut, sungiusarluni sulinermi tapiissutisianut imaluunniit sungiusaammik sulinermi akissarsianut naapertuuttunik meerartaarnermut atatillugu sulinngiffeqarnermi ullormusiaqarsinnaatitaassasut, meeqqanut pilersuisussaataaffigisanut tapit ilanngullugit, aalajangersakkami aalajangersarneqarpoq. Tapit taakku meeqqanut akilersuutit pillugit inatsisiliornerit qaaguqkulluunniit atuuttut malillugit meeqqanut akilersuutit nalinginnaasut qaaguqkulluunniit atuuttut amerlaqatigaat.

Meeqqanut tapiissutit nalinginnaasumilluunniit akilersuutit aningaasartaat Isumaginninnermi ikiorsiissutit tunniunneqartartut pillugu kaajallaasitami Isumaginninnermut Naalackersuisoqarfimmit ukiumut ikinnerpaamik ataasiarluni saqqummersinneqartartumi takuneqarsinnaapput.

#### *§ 51-imut*

Imm. 1-imut

Sulisitsisunut namminersortunut meerartaarnermut atatillugu sulinngiffeqarnermut aningaasaateqarfik, ilaatigut sulisitsisunit namminersortunit kapitali 3-mut ilaatinneqartunit akileeqataassutinit, ilaatigullu aningaasaliissutinit ukiut tamaasa aningaasanut inatsimmi

aalajangersarneqartunit, aningaasalersorneqassasoq aalajangersakkami  
aningaasalersorneqarpoq.

Akileeqataassut § 52-imi sukumiinerusumik allaaserineqarpoq.

Meerartaarnermut atatillugu sulinngiffeqarnermut aningaasaateqarfiup  
aningaasalersorneqarnera pillugu sukumiinerusumik allaaserinninneq nassuiaatini  
nalinginnaasuni immikkoortoq 3.1 aamma immikkoortoq 4 allaaserineqartut  
innersuussutigineqarput.

Imm. 2-mut

Aaqqissuussinermi sipaartoqarnissaa siunertarineqanngilaq. Taamaattoq  
akiliisinnaassuseqarneq eqqarsaatigalugu aningaasat atorneqarsinnaasut aalajangersimasumik  
annertussusillit pisariaqartinneqassapput. Ukiumi aningaasarsiorfimmi utertitsissutitut  
aningaasartuutit sinningaatsiarlugit akiliisitsisoqarsimappat, taamaalillunilu  
aningaasaateqarfimmi annertuumik sinneqartooruteqartoqalerluni, tamanna ukiumi  
naatsorsuiffiusumi tulliuttumi akiliutissap aalajangerneqarnerani ersersinneqassaaq.

Aningaasaateqarfiup aningaasalersorneqarnera pillugu sukumiinerusumik allaaserinninneq  
nassuiaatini nalinginnaasuni immikkoortoq 3.1 aamma immikkoortoq 4 allaaserineqartut  
innersuussutigineqarput.

#### § 52-*imut*

Kapitali 3 malillugu sulisitsisoq namminersortoq kinaluunniit, sulisoqarnermut akitsuut  
pillugu inatsisartut inatsisaat malillugu sulisoqarnermut akitsuummik akisiisussaataaasoq,  
sulisitsisunut namminersortunut meerartaarnermut atatillugu sulinngiffeqarnermut  
aningaasaateqarfimmut akileeqataassutinik akiliinissaminut pisussaaffeqartoq,  
aalajangersakkami aalajangersarneqarpoq. Akiliut Sulisoqarnermut akitsuut pillugu  
Inatsisartut inatsisaat malillugu sulisoqarnermut akitsuutip ilaatut akilersinniarneqartassaaq.

Tassunga atatillugu akigititap qaffasinnerpaaffissaanik Inatsisartut aalajangiissapput, taannalu  
qaffasinnerpaamik akunnermusiatut, utertitsivigineqarnissamut tunngaviusinnaasutut  
annertussuseqassaaq. Tamanna pillugu § 27, imm. 4 tassungalu nassuiaatit takukkit.

Assigisaanik § 37 tassungalu nassuiaatit malillugit sulisitsisunut namminersortunut  
meerartaarnermut atatillugu sulinngiffeqarnermut aningaasaateqarfiup siuilersuisuisa  
ukiumoortumik siunnersuutaat tunngavigalugu qaffasinnerpaamik akigititap  
tunngavilerneqartassaaq.

§ 51, imm. 2 malillugu akiliut aningaasaateqarfiup aningaasartuutaanut eqqortunut  
atorneqartassaaq, taamaalilluni aaqqissuussinermi sipaartoqartassanngilaq.

### *§ 53-imut*

Kapitali 4 malillugu meerartaarnermut atatillugu sulinngiffeqarnermi ullormusianut aningaasartuutit Nunatta Karsianit akilerneqartarnissaat aalajangersarneqarpoq.

### *§ 54-imut*

Siulersuisut imaluunniit kapitali 4 malillugu allaffissornikkut aqutsisup aalajangiineri allaffissornikkut oqartussanut allanut naammagittaalliuutigineqarsinnaanngitsut aalajangersakkami aalajangersarneqarpoq.

### *§ 55-imut*

Imm. 1-imut

Inatsimmi manna malillugu kommunalbestyrelsip aalajangiineri isumaginnittoqarfiup aqunneqarnera aaqqissuusaaneralu pillugit inatsisiliornerit qaqugukkulluunniit atuuttut naapertorlugit Isumaginninnermi Naammagittaalliuuteqartarfimmut naammagittaalliuutigineqarsinnaasut aalajangersakkami aalajangersarneqarpoq.

Tamanna Inatsisartut inatsisaanni matumani aalajangersakkat malillugit kommunalbestyrelsit aalajangiinerinut taamatuttaaq atuuppoq.

Imm. 2-mut

§ 43, imm. 2 malillugu Naalakkersuisut aalajangiineri, isumaginnittoqarfiup aqunneqarnera aaqqissuusaaneralu pillugit inatsisiliornerit qaqugukkulluunniit atuuttut naapertorlugit Isumaginninnermi Naammagittaalliuuteqartarfimmut naammagittaalliuutigineqarsinnaanerat aalajangersakkami aalajangerneqarpoq.

Qinnuteqartunut kommunit agguarneqarnerisa avataanni najugaqartunut, meerartaarnermut atatillugu sulinngiffeqarnermi ullormusiaqarnissamut qinnuteqaatit aalajangiiffigineqartarneri § 43, imm. 2-mi pineqarput. Uani meerartaarnermut atatillugu sulinngiffeqarnermi ullormusiassanik qinnuteqaat Naalakkersuisunut tunniunneqassaaq, taakkulu sulianik suliarinninneq suliarissavaat.

### *§ 56-imut*

Sulisitsisoq eqqunngitsunik paatsiveerussaataasunilluunniit paasissutissiisimappat imaluunniit akiliutit utertinneqartussat tunniunneqarnissaannut pingaarutilinnik paasissutissanik nalunaaruteqarsimangippat, taava utertinneqartussat tamakkiisumik ilaannakoortumilluunniit atorunnaassasut utertitassallu pisassarinagit tiguneqarsimasut utertillugit akilerneqassasut aalajangersarneqarpoq.

## § 57-imut

### Imm. 1-imut

Eqqunngitsunik paatsiveerussaataasunilluunniit paasissutissanik tunniussinnermut imaluunniit akileeqataassutit akilerneqarnissaannut aamma imaluunniit utertitassat tunniunneqarnissaannut paasissutissanik pingaarutilinnik tunniussinnginnermut Kalaallit Nunaanni pinerluttulerinermi inatsimmi malittarisassat malillugit akiliisussanngortitsisoqarsinnaasoq aalajangersakkami aalajangersarneqarpoq.

### Imm. 2-mut

Inatsisartut inatsisaata matuma malitsigisaanik aalajangersakkani Kalaallit Nunaanni pinerluttulerinermi inatsimmi malittarisassat malillugit akiliisussanngortitsisoqarsinnaassoq aalajangersarneqarpoq.

### Imm. 3-mut

Inatsisitigut pisinnaatitaasoq pisussaatitaasorlu, matumani aktiaateqarluni piginneqataassuteqarluniluunniit ingerlatseqatigiiffiit, piginneqatigiilluni ingerlatseqatigiiffiit piginneqatigiiffiilluunniit assingusut ilanngullugit, unioqutitsisimatillugit, taava ingerlatseqatigiiffik akiliisussanngortinneqarsinnaavoq. Suliassani taamaattuni Kalaallit Nunaanni pinerluttulernermi inatsimmi malittarisassat malinneqassapput.

### Imm. 4-imut

Aalajangersagaq malillugu Inatsisartut inatsisaat manna imaluunniit Inatsisartut inatsisaat tunngavigalugu aalajangersakkat malillugit akiliisitsissutit Nunatta Karsianut nakkartassapput.

## § 58-imut

### Imm. 1-imut

Aalajangersakkami inatsisip qaqugu atuutilernissaa aalajangersarneqarpoq.

Inatsisartut inatsisaat 2021-mi 1. januaari atuutilissaaq. Taamaattoq kapitali 2 aamma §§ 27-miit 29-mut 2021-imi 1. juli atuutilissapput.

### Imm. 2-mut

Inatsisartut inatsisaanni kapitali 2 aamma §§ 27-miit 29-mut 2021-mi 1. juli atuutilissapput. Aalajangersakkat taakku kapitali 2 malillugu suliffeqarfinni namminersortuni sulisut sulinngiffeqarnerminni akissarsiaqarsinnaatitaanerannut, aamma § 27 malillugu sulisitsisut namminersortut akissarsianut aningaasartuutiminnut utertitsivigineqarsinnaanerannut tunngassuteqarput. Meerartaarnermut atatillugu sulinngiffeqarnermut aningaasaateqarfiup siulersuisuinut ilaasortassanik toqqaanissamut piffissaqarnissaq aamma allattoqarfiup pilersinneqarnissaa aalajangersakkanut taakkununga atuutilersitsinissap kingusinneruneranut pissutaavoq.

Meerartaarnermut atatillugu sulingiffeqarnermut aningaasaateqarfiup allaffissornikkut ingerlanneqarnissaa pillugu neqeroortitsisoqassasoq naatsorsuutigineqarpoq. Neqeroortitsineq qaammatinik 2-3 sivisutigissasoq naatsorsuutigineqarpoq, tamatumalu kingorna allattoqarfiup pilersinnissaanut piffissaqartoqartariaqassalluni.

Tamatuma saniatigut assersuutigalugu sulisitsisut- sulinermillu inuussutissarsiuteqartut kattuffiisa ilaasortaminnut meerartaarnermut atatillugu sulingiffeqarnermut aningaasaateqarfik pillugu aamma malittarisassat nutaat pillugit paasisitsiniaanissamik aallartitsinissaminnut piffissalerneqarput.

Suliffeqarfinni namminersortuni sulisut, 1. juli 2021 sioqqullugu kisianni 1. januar 2021-p kingorna, sulingiffeqarnissaminnik aallartitseersimasut, taamaalillutik kapitali 2 malillugu 1. juli 2021 aallarnerfigalugu sulingiffeqarnerminni akissarsiaqarnissamut pisinnaatitaaffeqalissapput.

Imm. 3-mut

Inatsisartut inatsisaata massuma atuutilernera peqatigalugu Naartunermi, erninermi meeravissartaarnermilu sulingiffeqartarnek ullormusiaqartarnerlu pillugit Inatsisartut inatsisaat nr. 14, 7. december 2009-imeersoq atorunnaarsinneqassasoq aalajangersakkap aalajangersarpaa.

Meeqqamik paarisassamik inissiinermi sulingiffeqartarnek pillugu Namminersorlutik Oqartussat nalunaarutaat nr. 3, 25. februar 2010-imeersup atorunnaarsinneqarnissaa tamatumunnga aamma kinguneraa.

#### *§ 59-imut*

Angajoqqaanut, 1. januar 2021 imaluunniit kingusinnerusukkut meerartaartunut, Inatsisartut inatsisaat manna atuutissaaq.

Angajoqqaat meeravissartaartunut angajoqqaat meeraq 1. januar 2021 imaluunniit kingusinnerusukkut tiguppasuk, Inatsisartut inatsisaat atuutissaaq.

Malittarisassat maannamut atuuttut malillugit inuit sulingiffeqarnerminnik aallartitseersimasunut, aamma meeraq meeqqallunniit 1. januar 2021 sioqqullugu inuusimappata tiguneqarsimappataluunniit, Inatsisartut inatsisaat manna malillugu sulingiffeqarsinnaatitaasinnaanngillat. Taakku suli Naartunermi, erninermi meeravissartaarnermilu sulingiffeqartarnek ullormusiaqartarnerlu pillugit Inatsisartut inatsisaat nr. 14, 7. december 2009-imeersoq malillugu sulingiffeqarsinnaatitaassapput.